



مذكرات طيب

أشيك واد في شبرا

الطبعة
الثالثة



محمد

ناجي



بيان

أشيك واد في شبرا

محمد ناجي عبد الله

الهدف من الكتاب

أولا عايز اتكلم باختصار عن سبب تسمية الكتاب بالاسم ده "اشيك واد في شبرا" .. أنا زى شباب مصريين كثير سافرت مع ابويا وامي لدولة خليجية - تحديدا السعودية- وعشت هناك حوالي عشر سنين بعدها رجعت مصر عشان الجامعة لكن اهلى فضلوا هناك عشان شغلهم، وشوية واخواتى نزلوا هما كمان عشان الجامعة. دا السيناريو اللى بنشوفه دلوقتى في عائلات مصرية كثيرة خصوصا كمان لو انت دخلت جامعة خاصة (زى بالظبط) هاتلاقى ان ٩٠٪ من زميلك عاشوا نفس التجربة. اللى عايز اناقشه معاكم مش تجربتى في السعودية، دى خلاص أيام وراحت لحالها... أنا عايز أشارك معاكم تجربتى هنا في مصر، وبالأخص لما جيت شبرا.

زمان، لما كنت بنزل مصر كل سنتين فى الأجازات، كانت مصر بالنسبة لى "فسحة" باقعد شهر أو شهرين وطبعاً دول بيقوا أحلى شهرين فى السنة لأنى بشوف قرايى وأهلى وشوف أحلى حاجات فيهم (مهو اكيد مش هايشغلونا بمشاكلهم دلوقتى.. ماحبكتش) كنت باجى مصر كسائح. لما نزلت مصر عشان الجامعة الوضع اختلف تماما، هنا أبويا وأمى بدأوا يقلقوا ويقولولى خد بالك من نفسك والشغل ده (هو أنا داخل على ايه بالضبط؟! اكتشفت بعد كذا ان القعدة والاستقرار في مصر (مصر الحقيقية) على غير المتوقع، أكشن أكشن يعنى مافيش كلام. أنا من ساكنى مدينة نصر، بس ماأكونشى هناك إلا لما أهلى بيتزلوا من السفر عشان مايبهدلشى الشقة بقى وكده. وبصراحة ما بحبش أوضب إلا بمزاجى. فكان الحل المثالى انى أقعد فى شقة صغيرة (محدقة) تنوضب بسرعة وعلى قدى وتكون مواصلاتها سهلة

عليّ انى أروح أى مكان وبأى وسيلة مواصلات (والأهم انى أعرف أرجع لها تانى بسهولة برضه)، وتكون في منطقة شعبية جبتين عشان يبقى فيه ونس وولاد البلد بيقوا جنبى وكل حاجة متوفرة فيها. نعم يا سادة إنها "شبرا".. كانت فيها كل المواصفات القياسية، ده حتى باص الجامعة كان بيعدى من قدام باب بيتى. فعلا عندنا عمارة كانت بتاعة جدى الله يرحمه أبو والدتى، وكان فيها شقة صغيرة فاضية.. ديه كانت بداية امبراطورية حقيقية (آه والله امبراطورية) ما تستغريوش قوي كده، لما تكملوا الكتاب لآخره هنعرفوا أنا قصدى ايه، وليه استحققت لقب "أشيك واد في شبرا" بجدارة.

القضايا المتضمنة في الكتاب

باديء ذي بدء.. (حلوة باديء ذي بدء دي).. الهدف من الكتاب ده اني أنقل تجارب مریت بيها -ويمكن كثير منكم مر بيها هو كمان- في إطار كوميدي، مش لأنني عايزكم تضحكوا وخلص، لكن لأن فعلا هي كوميدية وغريبة واللي مر منكم بيها هيستغرب ازاي الحاجات ديه بتضحكتنا مع انها لو كانت حصلت في زمن أهاليينا زمان كانت هتبقى دراما. لكن يظهر اتنا دلوقتي بنحاول نسخر من فشلنا أو أخطائنا كتوع من وسائل الدفاع اللي طورناها كويس قوي على مر الزمان عشان نواجه الاحباطات، ونحاول تاني وتالت ورايع لحد ما نتجح، وساعتها برضه بنفكر أيام فشلنا ونضحك (والله احنا شعب سكر).

أنا عارف ومتأكد أن في ناس هتقول ده واحد فاضي، ماهي لمت خلاص وكله بقى يكتب، واللي هيقول هو هيعمل فيها الناصح الأمين والمصلح الاجتماعي، و.. و.. لكن أنا بأقول له معلش، ممكن ما تكلفش خاطر ك وما تعبش نفسك وتقرأ، لأنني قررت اني أعمل الكتاب ده عشان ماحدث يقع في نفس الأخطاء اللي وقعت أنا فيها، أو أن الحاجات الكريسة اللي عملتها متأخر تعملها انت أو عملها انت بدري، وتبقى أحسن مني يا أخي.

الفكرة الأساسية من الكتاب اني عملت حاجات كتير في حياتي، ومریت بطروف قد تكون عادية بالنسبة لك، لكن بالنسبة لغيرك ممكن تفرق. القضايا والموضوعات اللي هتقرأها كلها من وجهة نظر شاب مصري زيك بالضبط، مر بكل

المراحل المتوترة في حياته، اللي كان لازم ياخذ فيها قرار، وكان لازم بمر بيها، وكان نفسه يلاقى حد يسمع منه ويحكي له، والأهم من ده كله ان اللي ينصحه يا يقول له كلمة حلوة يا يتكلم خالص وما يدهوش في داهية. الكتاب بيتناقش موضوعات مصيرية زي شغلك وحياتك المهنية بوجه عام وازاي ممكن تحقق أهدافك بطريقة سهلة وسلسة بعيدا عن التعقيد اللي بنشوفه في كتب التنمية البشرية الكثيرة قوي، وخصوصا اللي بتبقى "مترجمة" بأحسن ان كلها حشو حشو عالفاضي.. احنا شباب بابا وعايزين طريقة واضحة، مش كلام جرايد كلنا قرأنا منه كتير قوي.

الكتاب بيتقد يوميات في حياتنا من وجهة نظري الشخصية، وعن قدرات حصلت لي كانت كل مرة بتثبت لي ان ربنا لو وفقك في حاجة أو يسرك حاجة في حياتك، يبقى أكيد كان له غرض قوي في كذا. حتى لو كانت حاجة حرام!!؟ حتى لو كانت حرام، لأنه ساعتها كان عايز يوريك ان الانسان مش معصوم من الخطأ، فما تغرش وتتأدب مع ربك بعد كده، أو انه كان عايز يوريك قد ايه انت كنت في نعمة وانت مش حاسس بيها. الكتاب ببساطة بيتكلم عن شاب عايزك تبقى أحسن منه بكثير، وفي المقابل انت كمان لو استفدت.. ادعي له ربنا يهديه. ولو الكتاب ده فعلا غير ولو جزء بسيط من حياتك، ادعي له تاني.

ملحوظة هامة: فيه فصول "معينة" في الكتاب لو قرأتها مرة تانية وثالثة.. هتكشف معنى معين ورسالة مختلفة ممكن تتفاجيء بيها.. رسالة عايزك تفهمها و تاخذ بالك منها.. لكن انت عارف بقي.. فيه حاجات ماينفعش تتقال عشان مانزعلشي متنا حد.

ركز بسى فس ثانوية عامة وبعدها اعمل اللى انت عايزه

ثانوية عامة.. من المراحل الغريبة اللى مررت بيها في عمري، مرحلة ما كانشى ليها اى داعى في حياتى ولا في حياة اى واحد فيكم أعتقد، غير انك عرفت صحاب كويسين. قبل ما آجى مصر، كانت ثانوية عامة بالنسبة لى عبارة عن ستة دراسية عادية جدا، أنا حتى ما كتتش أعرف موضوع الدروس ده أصلا. ولما جيت مصر، لقيت الآبة اتقلبت. المدرسة مجرد "نزهة" للولاد، يصطبحوها ويضربوا الفول والطعمية مع المدرسين ويزوجوا.. أما البنات، فكانت ديه فترة الغيبة والنميمة (الشو تايم).. ٦٠ ساعات بيعدو من اليوم كل يوم عالفاضى، اللهم بس الصحبة الحلوة والوجه الحسن. قلت يمكن فى الدروس الناس بتركز يا واد.. لقيت ان الدروس عبارة عن مدرسة ثانية، بس على صغير. الطالب اللى عايز يفلح يحطوه مع طلبة زيه، والطالب أو الطالبة اللى جاين يهرجوا يحطوهم مع بعض، وكأنها حفلة (طب ما ايه لزمتهما بقى ما ييجى عالوقت اللى بيضيع والفلوس كمان). لو سألت ٧٠٪ من الشباب اللى كانوا بيروحوا ستر دروس عن الستر ويمثل لك ايه؟ هايقول لك "ده كافيه زيه زى جروبي" عاش فيه أجمل قصص حبه، وكان بيستنى المعاد من درس لدرس عشان يقابل "ستديلا". اللى مش مصدق، يروح أى ستر من دول ويشوف (اللوحات الجدارية) اللى مرسومة عالحيطان. دعونا لا ننسى طبعنا الخنصرة من

فلوس الدروس.. لا وايه، الطلبة بيتفاوتوا بقى فى الضمير.. فلوز واحد ضميره مات، ده بيضرب عالفلوس كلها ومايحضرش، ولو لسه فيه بواقى ضمير وحاسس بأهله وعنده دم، بيخنصر مرة ويحضر الدرس مرة. أنا شخصيا باحترم النوع الثالث.. البرنس اللى ييضرب على فلوس الدرس كلها، ويحضر الدرس وينصب عالمدرس كمان.

الفكرة بقى انه بعد كل ده لسه أهالينا متمسكين بالأساطير اللى بتوحى ان ثانوية عامة هى اللى هتحدد مصيرك، وهى اللى هتفرق في حياتك، ونسيوا ان الرزاق هو رب العالمين. كانوا دايمًا يوهموننا ان بعد ثانوية عامة "كله هيتصلح" وان يا ابنى اتعب في ثانوى وهستريح بعد كده.. احرم نفسك وتعالى على نفسك في ثانوى وبعد كده اعمل اللى انت عايزه. ويتكتشف بعد كده انك دخلت الفخ برجليك، وان الحياه للأسف بتبقى أصعب بكتيبر كل مادي، لأن مسؤولياتك بتزيد أيا كانت الكلية اللى انت دخلتها. أنا عارف ان كليات القمة صعبة جدا ومقرفة وبتعزلك عن حاجات كثير جدا.. بس ده مش معناه ان كلية تجارة أو ألسن سهلة!! كل كلية فيها اقسام بنت حرام بتميزها، إذا دعونا نتفق على ان مافيش حاجة اسمها: "خلص ثانوية عامة وتعالى على نفسك واحرم نفسك، وبعد كده اعمل اللى انت عايزه" لأن في الحقيقة ومن واقع خبرة، لو ملحققتش تعمل حاجة وانت لسه شاب في عز شبابك وبكامل طاقتك، ابقى قابلنى لو عرفت تكسر حاجز الملل في حياتك العملية بعد كده يا صاحبي.

واحد بقوللى طيب أنا عايز اعمل حاجة وماتبقاش فترة ثانوى بالنسبة لى ججيم، وبرضه مايجش بالذنب ومااديش فرصة لحد انه يقول لى الكلمة الحمضانة الشهيرة:

"انت السبب، مالت لو كنت ضغطت على نفسك شوية كنت جيت الدرجة ديه!.." لما واحد يقول لك كده رد عليه بمتهى الهدوء وقل له: (هو انت كنت تعرف الغيب عشان تبقي متأكد من كلامك وانى كنت هاجيبها لو ذاكرت أكثر؟؟).. يا جماعة كل واحد واحد فينا عارف كويس قوى إذا كان عمل اللي عليه ولا كان بيتدلج، وكل واحد عارف الصح من الغلط.. فأهم نقطة انك بينك وبين نفسك تبقي عارف انك عملت اللي عليك، وبعد كده تحط صباغك في عين الطخيسن، لأن ريتا سبحانه وتعالى مايبحاسبش الانسان عانتية، يبحاسبه عالشغل والمجهود والنتيجة ديه بتاعته هو. طيب برضه نعمل ايه؟ كل اللى عليك انك "تغير طريقة مذاكرتك" مش "تزدود وقت مذاكرتك" .. يعنى مثلا بدل ما كنت بتذاكر بالكتابة لأ جرب انك تتفرج على فيديو عاليوتيوب. التعليم البصرى أحسن مليون مرة من الحشو والدش اللي احنا هابيشن فيه؛ ده بالنسبة للمواد العلمية على سبيل المثال.. اللغات احنا بصراحة مايتعلمش لغات أصلا ولا "انجيليش لانجويشش" ولا "فغانساوى" واللى هيقول لى لأ أنا باعرف واتعلمت فغانساوى حتى بص:

"جو نى بارل أو فغانسي.. جو سويس أو مالاد" ..هقوله: "مالاد ديه تبقي حالتك"!!! بلاش كلام فارغ بقى. أحسن طريقة تتعلم بيها لغة انك تمارسها ولو كان عالقواعد اللغوية برضه هتلاقى عاليوتيوب بلاوى متتلة هتوريك اننا ماعندناش مدرسين عندهم أسلوب تدريس (إلا من رحم ربي طبعاً ودول ريتا يجازهم خير وبارك لهم فعلاً). بالنسبة للغة العربية فأحسن طريقة بلا منازع هتخليك معلم فى النحو (اللى هو أصعب الفروع ويتقص درجات) انك تتعلمه من "القرآن الكريم" .. استحالة انك تتعلم نحو من القرآن الكريم استحالة وتحتاج بعدها مدرس عربى أبداً..

(أنا مش قصدى حاجة وحشة) لكن قصدى انى جربت ده بنفسى لما "أستاذ سيد" قريبي وأستاذى اللى باحترمه جدا علمه لى بالطريقة ديه، لأن بصراحة أمثلة كتاب الوزارة اللى بيألفوها ديه أمثلة غبية وساذجة ماتعرفشى هو عايز ايه ولا عايز فين!

اللى مخلينى عدوانى جدا تجاه ثانوية عامة هو انى فعلا تعبت وعملت اللى عليّ ولما أخذت المستوى الرفيع (طبعا جغرافيا زى الكل) قفلت العشر درجات وفى الآخر جيت ٥, ٩٨٪ لكن اللى فقعتنى ان كلية طب أسنان القاهرة اللى ابويا وامى اتخرجوا منها أخذت من ٦, ٩٨٪ ١٠٠, ٠٪ كانت كفيلة انها تغير طريقة تفكيرى فى الحياة تماما، وان الدنيا فيها حاجات كتير تستاهل انك تجربها أكثر من القعدة عالكتاب.. نعم يا سادة، ده اللى كنت باتكلم عنه، ماتضيعش حياتك فى كذبة كبيرة اسمها "لما تخلص ثانوية عامة ابقى اعمل اللى انت عايزه" لأن مشيتة ريك هتم بيك أو من غيرك، واليوم اللى بيعدى لا يمكن يتعوض.

أنا ما بأقولكشى انك تستهتر، إطلاقا.. انت لازم تنجح وماتديش فرصة لأى حد انه يهزج ابوك وامك، لكن فى نفس الوقت اعرف انت عايز ايه من حياتك وغير طريقة معالجتك لمشاكلك وخليك فاكر ان ثانوية عامة مجرد سنة زى أى سنة خلقتها ربنا، احنا اللى بنكتب أحداثها، فاختر كويس قوى قلمك اللى هتكتب بيه والورقة اللى هتسجل عليها ورتب أولوياتك وماتسمعش كلام فارغ من ناس ماحققتشى حاجة فى حياتها غير الكلام ولعب الطاولة عالقهواوى لما حد فيهم يقوللك: "ثانوية عامة ما تاكلىشى.. ثانوية عامة ما تنامشى.. الخ.." وهى أبسط من كذا بكثير ومن غير مبالغة، عشان أنا كنت زيك فى يوم من الأيام.. نصيحة: اليوم اللى بيعدى مابيرجعشى على قد ما تذاكر على ثد ما تكافىء نفسك. لو مذاكرتك شوية وحاسس

انك مقصر يبقى لم نفسك وماتلعش كثير.. ولو تعبت نفسك يبقى كافىء نفسك
صح.. وفي الآخر هي مش شطارة انك تخلص امتحانات في شهر ٥ وتبدأ دروس
في شهر ٦ أو ٧ دي خيابة.. لأن دي جريمة في حق نفسك. بس خد بالك، ناس كثير
ياما اتكلمت عن الخيال والإبداع، وانه قدايه ده ممكن يفرق في مدى رقى أى واحد
وعلو طموحه.. أنا عن نفسي مؤمن جدا بالكلام ده، بس خيليني أقول لك حاجة؛
يمكن تخليك تعيد التفكير: خيال من غير فكر زى غسيل من غير مشبك.. لو
حبة هوا جامدين شوية عدوا.. بووووم.

خيال من غير ثوابت = "مهزلة".

يا دكتور " أنا ساعتها انتظرت من السرير، جدتي قعدت تزغرد وتقول لى بلا انزل له بسرعة واديله الحلاوة يا حمادة (الله يرحمها ماكانتشى تعرف اللى فيها).. نزلت أخذت الراجل بالحضن وهو يزعق مبروووك يا دكتور محمد.. "طب بيطرى القاهرة"!!.. ساعتها كل حاجة وقفت، زى ما الموسيقى تكون شغالة والشريط بسف مرة واحدة!!! "نعم يا عيني؟ طب بيطرى" ده اللى قلته له بلهجة ساخرة، الراجل حس انى مش هديله الحلاوة.. ساعتها قلب لنغمة التظليل للكلية ديه وجمالها وحلاوتها، وكأنه بقى عميد كلية طب بيطرى القاهرة قسم "مؤخرة سيد قشطة".. المشهد لما طلعت البيت طبعا كان مأساوى، وجدتي تعيط وتقول لى "هقول لأمك وأبوك ايسه؟؟ أبوك ده اعمل فيه ايه طب؟؟ مافيش فايده فيه؟؟ بقى أنا طول عمري بقول لولادى أصلا ماحدث يكتبها فى التنسيق يقوم ناجى كاتيهالك؟؟".. وانا مابقيتشى عارف أضحك ولا اعيط وأقولها يا تيتة يا حبيبتى طب انتِ ذنك ايه بس هههههه.

لكن أنا مااستلمتش، وشفقت المسألة من منظور تانى برضه.. قلت يا واد ما يمكن ربنا ادالك اشارة انك اهو ذاكرت وعملت اللى عليك وجبت مجموع على (اكيد أنا مش بليد به 98%، يعنى) ومع ذلك مجاش نصييك طب أستان بيقى هي الكلية اللى نفسك فيها.. فنون جميلة.. وكان عليّ انى ابدأ رحلة إقناع بابا وماما بالموضوع.

الحقيقة، لو اتكلمتنا شوية عن فنون جميلة، هنلاقى ان اللى بيدخلها يا إما: مجموعه ماجابشى / عايز يدخل عشان بيقى مهندس ديكور بس مايتعكش فى كلية هندسة / انها تبقى بنت وديه كلية حلوة ولذيذة وراقية للبنات / انه يكون موهوب وفنان بحق وحقيقى واختارها عن اقتناع / انه يكون داخلها وخلص أو

النوع المشهور اللي موجود في كل الكليات هو النوع اللي داخلها لأن ماقدامهوش غيرها، ولازم يتعين ويقى معيد ويحضر كمان على حساب الجامعة ويتعين دكتور فيها (الناس ديه هتكلم عنها قدام شوية وعن عقليتهم وطريقة تحليلهم للأمر). أنا كنت الشخص اللي كان هيموت ويدخلها، لأنى كنت عارف انى هابقى فنان (غضب عن أى حد) مؤمن بامكانياتي فيها جدا، وفعلا صليت استخارة وقاتحت ابويا وامى ، وكانت النتيجة انهم بكل أدب وممنونية واحترام ومهنية هزأوا امى هههههههه.

سمعت جمل من نوعية "فنون جميلة ايه دى اللي تدخلها؟؟!!" أو "انت عيبط يا حمادة؟؟!!.. انت عارف آخرتك ايه؟؟ هتطلع مدرس رسم في مدرسة ابتدائى.. ده انت حتى مش هتلاقى حد ياخذ دروس فيها" وفيه جمل خطف عالطير كده زى "وأخبار عمك نانى ايه؟؟! بتشوفها؟" ايه اللي دخل عمى دلوقتى يا بابا!! بعد يومين لقيتهم بيكلمونى ويقولولى احنا لقينا جامعة كويسة جدا (جامعة خاصة) اسمها (جامعة مصر الدولية) فيها صيدلة وأسنان.. شوف عايز تدخل ايه وبراحتك! ..سعتها ما عجبنيش أسلوب الحوار وبدأت "أزمزء" وأصرت أكثر على موقف فنون جميلة، والواحد مننا لما يبجب حاجة (أو حد) بيفتكرله احلى صفات، وده اللي كنت كل مرة بذكره ليهم انه قد ايه الكلية جميلة وأن أسطورة (مدرس الرسم ديه) يا جماعة كانت زمان والثانيين دول أصلا تربية فنية مش فنون جميلة. على التقيض بقى بابا وماما كانوا متأكدين ان دماغى ناشفة (هجييه من برة يعنى) فبدأوا معايا بأسلوب الإقناع. أنا فاكر ان بابا جابلى أسامى فنانين كتير رسامين وممثلين قدامى كانوا بيشتغلوا دكاترة أو وظائف تانية ويقوا برضه أعظم فنانين، وكانت حاجته ان الفن مياكلش عيش إلا لو بقيت فنان متمكن ولقيت اللي يقدر فنك (و ده حقيقى) وانك لو رسمت عشان تبيع، هتفضل تنزل تنزل لحد ما هتبقى زيك

ري الطباعة.. يتنقل شغل غيرك مش بتعمل شغلك، أو بمعنى آخر: مدعى الفن.
المرّة دى كلامه كان مختلف، وقعدت أفكر كتيـــــر إذا كان اللي هعمله صح
ولا هرجع أندم، ماهو الناس حواليك كده.. يزنوا عليك ويقنعوك ولما تقع أو تفشل
يقولوا لك ”ماحدش ضريك على ايدك“. وصلت لحل أخيرا.. هو ان أهلى تعبوا في
لريش واستحملوا عشاني كثير، هاستكثر أنا عليهم بقي انهم يفرحوا بانهم ويقولوا
الدكتور راح والدكتور جه؟؟! اذا كان ده هيفرحهم فعلا.. يبقى توكلنا على الله، وفي
النهاية رضا الرب من رضا الام والاب.. لو هما رضيووا عنى يبقى ربي راضى عنى،
ولو ربي راضى عنى يبقى أكيد أنا ملكت الدنيا كلها..
أخذت قرار انى هاكمل كطبيب أسنان وشفان.

سنة أولى شبرا

أول سنة فعلية ليّ في صر، وتحديدًا شبرا، كانت مع جدتي. وطبعًا أنا مش محتاج اتكلم عن القعدة مع جدتك بتبقى عاملة ازاي.. "تيتة" .. الكلمة دي معناها لو دورت عليها في المعجم الوجيز أو القاموس المحيط هتلاقيها بترمز لك "المطلق" .. المطلق أو اللانهائي، تيتة يعني حب لا نهائي، يعني طيبة لا نهائية، يعني تلاجة مليانة خيريات الطبيعة من لحوم ودواجن وألبان وجبن وفاكهة ورمان وخضروات طازجة ترم العظام.. أنا لما كنت أمد ايدى في التلاجة آخذ فاكهة، ماكانتشى بتخلص، كانت بتتملى تانى لوحدها.. والفاكهة بتبقى مغسولة وساقعة عشان تسهل عليك مهمة الأكل وماتضيعشى وقتك تتساءل أقوم أغسلها ولا لا. أنا وابن عمى كريم وابن عمتى أحمد لما كنا بتقعد نذاكر كنا بتقعد جنب التلاجة.. ساعات كنت بأحسن ان الهدف من قعدتنا آخر حاجة فيه اننا نفتح كلمة. كانت القعدة بالليل عشان نسمع حسام حبيب ألبوم "زى الأيام ديه" تقعد نتقنق في أى حاجة تطولها ايدينا.. بيت تيتة هو البيت الوحيد اللي كنا كل يوم نتعشى فيه "مكرونة بشاميل وفراخ بانيه".

كل ده كلام جميل، لكن المشكلة انى كنت عايش في السعودية أنا وبابا وماما واخواتى بس، مانتعودتش انى أتعامل مع حد تانى من قرابىي إلا فى الاجازات، فكانت عندى مشكلة كبيرة في التواصل. كنا دايما في الاجازات بننزل نلاقى الناس بتضحك ومخبية مشاكلها، لكن المرة دى أنا بقيت جزء منهم، ولو اتعرضنا لمواقف حرجة أو مشاكل لازم نتعاون في إيجاد حلول وسط. أنا وجدتي من جيلين مختلفين جدا، لكن ماتستهنوشى دايما بواحدة ريت خمس رجالة وطلعتهم أحسن ناس..

لمخصيتها كانت قوية جدا، لكن حنينة وطيبة جدا جدا - الله يرحمها - إلا إن أنا وماهي جزمة قديمة ولما بتقفل معايا وهي كمان بتقفل معاها بتبقى قفلة في الشارع كله.

تيته كانت من أهم المراحل في حياتي.. اتعلمت منها أصول الصنعة على حكي رينا، وكان رينا قعدني معاها أول سنة دي عشان اتعلم منها مهارات البقاء اللي لمعتني بعد.. كده لما قعدت لوحدي. كان أول حاجة طبعا اتعلمتها منها ازاي افاضل مع بياعين الخضار والفاكهة، وايه المواصفات القياسية للفاكهة والخضار المثالي. ليه كانت مؤمنة بمبدأ: "لو الأساس سليم.. كله هيبقى سليم"، فلو عايز تعمل طاجن بامية مثلا، يبقى لازم البامية تكون صغيرة وعرقها أحمر عشان تبقى معسلة (تجنب البامية الكبيرة عشان بتبقى خشنة ومررة ومشوكة).. ولو بتعمل فاصوليا، لازم تكون متينة أو ملوية.. اوعى تجيب المفرودة.. أما عن الملوخية فلازم تكون جذورها قصيرة وورقها أخضر وكبير.. مرة جبتيها ملوخية طويلة وماشي بتمختر بيها، قالتلي لا!!! ماتنفعنيش، قلت لها نعم؟؟ أمال أعمل بيها ايه؟؟ قالتلي أقول لك وما تزعلشي؟؟!!!!!!..

خد عندك من ده كثير.

دعونا لا ننسى البيض المقلبي اللي سااa

من الحاجات اللي مش هانساها يرضه أن - كأى شاب عاش في دولة غربية - كان الهدوء هو السمة المشتركة في كل بيت هناك. وحتى لما كان حد

مصر في عيون شبراوي

”مصر أم الدنيا“.. وهتفضل طول عمرها كدا رغم أنف أي حد. بس اللي محيرني وخلصني أفكر في مصر بصورة معينة مش الجملة دي خالص، إنما جملة ثانية.. ”نورت مصر“ من أكثر الجمل اللي لما كنت بشوفها في اعلانات القنوات الفضائية وأنا في السعودية كنت بشتمنى اني أزور الأماكن اللي كانوا يعرضوها في الاعلان. صورة مصر كانت دايمًا ناس طبيين، قُسح، سياحة، أهرامات، كورنيش، برج القاهرة (اللي بالنسبة لايراج ديبى أو أى دولة في العالم حاليًا زيه زي ابراج الرمل اللي العيال بتبنيها في المصايف ولا!!! أى اندهاش). دايمًا بيجيبوا واحد بيضحك ويقولك ”نورت مصرررر اباشا.. ايبسه نورت مصر“ بتحس من منظره انه عايز يتصب عليك. نفسى أفهم ليه دايمًا الناس بره واحدة فكرة عتنا اتنا نصاين وحرامية وان دايمًا في مؤامرة اتنا نمص دمهم وتصب عليهم لما يجوا كسياح.. ده مش بس الخلاصة، حتى الهنود!!!.. واحد هندي من اللي بيصلحوا كمبيوتر هناك افكر انى هانصب عليه ومش هديله الفلوس بعد ما يصلح الجهاز بتاعى، لقيته يقوللى: ”اتنا ليس ما فى ادفع فولوووس، ازاهر اتنا فيه واحد مصرى مووس كويس.. اتنا فيه واحد على بابا“.. انا مفهمتش يعنى ايه على بابا لحد ما واحد مصرى جنبى قال لى ده قصدك ب”على بابا“ حرامى يعنى أو نصاب.. قصدك ان اتنا مصرى نصاب نتصب عليه!! في لحظة مقدرتش أتمالك نفسى وقتلته: ”أنا مصرى على بابا يابن الو..“ وديه كانت أول مرة بحق ربنا أشتم فيها بجد.. بسبب بلدى مع الأسف!

كان واضح من خلال التعامل اتنا مكروهين من ناس حوالينا كثير، والإعلام

بتاعنا الله بنور طبعنا (بس ده هاتكلم عنه باستفاضة في فصل لوحده) لأن ٧٠٪ من البلاوى والسمة اللي طالعة علينا من الإعلام بتاعنا احنا أكثر من إعلام غيرنا. فقررت انى اعمل بحث ميدانى أكثر بما انى هاعيش في البلد ديه فترة مش قصيرة. كانت أول حاجة جت في بالى انى أتعلم اروح وأجى، الشوارع والمواصلات والاماكن العامة وأماكن المجمعات والحاجات ديه. كانت الوسيلة الرسمية لى هي المترو طبعاً.. بصراحة رغم انى عارف ان حسمى مبارك كان له زلات لكن الحاجة الوحيدة العدلة بحق وحقيقى اللى عملها كانت المترو، ده اللى ربطلى البلد ببعضها فعلا بغض النظر عن الزحمة وان الستات بيسجوا يركبوا عندنا بالعافية لا وبيتخانقوا كمان.. واحدة بأسألها في مرة "هو انتم ليه بتركبوا معنا مع ان عربيتكم أحياناً بتبقى فاضية جدا؟" قالت لى "عشان عربيات الستات فيها "تحرش"!!!!!!"

بالنسبة للشبراوى، والخروجات دايماً ليها طعم تانى. كل بلد من البلاد اللى حوالين شبرا يتمثل لون وطعم وطابع وثقافة تانية خالص عن التانية (و أنا مصر على كلمة بلد.. لأننا فعلاً بنعتبرها بلاد تانية مش مجرد شوارع. أصلاً فى ناس بيعيشوا ويموتوا وميعرفوش ايه شبرا ديه). لما كنت بركب باص الجامعة بتاعى (خط شبرا) كنت بقعد أتفرج عالناس فى الباصات التانية.. بحس انهم دنيا تانية وعالم تانى وأزياء لیس مختلفة وطريقة كلام مختلفة. الحقيقة عرفت صديقة من دولة المعادى الشقيقة، كنت راجع من الجامعة على اصحابى فى المعادى، وكان حديث شيق جدا بينى وبينها عن التبادل الحضارى الثقافى بين الدولتين. كنت بأحكي لها على ان الراجل الشبراوى لا يزال متأصل بعاداته وتقاليد زى ان مايفش حاجة اسمها ان زميلته تستنى الباص لوحدها.. احنا بنجمع بعضنا ونقف كلنا جنب بعض عشان ماحدش يضايقهم، وهنا اتأثرت جدا وعبرت لى عن أسفها الشديد وانهم فى

المعادى مفتقدين القيم والمبادئ الرفيعة ديه، لدرجة انها اتعاكست مرة وقدام الباص والرجالة فضلوا محلك سر. قتلها لآ أنت تيجى تركبى من شبرا بعد كده أكرملك..

واحد صاحبى تانى من مملكة "مصر الجديدة" ركبت معاه الباص وبدأ يعرفنى على "لمحات" عن البلد الرائعة ديه، اللى الصراحة كل ما أروحها لحد دلوقتى أتوه فيها من كتر ما شوارعها شبه بعض.. لكن اللى لفت نظرى فيها واللى صاحبى "اتكا" عليه قوي هو جامع جمىـل تحفة مشهور قوي هناك والناس بتصلى فيه دايمًا فى العيد (انا مش هاقول اسم الجامع) لكن هاقول انى تساءلت عن سر الإقبال الرهيب ده من الناس، واشمعى الجامع ده بالذات، لحد ما رحى صليت فيه فى مرة فى العيد... وعرفت السبب، أنه الجامع ده بيصلى فيه شباب وبنات (و مش أى بنات) ولما الصلاة بتخلص، كله يقلم!!! وكله بيعيد وكل سنة واتم طيبين.. شفتوا الخيبة اللى احنا فيها؟!..

الزمالك بالنسبة للشبراوى والناس الثانية عبارة عن منطقة ارستقراطية راقية جدا، فيها كافيهات أسعارها الى حد ما مش بظالة (وكتيـرة) وبالنسبة للشبراوى تعتبر قرية.. بالنسبة لى أنا شخصيا، هى أرض الفن، وفيها كام جاليرى فن من الجاليريهات اللى إن شاء الله هاعرض فيها أعمالى مرة. وساقية الصاوى طبعا وعروض ساقية الصاوى واللى من خلالها اتعرفت على شخصية راقية جدا وهو صديقى وفنان محترم "طارق زايد" اللى ساعدنى لحد ما عملت أول معرض لى فى أتيليه القاهرة بوسط البلد بعنوان "مقتطفات". ديه معظم اهتماماتى الأساسية فى الزمالك الى جانب كلية فنون جميلة طبعا.

رمسيس وسط البلد والعتبة.. الثلاثة دول واحد بالنسبة لى.. الثلاثة زحمة،

الثلاثة بتركب لهم مترو، والثلاثة محطات رئيسية لو غايز تروح أى مكان في مصر. جامعة الدول دى أكيد معروف مشهورة بايه.. بس من وجهة نظرى هى مكان شيك عادى ماشفتش فيها "الجو الأوفر" اللى شباب كتير مصممين يرسموه في دماغى.. يعنى أنا بأمانة ربنا عمرى ما رححت هناك وشفيت واحدة بتتعلق لا سمح الله، أو عالأقل بالطريقة المستمرة والزيادة اللى الناس بتتكلم عنها، يمكن هم لما يبتزلوا يبقوا نازلين مخصوص عشان كدا، فبالتالى كل اللى يبشوفوه هو قلة الادب ويس.

دكتور ابراهيم الفقى - الله يرحمه - كان يقول مرة إن الانسان لما يحبط حاجة في دماغه ويتزل يدور عليها، يبشوف الحاجة دى في كل حاجة يقابلها، لأن العقل البشرى بيركز ساعتها على طلبك انت بس، فبيتها لك أن كل البنات اللى موجودين في جامعة الدول صبيح ومستنيين عربية تلمهم، بالنسبة لى جامعة الدول عبارة عن مكان خروج وأى خروجة دلوقتى لا تخلو من أكل، فلما بتأزل جامعة الدول أنا وصحابى يبقى هدفنا الأساسى القعدة اللى هناك فيها الأول وبالتالي مطاعم كتير بتظهر لنا.. ده طبعاً مش لأنهم بيزيدوا، انما لأن دماغنا موجهة لهدف واحد وانها تدور على حاجة واحدة. لكن احنا في مصر ما شاء الله علينا أسهل حاجة عندنا نطلع أسامى على أى حد وأى حاجة، ونطلع سمعة لمجرد اننا سمعناها من حد تانى، قد يكون مخه خربان أو سقط عنه القلم ولا يؤخذ برأيه، فمش أى حاجة تسمعها تربط بيها.

الشبراوى يقدر يدبر نفسه بأى مبلغ. مش الخروجة هى اللى بتحط شروطها علينا، لا احنا المتحكمين دايمًا. بنخرج خروجات نظيفة جدا، وخروجات "قرديعى" حيتين، كله جايزه المهم اننا نقضى الوقت مع بعض ومانحسش بالنهم للحظة على أى مكان رحناه مهما كان غالى قوي واتعورنا في تمنه، أو رخيص قوي

واتسمنا في أكله.. المهم ان كل مكان بنروحه بناخذ منه تذكار، وينسب فيه تذكار.

نظرية "التطبيق"

ايوه.. نظرية "التطبيق" .. ايه الغريب فيها مش فاهم؟؟!!.. انا اتعودت دايمًا ان أى حاجة فى الدنيا مبنية على العلم، أى حاجة حتى انى مش مقتنع ان فيه حاجة اسمها "سحر". مش معنى كذا انى مش بأمن بالسحر لأ طبعًا لأنه ذكر فى القرآن؛ لكن قصدى ان حتى السحر عبارة عن علم وعلم جبار كمان.. واحد صاحبي فى مرة سألنى واحنا فى سنة تانية جامعة" هو انت تقدر تحط قانون للعلاقات ما بين الراجل والسنة؟؟" قلته لأ وضح أكثر لو سمحت.. قال لى يعنى لو واحد عايز يخلى واحدة تعجب بيه وهى مش معبراه ويتديله على عينه، تفتكر العلم ممكن ينفع فى الحالات ديه؟؟.. بصراحة سؤاله كان تحدى بالنسبة لى (وأنا بحب التحدى) بما انى مؤمن بمبدأ ان العلم أساس كل شىء، قررت انى اثبت له دا بتجربة بسيطة.. بس اشتربت عليه انه اول ما التجربة تخلص، ينسى انى اكمل عشان بنات الناس مش لعبة. التجربة بمتتهى البساطة هى نظرية فى الاقتصاد كانت السبب فى تغيير مسار المبيعات لبضائع كثير فى العالم كله.. على فكرة أى واحد ساذج أو قليل الفهم بمبادئ الاقتصاد هيفتكر ان الاقتصاد = فلوس وبضايح بس.. غلط تمامًا لأن الاقتصاد علم إنتاج سلعة وتوزيعها وبيعها "حتى لو كانت السلعة بايرة" انت اللى متحكم بتبيع ايسه وتشتري ايسه وبالسعر اللى انت تحدده، لأن فى الأول والآخر

دى سلعة و انت اللي طرحتها فى السوق يبقى انت المتحكم.

التطبيق العملى: صاحبي ده كان بيحب زميلة له، لكن المنافسين عليها كانوا كثير (كتيسر قوى) وده اللي كان دايمًا مقلل منه انه بيحط نفسه فى مقارنة مع اللي حواليه. البنت ديه - زى أى بنت بالمواصفات ديه- دايمًا حواليتها شلة بنات بينموا ويجيوا فى سيرة الناس (عادي يعنى زى كل البنات) فقلت له اسمع يابن الناس هتفترض (وده مجرد افتراض) ان البنت ديه وصاحباتها عبارة عن سلع، لو انت عندك سلعة غالية قوي وعايز ترخصها تعمل ايه؟؟ قال لى انزل فى سعر السلع اللي حواليتها فى الناس تشتريها وتسيبها هي لوحدها فترخص. قلت له غلط إذا كانت أصلاً البضايح الثانية تعبانة!!! .. قال لى امال ايه غلب حمارى.. قلت له هقول لك الحل بتاع النظرية وبعدها هقول لك الحل بتاعى (الحل اللي كنت أنا لو مكانك هاتبه).

الحل بتاع النظرية: انك مش اترخص تمن البضايح اللي حوالين المنتج ولا هتقللها، كل اللي عليك انك تزود الدعاية والإعلانات اللي على المنتجات الثانية.. تعرف الناس عليهم اكر وتوريهم انه قد ايه المنتجات ديه قد ايه كفاءة وكويسة زيتها زى المنتج اللي عاملين عليه دوشة ده.. يعنى من الآخر البنت اللي بتلاقيها محط أنظار أولاد كثير ورغم انها حواليتها بنات كثير قوي وممكن يكونوا أحلى منها بكثير كمان لكن هي ديه قوة الدعاية. الدعاية اللي احنا للاسف بقينا ننساق وراها ولمجرد ان مجموعة من الشباب التبعان قرروا ان البنت ديه هي الملكة (نظرا لأنهم عندهم فراغ عاطفى ولما يبلاقوا معاملة كويسة منها يفتكروا انها معاملة "خاصة") فخلاص الكلام بيكثر والدعاية كمان بتكثر.. بالتالى لو عايز البنت ديه فعلا تحس انك مختلف أو على الأقل تبصلك، يبقى كل اللي عليك تعمله "انك تبطل توافقها

الرأى في كل حاجة بتقولها زى العبيط وتعاملها زيها زى صاحباتها بالظبط، مهو
 تتعاملها احسن منهم ليه طالما كده كده كلهم نفس البضاعة، على الأقل ساعتها
 تتعاملها كبنى ادمه عاديه مش هتبقى منافق (ده مش كلامى أنا ده كلام النظرية).

رأى الشخصى: النظرية ديه اقتصاديا ممتازة وليها نتائج هائلة.. وممكن فى
 الحقيقة تجيب برضه نتائج مبهره (ماهو كل حاجة فى حياتنا بقت تجارة)، بس
 مااعتقدشى ان فى دين فى الدنيا يقبل انك تعامل الست زيها زى البضاعة لأن دي
 حاجة مفززة.. مافيش دين فى كل الأديان إلا وكرم المرأة - الامثلة كتيرة لا داعى
 لذكراها- لكن أنا برضه لسه صاحبى كان فى مشكلة وكان لازم أساعده (لأن ده
 تحدى من أجل العلم ههههه).. كانت أحسن طريقة أساعده بيها هى اتى أقول له
 الحقيقة فى وشه، ان المشكلة من الأول كانت فيه هو!!! ببساطة أى ست فى الدنيا
 مش محتاجة انك تنتظط ولا تتحول ولا تفرش لها الأرض ورد ولا انك تكون أغنى
 بنى آدم ولا انك تبقى تركى لأن أصلا الستات مش عارفين هم عايزين ايه!! فما
 توهمشى نفسك انك هتعرف تقرأ أفكارهم لأن لو كان فى حد قدر يعمل كدا..
 أوعدك انه كان أخذ جايزة نوبل.

الملخص: عشان تخلى أى ست فى الدنيا تنجذب ليك (أى ست) لازم
 تكسب احترامها. زى ما الرجل بينجذب للست الجميلة (لأن ديه طبيعة فينا ومش
 هتتغير عشان احنا بنشوف بعيننا الأول، وده من رحمة ربنا انه اختصكم بالجمال)
 الستات بينجذبوا ل "عقلية الرجل" وطريقته فى القيادة وحل المشاكل (القيادة مش
 السواعة) لأن ساعتها هتحس بالأمان وأنها فعلا مسؤولة من حد هيساندها ويحافظ
 عليها. لكن للأسف اللى بيحصل كل مرة كالتالى:

انت بتشوف بنت حلوة، عسولة أو بتعجبك عامة (و طبعاً انت بتبقى على شعرة)

كل اللي بتعمله ويمتهى الصراحة انك "تبيع نفسك" .. اه بتبيع نفسك! .. لأنك بتحاول
تعمل كل حاجة عشان تلفت انتباهها وتقولها "أنا هنا، انت شايفاني؟؟؟"، أنا معجب بيكي
وتفضل تبيع تبيع لحد ما تمنك يبقى أقل من تمن اللبان السمارة وبرضه آآآآآآ آآآ آآآ آآآ
لو عبرتك، لأنك بقيت رخيص، وماتفكرشى ان الستات اغيا عشان مايلاحظوش اذا كان
فى حد مهتم بيهم ولا لأ.. مايفش حاجة اسمها ست غيبة.. انت بالظبط عملت زى واحد
مليونير داخل حفلة كبيرة وطبعاً لابس بدلة شيك جداً وراكب عربية عالية قوي وحافظ
كولونيا عالية قوي ويقول للناس "بصوا عليّ شوفونى.. انا غنى، أنا لابس بدلة شيك انتم
مش شايفينى ليه؟؟؟" وكأنك بالضبط عارف انك من غير الأبهة دي ولا حاجة!! وعازيها
تحترمك؟؟؟ .. من الآخر اوعى تحط نفسك مكان البايع.. خليك دايماً المشتري انت
اللى تقولها: انتى اللى عندك ايه يخلينى اتشدلك؟؟؟ " .. وللبينات برضه، اوعى تبيعى
نفسك (انت اكرم من كده) وساعتها لو لقيت واحد هو كمان مشتري ومايبعشى نفسه
لأى مشتري.. ساعتها بس هتنطبق عليكم الآية اللى بتقول: (الطيبون للطيبات).. صدق
الله العظيم.

ميكروباص "عبود- موقف العاشر"

يقولوا دائما ان السواق أخلاقه من أخلاق "الحاجة اللي راكبها" .. يعني سواقين التاكسي والسواق الخاص ببيقوا أنصف فنة لأن عربياتهم لازم يخافوا عليها عشان عربيات ملاكى، والخبطة فيها بتفرق. لو أتوييس نقل عام أو سواق عربية نقل (تريلله) دول بيسوقوا وحش كاسر فلازم يكونوا مسيطرين، وبالتالي رخصة درجة أولى، فشاييف كل اللي حواليه سواقين "أى كلام" .. ناهيك بقى عن انهم بيسوقوا كتلة كبيرة من الحديد تخليه يفوت في الحديد، بالتالى ايه اللي هيخليهم يبصوا على اللي وراهم أو حتى يبصوا في المرآة؟ .. انت اللي تظبط نفسك عليهم طبعاً!

الميكروباص زيه زيههم بالضبط، عبارة عن صفيحة معدن بيسوقها "عرجى" ولا مضطر انه ياخذ باله منها لتخبط ولا حتى يحط في دماغه مشكلة بتزين (ده لأنه مايبحطهاش بتزين .. يبفظلها زباله وبعدين يتحجج بأسعار البتزين الغالية). حد فيكم سأل نفسه الميكروباص الأزرق في أبيض "المشهور" بيتصنع ازاي؟؟ أنا أقولك .. بيقى بالضبط عبارة عن صفيحتين أو كذا صفيحة "حديد صاج" يتلحموا مع بعض وكام كتبة يتحطوا جوا و"سى دى رووم" لزوم الهشكة والأغانى .. بالهورى عالزمن .. خلاص التكنولوجيا مقطعة بعضها فراحوا قلبوا السى دى رووم "كاسيت" .. ديه كل مكونات الميكروباص الأزرق في أبيض الأسطورة، ولو حد فيكم لاحظ هيلاقى مكان اللحام بين الحديد باين.

مع ذلك هايفضل الميكروباص وسيلة مهمة جدا في حياتنا .. أنا عارفه ان فى

ناس عمرها ما جريت ولا هتجرب تركبه، بس الحقيقة أي شاب ما عندوش عربية أو لحد ما جاب عربية (زي مثلا) هيوافنى الراى. في حالتى أنا كان الميكروباص مهم لما كنت بفوت باص الجامعة الصبح، احنا جامعتنا على طريق مصر الصحراوى.. يعنى لو الباص فات يبقى ماقداميش غير حل من أربعة.. إما انى اروح بتاكسى (وفى الحالة ديه المشوار هياخد ما لا يقل عن ٤٥ جنيه بما انى قاعد في شبرا) أو انى اروح مع واحد صاحبى (وده مش حل عملى لانى ما بحبش أنقل على حد) أو انى أفكس وأربح اليوم ده ومجاتشى من يوم (ويستنى من ذلك أيام الامتحانات طبعا) أو الحل الأكثر شيوعا.. الميكروباص. الميكروباص ممكن أركبه من أول المشوار لحد ما أوصل الجامعة، أو انى أركب أى مرافلة لموقف العاشر ويرضه من موقف العاشر للجامعة هاركب ميكروباص.. يعنى من الآخر "لا مفر"!!

على ذكر موقف العاشر.. فى ناس فاكدة ان ده مجرد موقف عربيات بيوصل "من" و"إلى" فقط لا غير، لكن فى الحقيقة موقف العاشر أكبر من كذا بكتير.. موقف العاشر حياة. الميكروباصات اللى بتكلم عنها في موقف العاشر غير الميكروباصات "الأبيض في أزرق" اللى بنشوفها في الشوارع.. ميكروباصات موقف العاشر بتبقى "سياحى" أو انضف من العادى يعنى (تويوتا).. فى الموقف كل حاجة بنظام، العربيات تتملى بنظام، ما فيش حاجة اسمها عربيتين يتملوا في نفس الوقت لنفس المكان.. لما الأولى تكمل، الثانية تبدأ تحمل.. "الكارثة"، هي زى بطاقة خروج الميكروباص من المكان وما ينفعشى عربية تخرج إلا اما تدفع ويتم عليها، ودايما في كبير للموقف اللى لما بتحصل مشكلة بيبقى هو الأمر الناهى وكلمته سيف على رقبة السواقين.. هو اللى يقول مين يحمل ومين يستنى. الموقف ده زى ما قلنا "حياة".. حياة ناس كتير بتشتغل وتسترزق وفاتحة بيوت، رغم انهم

في نظر الناس اللي بتعدى عالموقف ده وهى ماشية بعرياتها "شوية همج وبلطجية وجهلة" محتلين المكان وعاملين زحمة، مع انك لو ركزت شوية هتلاقي ان الناس ديه على الرغم من بساطتهم إلا انهم عملوا مجتمع منفصل.. بيصحوا فيه كل يوم الصبح بدرى عشان يلحقوا اليوم من أوله، اللي يفرش فرشته واللى يجهز عربية الفول والطعمية وعربية الكبده واللى تلحق تعمل الفطير المشلتت والجبنة القريش واللى بيع بيصنع مصنوعات جلدية واللى عامل "قهوة متحركة" يعمل شاي وقهوة وحاجات ساقعة واللى واللى واللى..

إذا موقف العاشر نظام بيتي متكامل وناجح جدا، على الرغم من أنه متدنى المستوى، إلا أن الناس بتتجاوب معا، وتتشرى حاجات وتفتخر الصبح منه وتركب مواصلاتها منه برضه. ده إن دل على حاجة فهي ان الشعب المصرى يقدر يعيش في أسوأ ظروف ويرضه هاتلاقيه يضحك ويتتج.. شعب، رغم جهل معظمه، إلا ان الجهلة دول عندهم القدرة انهم بيتكروا كل فترة طريقة يقدرؤا يكسبوا منها أكل عيشهم، الجاهل اللي انت شايفه "جاهل" هو فى الحقيقة يعرف يستعمل عقله يمكن أحسن منك. لما شاف ان فى موقف ميكروباصات وفى ناس بتركب ورايحه جاية فشغل دماغه وفكر ان الناس ديه محتاجة تاكل وتفتخر الصبح فعمل عربية فول بسيطة، واللى عايز يظبط دماغه بكوباية شاي شمسية عالطاير فعمل له قعدة وكام كوباية ويأقل التكاليف عمل مشروع تجارى ناجح (وأكبر دليل انه بيحبب له فلوس). واللى بيعبيع متاديل وأزايز كولونيا ولبان وحلويات وحاجة ساقعة.. اللي عايز أقوله إن النظام أساس الحياة، سواء بقى نظام "هاى كلاس" أو نظام على قد الحال، هينفضل النظام نظام.. ماتحاسبشى الناس ديه على وجودهم فى المكان ده وانهم عاملين زحمة وقلق، لما تيجى تحاسب حاسب الناس اللي بتتشرى منهم، الناس

اللى بنشترى ديه هي اللي خليه بيبيع تاني وتالت ورابع لأن ببساطة أسهل له انه يفطر الصبح من عربية في الموقف ويوفر وقت عشان يلحق شغله على انه يقف في طابور في المحل اللي تحت بيتهم ويتأخر عن شغله.. أنا شخصيا بحترم الشخص اللي كدا على أنه يجيب فطاره ويفطر في الشغل ويشرب شاي ويفضل معطل شغله ساعة أو ساعة ونص وفي الآخر يقول لك "أنا بافطر.. ايه ما انطرشي؟؟". ليه دائما بتتريق عالناس اللي بتفطر في الشارع في طريقه لشغله وكأنه عمل جريمة.. مع ان في أمريكا وفي كل مكان بره اللي مايلحقش يفطر في بيتهم يجيب ساندوتشات "هوت دوج" أو أى حاجة وياكلها وهو ماشى، ليه نعتير ده واحد جاد في عمله ومايضيعش وقت واللى بيعمل كدا عندنا يبقى "بيته"!!!

دايما الميكروباص مقترن بكلمة "قلة أدب وسفالة"، وان أى سواق ميكروباص لازم يكون قليل الأدب وزبالة عشان يعرف ياخذ حقه بدراعه. لما تتكلم مع سواقين هيئة نقل عام أو مينى باص أو سواقين تاكسى، هتلاقى ان كلهم مشتركين في نفس المبدأ اللي بيقول: "سواقين الميكروباصات دول أزيل وأوسخ فئة". لما سواق جديد يبدأ يسوق ميكروباص حتى لو كان محترم هتلاقى انه دايما سمعة المهنة بتلزق فيه لدرجة انه بيلاقى نفسه عمل حاجة من اتنين، يا اما انه "تطيع" بطبع الفئة اللي حوالية وبقي زبهم وبيشتم بألفاظهم وياخذ حقه بدراعه، يا اما بيسيب الشغلانه كلها ويشوف له أى حاجة تانية يعملها لأنه مايقدرش يعيش وسط القذارة ديه وانه عنده مبدأ ورافض يتخلى عنه.. لو ربنا كرم أختينا ده، هيشترى عربية تاكسى ويشغل عليه باحترامه.

الخلاصة: لو عايز تبقى ناجح في حياتك بجد.. ماتفكرش في وسيلة المواصلات اللي هتركبها عشان تروح مكان، قد ما لازم تفكر في المكان اللي انت

رايحه، في الأول والآخر دى وسيلة مواصلات والمهم انك توصل لأن ده الأهم.
الحياة غصب عنك هتجربك انك تتركب ميكروباص أو أى وسيلة نقل رخيصة، مش
غلامسة وخلاص، بس الدنيا طول عمرها كدا، دوام الحال من المحال فماتوقعش
انك هتفضل طول عمرك تتركب عربية أو تاكسى لأنك هيجى عليك يوم وهتضطر
تجرب حاجة جديدة (حاجة رخيصة) والعكس صحيح برضه لأن عمرك ما هتفضل
مقضيها مواصلات.. أكيد هيجى اليوم اللى هتركب فيه عربية ملاكى. اعتبر كل
وسيلة مواصلات تركيبها في حياتك "مغامرة" مغامرة جديدة، ودايما جرب أكثر من
مغامرة عشان سيدنا عمر - رضى الله عنه - قال: "أخشوشنوا.. فإن النعمة لا تدوم"
ولما تكون شاب وتجرب كل حاجة، أحسن بكثير من انك تجرب على كبير.. وخليك
فاكر دايما، مش مهم بتركب ايه وانت رايح شغلك، بيتك، خروجاتك، أو أى مكان..
المهم انت رايح تعمل ايه!!! لأن فى الأول والآخر ديه مجرد وسيلة.. مش غاية.

نقطة خلاف: ايه دايمًا الدحيحة دمهم "يلطش"

أكيد كلنا عدى علينا المثل ده، الولد أو البنت اللي دايمًا "بيقفل" الدرجات ويتلاقيه في حاله واجتماعيا صفر، مايعرفشى يهزر أو يبقى دمه خفيف.. والأهم من ده كله، ان دايمًا الناس (زمايله يعنى) شايفين انه "غبي" أو بمعنى أصح: بيحفظ لكن مايفهمشى. اللي خلانى أتكلم عن الموضوع ده هو انى يمتهى البساطة كنت هذا الشخص، من ثانوية عامة لحد سنة تالته جامعة. كنت بالملى نفس الشخص الفقيع المقفل اللي حياته كلها بتتمحور حوالين "أزاي يجيب درجات"، "هيخلص المنهج في قد ايه" والسؤال الأهم "هاخلصه كام مرة!!". الدحيحة مجتمع وفكر موجود من زمان في كل جيل، جيل والدى والدك، جدى وجدك.. وفي جيلنا طبعًا، لكن ايه اللي بيخلينا نعزلهم عن المجتمع وكأنهم "كائنات فضائية" واه اللي بيخلينا نعاملهم على انهم مختلفين وكان الدح ده "إعاقة" أو مرض.. تشوف واحد دحيج معدى جنبك انت وصحابك تلاقى واحد يقولك مالكش دعوة بيه يا عم ابعده عنه ده دحيج.. وماتعرفوش ولا يبقى حبييك إلا أما يصورك ورق أو يوصلك معاه بعيته أو أو.. ليه دايمًا الدحيحة في كل المجتمعات (مش بس العربية على فكرة) بيعاملوا كأنهم مايفهموش أى حاجة في حياتهم غير اللي في الكتاب وعلى أساسه بيتهموا بالغباء، مع إن كل ذنبهم انهم عايزين يرضوا أهاليهم ويعرفوهم قد ايه هم بيتعبوا عشان يفتخروا بيهم وانهم مهما كانت نظرة الغير ليهم.. فعلى الأقل بيعملوا

اللى عليهم ويذاكروا.

يمكن حد منكم يسأل: هو أنا ليه شاغل نفسى بالموضوع ده أو ليه هتكلم فيه ونديله أهميته؟.. الاجابة: لأنى كنت دحيح في فترة من فترات حياتى واكتشفت انه شتان بين انك تكون ناجح في حياتك وأنك تكون دحيح.. وهأوضح الأسباب الأكيدة لده، عشان ماحدث يقع في نفس الدوامه ديه تانى.

الدحيح:

الدحيح شخصية مذبذبة بين العبرى والشاطر. المجتمع بيعتيره عبقرى لأنه بيحقق نجاح في المدرسة أو الكلية وأنه عارف كل حاجة عن المنهج (ده من وجهة نظرهم هم طبعاً) والمدرسين بيعتروه "شاطر" لأنه بيحقق أهدافه (اللى هي طبعاً تحصيل درجات عالية). لكن في الحقيقة الدحيح ولا واحد في دول.. لأنه كل اللى بيحققه أنه يجيب درجات عالية من غير ما يتعلم. عشان تتعلم بحق وحقيقى لازم تغير الطريقة اللى بتستقبل بيها المعلومات كل مرة، لأن مش كل حاجة هتتعلمها زى الثانية.. لكن اللى بيحصل من الدحيحة انهم بيتبعوا مبدأ "اللى تغلب به.. العب به"، ييلجأوا لنفس الطريقة القديمة في المذاكرة وهي "المذاكرة بالكتابة"، انهم بيسمّعوا كل حاجة (كل حاجة) بالكتابة، زى الأطفال الصغيرين اللى لسه بيتعلموا أشكال الحروف والكلمات.. مع إن الطريقة بتضيع وقت كتير قوي منهم، وقت ممكن نستفيد منه في حياتك في مجالات تانية، إلا انهم يفضلوا يتعبوا ويجوا على نفسهم ويتبعوا الطريقة المضمونة على انهم يجربوا طرق جديدة. (مممكن تكون أحسن بكتير ليهم).. بس كل ده مش مهم طبعاً لأنه في الآخر هدفه تحصيل الدرجات وليس العلم إطلافاً.

من الآخر.. مشكلة الدحيح انه بيخاف، بيخاف يخرج من البوتقة اللى هو فيها.. بيخاف يغير طريقة مذاكرته لأنه طالما كدا كدا شايف انه يجيب درجات، ايه اللى هيخليه يهتم.. أكبر دليل على كدا أنه لو في كلية عملية يبقى شغله اليدوى

”سىء جدا“ لأنه مصمم يعامله بنفس أسلوب النظري، (مصمم يحفظه). على فكرة أنا كنت كذا لحد سنة تالته جامعة، لحد ما الموضوع وسع قوى، والمناهج قلت متنا، وساعتها كان لازم أغير طريقة مذاكرتى.. لأنى لو فضلت بالطريقة ديه يبقى ولا هاعيش حياتى ولا حتى هانجح. اكتشفت ان الفكرة كلها مش فى ”هتذاكر كام ساعة“ قد ما هى ”هتذاكر قد ايه وازاى“ فى الساعة الواحدة. دلوقتى فيه جوجل ويوتيوب وحلول كثيرة تقدر تجيب منها المعلومة أكثر من زمان، ليه تحصر نفسك فى طريقة مذاكرة واحدة إلا اذا كنت مش ناوى تتعلم أصلا وكل هدفك انك تنجز وتعدى أم السنة على خير ودرجاتك مضمونة وكله تمام.. الحياة فيها حاجات كثيرة قوي أهم انك تجربها.. وكل ده انت بتضيعه بحجة انك بتذاكر وتتعلم ويتدى كل حاجة وقتها، ولكن يا عزيزى القارىء انت كده ”بتهلك نفسك عالفوضى“. لو عايز تتعلم بحق وحقيقى، بطل تبقى دحيح.. بطل تحفظ وتحشى دماغك بأى زبالة وخلاص.. بطل الطريقة القديمة فى المذاكرة (المذاكرة بالكتابة).. استعمل دماغك صح وبطل تركنها لأنك خايف تستعملها لا تفشل، ما تخافشى.. مش هتفشل بالعكس هتبقى أحسن وساعتها هتوفر وقت كثير ومنتجج ومنتعلم ومنتعيش حياتك. أنا مابأقول لكش الكلام ده من فراغ، لأنى جريت ده على نفسى.. والحمد لله اتخرجت بتقدير جيد جدا وعملت نشاطات كثيرة جدا فى حياتى.. اوعى تخاف تتعلم.

سبب تانى مهم جدا من الأسباب اللى بتصنع الكائن الدحيح.. ”الأهل“. فيه نوعية من الأهل ”بتضعف“ على ولادها عشان يذاكروا ويستعملوا معاهم أساليب نفسية سيئة ظنا منهم انهم كذا بيخدموهم.. لو انت فى جامعة خاصة مثلا (زى) فى ناس بيكرروا الكلمة دى دايمًا لولادهم: ”انت داخل جامعة خاصة“ ”دى جامعة بفلوس“.. ”خلى عندك دم وذاكر“.. المصيبة بقى مش فى أن أبوك وأمك هما اللى

بفلولوك كده (لأن دي بقت نادرة برضه دلوقتى إلا إذا كنت انت مستهتر وماعندكشى هم فعلا).. لكن ان ناس تانية من عيلتك أو جيرانك أو أصحابك أو معارفك هما اللي يفضلوا يزونا عليك، ويقولولك ذاااa

لو عرف الدرجات بتاعة الميد تيرم هينفخنى" (مع انه ناقص درجة أو اثنين)!!!
الدحيحة زيه زى أى نوع بنى آدمين فيه منهم الكويس والوحش (بصرف النظر ان الاثنين دهمهم ثقيل) ولكن فى منهم الطيب والشيرير. الطيب ده بيبقى خدوم جدا، بيبصو ورق للكل وأى حد عايز شرح أو توضيح لمادة، بيبقى دايمًا هو اللي بيعرض عليه المساعدة الأول من غير ما يطلب. فى الغالب بيبقى أصحاب كويسين واللى فى قلبه على لسانه، هو المخ فى أى شلة بيبقى معاها، وأخيرا يبطلق عليه ألقاب زى "سلاح التلميذ"، "الموس"، "برشامة" أو "سعيد ملزمة" .. الخ.
النوع التانى "الدحيح السو" .. ده النوع اللى بيتيج لما تخلط دحيح + بنى آدم سو. بيبقى أنانى وزيالة، ياخذ منك اللي هو عايزه، لكن لو راجل تلتقط منه أى معلومة.. همرك ما تلاقية مع شلة أو بيشتغل فى فريق أبدا، بيقتل لو شغل لو حده عشان الفايده كلها تبقى ليه هو لو حده، للأسف النوع ده هو اللي بيسوء سمعة الدحيحة.

فى النهاية الدحيحة دول بنى آدمين زينا، يحسوا ويشعروا ويزعلوا وعندهم أحلام عايزين يحققوها زيك بالضبط.. لكن بيمنعهم خوفهم من انهم يجربوا طريقة جديدة فى التعليم أحسن يفضلوا.. فيفضلوا متبعين نفس الأسلوب القديم، "حش

المعلومات". لكن ديه مش شطارة ولا عبقرية.. انك تضيع حياتك كلها في إطار "تحصيل الدرجات"، انك تضيع عمرك كله قبل ما تعرف انت تقدر تعمل ايه و قدراتك اللي رينا اداها لك ايه، انك تبقى سجين عن كل اللي حواليك لمجرد انك خايف تتعلم بجد لا يقولوا عليك بتضيع وقتك أو بتستهتر أو بتتججج عشان ماتذاكرشى ٢٤ ساعة في ال ٢٤ ساعة.. يا عزيزي الحل هو "الكيف" وليس "الكم"، فكر في الطريقة اللي تخليك تفهم وتمتص أكبر قدر من المعلومات في ساعة.. مش انك تفكر تذاكر كام ساعة في اليوم عشان تبقى راضى عن نفسك أو ترضى الناس، وبالمناسبة.. محروووقه الناس عاللى يحسبك انك أقل من غيرك ومابتعملشى اللي عليك.. لأن نفس الناس ديه لما تسمع كلامها وتفشل بسببه أو تتعقد، هيقولوك ببساطة: "حد ضريك على ايدك؟؟!"..

الجميلة والصرصار

من المناظر اللي الحقيقة لاحظت انها بتكرر في أي جامعة (أو أي مكان)، بس حلينا ناخذ الجامعة كمثال شمولى أكثر، منظر فى الواقع "تقشعر له الأبدان"، منظر مستفز يحرق دم أى ولد (و بنت) هو انك تشوف بنت أمور جدا، بنت ناس، مهذبة، لطيفة، دمها خفيف، ستايل، وعد الصفات الجميلة للسنة الجاية.. ماشيا مع واحد (صرصار)!!!.. انا مش قصدى خالص اتى أستهزأ بيه أو أعمله مدعاه للسخرية، انما أنا باتريق على اللي هو عامله في نفسه (ودى مش خلقة رينا)، بتلاقبه دايمًا مبهدل، معفن، منعكش، مخربش، فاشل دراسيا، "ستتج"، هي اللي بتصرف عليه فى الغالب، والواحد يرجع يقول طيب ما يمكن يكون من جواه كويس.. (أخلاقه زبالة ومحدث طابقه وقليل الأدب)!!!.. والأدهى بقى انه بيديها بالجزمة (بيعاملها معاملة سيئة فعلا) ومع ذلك لسه عندها أمل فيه.. ويبجى السؤال في دماغنا كلنا: "أزاي ديه ماشية مع
"١١٩٩٥"

بصراحة أنا كـ "محمد ناجي" لما بشوف حاجة زى كدا والفضول بيقتلنى زى بقية الناس.. ما بكتفيش بالحيرة وخلاص، فقررت اتى أعمل بحث "ميدانى" أنا وأصدقاه لّي عشان نعرف ايه سبب الظاهرة الغريبة ديه، وايه اللي بيخلى بنت بالمواصفات ديه تفضل متمسكة بواحد بالمواصفات ديه (إلا إذا طلع أخوها فى الآخر(١)). البحث دا للفائدة فقط وليس له أى أغراض أخرى.. بس أصله: "لاالازم نفهم" ونشيل شوية غموض من الموضوع.

الأبحاث التي عملتها كلها أثبتت ان النوع ده من البنات بيحب دايمًا انه يلعب دور "المستكشفة المستتمة" .. بالعامية كده وبصريح العبارة يعنى البنت اللي بتلاقيها كده بتبقى عايزة واحد كدا "مبهدل" أو فيه كل العبر .. حتى لو ماكانشى فيه حاجة واحدة عدلة (وإن كان ده غير صحيح لأنه أى بنى آدم فى الدنيا لازم هيمتاز بميزة) لكن العبرة بأن يبقى فيه مشكلة أو حاجة "غلط" عشان هى اللي تصححها وكأنها "بتستمر" جهودها فيه. فلو كان مثلاً مايعرفشى يلبس كويس أو مش مهتم بشكله الخارجى، بتلاقيها دايمًا بتحاول انها تساعد على ده وتختار له لبس وسنابله، وإن كان مايبشتغلشى بتساعده وتجييله كذا فرصة شغل .. المهم انها بتبقى عايزة تجس انها قد مسؤلية الاهتمام بشخص (وتفرض جدا لما الشخص دا بيطلب منها حاجة تعملها له).

يمكن دا اللي بيفسر انها ليه بتستحمل منه معاملة وحشة على المدى البعيد أو طريقته فى الكلام اللي ممكن تخرجها قدام الناس .. انها بتستمر جهودها فيه عشان تستحقه "بجدارة" بعد كدا لما يبقى من نصيها. البنت اللي من النوع دا بيبقى عندها اصرار وعزيمة لا يستهان بيهم عشان تفضل تحاول وتحاول لحد ما الشخص "المبهدل" ده يبقى بنى آدم كويس، وده لأنها مقتنعة بمبدأ "وراء كل رجل عظيم .. امرأة"، وبتفضل وراه لحد ما تغيره أو تغير جزء من شخصيته، مع العلم ان كل ما كانت حالته أو مشاكله كبيرة .. كل ما الوقت اللي هى هتاخده معاه هيبقى أطول، وده طبعا هيجللى فى "رابطة" أقوى ما بينهم وهيقوى العلاقة أكثر مما تتخيلوا .. عشان كدا لما أى حد ييشوف الثائى ده بيستغرب لزاى هى مستحملها، ولكن الحقيقة هى ان الاتنين "مايقدروش يعيشوا من غير بعض" لأن كل واحد فيهم لقى اللي عايزه فى الثانى.

أكيد البنت دى زيهازى أى بنى آدم هتزهق وليها قدرة تحمل (حتى وإن كانت عالية) إلا انها برضه ليه نهاية .. فلو الشخص اللي بتجبه ده "المبهدل" أظهر تقدم فى حالته أو

بدأ يبقى فعلا بنى آدم مختلف، ده شيء كويس.. لكن لو حاولت معاه كل حاجة وهو لسه متمسك بشخصيته السيئة.. فى الحالة ديه هي لا يمكن ترجع له لأن النوع ده من البنات (أو الستات عامة) ممتازة في كل حاجة وست بيت هابلة وإنسانة رائعة، انما لو سابك يبقى اعرف انك شخص "تافه" أو عديم المسؤولية بالمرّة لأن مافيش حد هيفضل صابر عليك كل ده عشان يغيرك أو يخليك أحسن ولما ما يلاقيش منك فايده هيرجعك تانى... انسى.

البت اللى من النوع ده بتتميز بكذا ميزة.. أولها زى ما قلنا الإصرار والعزيمة، واقتناعها التام انها لازم تستحق الرجل اللى هترتبط بيه، فلازم تعب عشان تحوله وتخليه شخص ناجح أو مفيد وبالتالى العلاقة بينهم هتبقى أقوى عالمدى البعيد وفيه بينهم ذكريات. دايمًا البنت ديه بتبقى تعاملاتها مع الولاد محدودة (صباح الخير صباح النور) على قد السؤال على قد الجواب.. ده لأنها بتبحث عن رجل واحد فقط وما يهمهاش غيره وطالما لاقته يبقى هتستثمر كل جهودها فيه.. من الآخر بتجهزه عشان يبقى زوج المستقبل.

الحياه الرقمية: على الشات أو الفيس بوك أو اي شبكة تواصلية هتلاقيها دايمًا ما بتعملشى إضافة لـ "ولاد" أو لو هتعمل بيبقى في حدود الـ "زمالة" وحتى لما حد بيكتب لها تعليقات على صور أى حاجة، هي بترد عليه بأدب أو على قد الكلام من غير أى مغالاه فى الرد. فى منهم حتى ما يعملى إضافة لولاد إلا الأقارب..

المغزى من الموضوع انها مركزة هدفها على واحد بس (بعكس النوع الـ "لعوب".. اللى ييبقى عامل زى شبكة أو "قائمة" لكل الولاد ويبتنافسوا في مين يجيب عدد أكبر.. وديه هاتكلم عنها بالتفصيل بعدين).

البت اللى من النوع ده بتعتبر "الزوجة المثالية".. هو يعنى مين فينا يكره انه يلاقى حد يستحمله ويستحمل غلطاته وزلاته وتعبه في أسوأ حالاته، ما هو لازم

طبعاً تبقى الزوجة المثالية. بتهم بنفسها جداً وفي الغالب بتبقى بنت ناس و"راقية" ومتحمسة دايماً انها تجرب معاك أى حاجة جديدة (بشرط ان الحاجة ديه تخليك بنى آدم أحسن.. مش أى حاجة وخلاص). البنت اللي من النوع ده بتعامل الشخص المبهدل "الصرصار" اللي هى بتحبه على انه "ابنها" وهى اللي بتختار له لبسه وستايله والكرتونيا اللي بيحفظها كمان.. بالرغم من ان فيه رجاله بتتخنى من الجوده وانهم بيعتبروا ان ده نوع من التقييد أو "الخنقة"، إلا انه بيعرف قيمتها لما العلاقة بتبوظ ويروح لواحدة تانية مايتحاولشى تشاركه في أى حاجة وبتتصحج بأنها ساياه على راحته.. مع إنها بتشتري دماغها وخلاص.

بعد كل ده أظن ان أى حد فيكم لما يشوف الثنائي ده في أى مكان ما يستغريش.. ولو فضل يدور على معلومات عن شخصية الولد والبنت دول.. أنا متأكد انه هيلاقى نفس المعلومات ديه.. سواء من أصحابهم أو حتى لو تعامل شخصى معاهم. عموماً يا بخته اللي هيقى "صرصار" إذا كان المقابل انه يلاقى واحدة زى الـ "جميلة" اللي بتتكلم عنها هنا تهتم بيه وتحافظ عليه، وتبقى مركزة كل جهودها عليه هو بس.. يا بخته. لو انت كنت من نوع الولاد ده ولاقيت واحدة بالمواصفات ديه، نصيحة (نصيحة شخصية يعنى) "خليك مبهدل زى ما انت" .. حاول تديها فرصة انها تتعب عشائك وتثبت لنفسها أنها جديرة بيك، ده هيطول المدة اللي هتتفرق فيها وتعرف طباعك وانت كمان تعرف طباعها.. بس خذ بالك يا حلوه ماتطولشى في الموضوع قوي وتسوق فيها، لأن ماتتناس ان الهدف الرئيسى اللي خلاها مستحتملاك هو انك في يوم من الأيام هتتغير وتبقى بنى آدم أحسن.. فخليك بين البيتين، ولا تتصلح بسرعة لأنك ساعتها هتهنى التحدى بتاعها بدرى قوى.. وهى مش هتحمس انك تحدى بالنسبة لها، ولا تبقى بطيء في التطور وتفضل "فاشل" أو مايتغريشى خالص، لأن في الحالة دى يا "صرصار" ابقى تف على

لو رجعتك تاني.. خد بالك.

أول يوم لو حدى.. (نقطة التحول)

اتكلمت قبل كدا عن فصل من فصول حياتى اللى كنت عايش فيه مع جدتى -
 الله يرحمها- وقد ايه ان الايام ديه كانت مميزة بالنسبة لى واتعلمت فيها حاجات
 كتير جدا (زى أى واحد عاش مع جدته). في سنة تانية جامعة جدتى اتوفت وهنا كان
 لقدامى حل من اتنين.. اما انى أقعد مع عمى أو انى أعيش مع نفسى. عمى ماكانتشى
 مخليلانى عايز أى حاجة وكانت محسانى انها زى ماما بالظبط.. ولاد عمى الثلاثة
 (مفيش بنات) كانوا زيهم زى اخواتى، وعامة أنا باستريح لهم وانا معاهم ولينا
 مغامرتنا مع بعض.. لكن الفكرة انى كنت عايز أعمل حاجات كتير في
 حياتى.. حاجات لازم أعملها لوحدى، وبما اتنا متفقين على مبدأ انى قررت أعيش
 حياتى بكذا طريقة ويكدا مهارة وما اعتمدشى على طب أسنان بس، فكان لازم انى
 استقل بذاتى عشان يبقى عندى مطلق الحرية في اختياراتى وأسلوب حياتى.. فلو
 صح، أبقى أخذت الـ "مجد" كله.. ولو غلظت غلظة أو خسرت حاجة، يبقى برضه
 أنا المسؤول لوحدى.

من هنا بدأ مشوار شقة "شبرا" المجيدة. هى شقة موجودة في شارع شبرا قبل
 "دوران شبرا" وتحديدا جنب جامع الخازندارا. هى عمارة بتاعة جدى أبو أمى وكان
 فيها الشقة الفاضية الوحيدة فيها.. اللى بدأت منها حياتى الفعلية، واكتشفت فيها أنا مين
 وأقدر أعمل ايه بحق وحقيقى.. اكتشفت فيها قدراتى ومواهبى وكان عندى مطلق الحرية

انى انام وأصحى وأروح وآجى براحتى وأعمل اللى أنا عايزه، والأهم من ده كله.. "أتعلم اللى أنا عايزه". انك تعيش لوحدك فديه قصة، لكن انك تعيش لوحدك في مصر.. فديه قصة تانية خالص.

أول ما قعدت في شبرا لوحدى، ما كتتش عارف ان الموضوع مسؤولية كده وان الحكاية مش حكاية "لوجعت هاأطلب أكل من بره" و"العيشة سهلة" وما فيش أى متطلبات للحياه. اكتشفت انك لو اعتمدت على الـ "ديلفرى" فده هيبقى خراب بيوت وجيوب وصحة وكل حاجة، وما اعتقدش ان فيه إنسان "عاقل" هيستحمل الوضع ده (حتى لو كان مش مشكلة فلوس.. انما الأكل من بره مش صحى قوي يعنى).. غير خد عندك بقى مصاريف الكهرباء والميه والغاز ومصاريف ايدك ومتطلباتك كلها، عرفت قد ايه أبويا بيتعب في القرش وعرفت قيمة كل أب وكل قرش بحق ربنا. الموضوع مايقفشى على المصاريف بس، لكن فيه شؤون منزلية برضه لازم تاخذ بالك منها، زى الغسيل والمكوة (ولا دول كمان هتوديهم دراي كلين على طول؟) والتوضيب (ولا هتقول لى هاجيب واحدة توضحب واشترى راحتى بفلوسى؟؟) ولا ولا ولا.. الفكرة انك لو هتدفع فلوس في كل حاجة هتعملها بحجة انك بتشتري دماغك وانت لسه شاب صغير ومحتاج انك تعمل "ضبط ميزانية".. يبقى انت مش هتكمل حياتك يا كبير، لأن ابويا وابوك ياما شربوا المر واتهدلوا لحد ما اتعلموا ان كل قرش تعبوا فيه له ثمن، ولما تيجى تصرف لازم تحسبها برضه (وديه حاجة ماترعلشى).

بالنسبة لموضوع الفلوس ده فكان دائما في نقطة خلاف بينى والدى، وكان أكثر سؤال باتسأله منه: "انت بتصرف فلوسك ديه في ايه؟؟ بتخلصها في ايه؟؟". الفكرة انى ولا باشرب سجائر، ولا عندى عربية (عشان أشيل حمل

بنزين)، ولا باسهريرة البيت كل يوم وعایش حياتی قوي (لأني كنت في عز المذاكرة ومش فاضی)، ولا شيشة ولا أي حاجة بتضیع فلوس وخلاص.. فكان دايمًا أبويا يسألني بصرف فلوسی في ايه، وكنت برد عليه الرد النموذجی: "يا بابا الحاجات بتغلا كل مادا..". لكن الحقيقة ان أنا كنت الأول مش عارف أنظم شوون الفلوس ازای.. فكنت مثلا معتمد الأول عالأكمل من برة، وواحدة واحدة اكتشفت انی كده هيتخرب بيتی وان مافيش حد بيعمل كده في الحقيقة، فكان لازم أحط حد للمهزلة دى و"أتعلم الطبخ".

انك تعيش لوحدك في دى تجربة هائلة، لأنك بتتعلم فيها حاجات عن الدنيا ماحدثها يعلمها لك.. والأهم انك هتتعلم حاجات عن "نفسك" وهتتعرف عليها أكثر، ده لأنك هتشوف انت بتعرف تعمل ايه وأخرك فين من غير ما حد يقيد أفكارك أو يخليك تعيش النمط اللى انت ماينفعشى تعيشه.. النمط اللى بيخليك إنسان عادى (زيهم)، بتروح شغلك، بتاكل وتشرب وتقعده عالقهوة طووووول الأجازة (أو عالكافيه ياسيدى ماتزعلشى، ما هي مافرقنشى) وتنسى ان ربنا خلقك لسبب، ممكن يكون عشان تتعلم وتعلم غيرك، أو تشتغل وتعمل ناس قد تكون مافيش صلة بينك وبينهم غير ان ربنا بيكرمك بشغل أحسن عشانهم. انك تعيش لوحدك دى "حرية مطلقة" اما انك تتعلم من الدنيا وتبقى بنى آدم قوى وناجح وليك شخصيتك.. أو انك تبقى فاشل، متعنتظ، متغطرس، أنانى، وكل شوية بتهم أهللك انهم مقصرين في حقك وبتقول كلام زى: "مش كفاية انى قاعد لوحدى وبعاقر ومستحمل" أو كلام زى "أنا كل أصحابى بيرجعوا البيت يلاقوا الدنيا متروقة والأكل جاهز.. انتو تحمدوا ربنا انى لسه بكافح ومستحمل". ماتستغريوش، في شباب بيفكروا كده.. لا يا حبيبي، ابوك وامك طافحين الكوثة عشانك ومتغربين عشانك، إذا مكانشى

عندك أدنى تحمل للمسئولية يبقى خلاص، سيب التعليم وافتحك مشروع وريح دماغك.. وخليك كده طول عمرك، انتظط من مشروع لمشروع من غير مايكون عندك أساس ولا شهادة.. هي يعني الشهادات عملتتنا ايه.

بمناسبة القعدة لوحدي (و يمكن ده السيناريو اللي بنشوفه أكثر).. تقريبا ما فيش حد من صحايي اللي عايشين مع أهاليهم إلا وقاللى الجملة دي: "يا بن المحظوظة عايش لوحذك وبكيفك وتعمل اللي في نفسك".. هو ايه اللي في نفسى مش فاهم؟؟! وكان القعدة لوحذك هدفها بس المتعة والمسخرة!.. ماجربتش انك تبقى قاعد في بيت طويل عريض لوحذك وتستحمى بالليل مثلا والنور "يقطع" ومفيش صريخة بنى آدم ولا تسمع أى صوت فى الشقة؟؟! طب جريت انك تتعب أو تبقى عيان أو رجلك تتكسر ومفيش حد جنبك أو على ما تتصل بحد يجيلك؟؟! جميل، جريت بقى انك تغسل وتمسح وتكنس وتنشر وتوضب مثلا لأ وتذاكر وتجيب تقدير؟؟!.. بلاش كل ده، جريت ان يبقى عندك تانى يوم امتحان مهم جدا وتبقى ضابط المنبه وهو ده املك الوحيد بعد ربنا طبعاً؟؟ ما فيش حد يصحيك ولا ااااا كأنك هنا؟؟ على المستوى الدينى،

مما لاشك فيه ان قعدتك لوحذك يا هتقربك من ربنا.. يا هتخليك أبعد ما تكون عنه. أصل انت قاعد لوحذك، وليك مطلق الحرية تعمل اللي انت عايزه، يبقى هي مسألة اختيار. القعدة لوحذك ممكن تعلمك ان مهما كان الناس قريبة منك، إلا انك هتلاقى ربنا أقرب ليك.. فلما بتقع في مشكلة، أقرب حد تشتكي له هو "الله".. لما بتتعب، أسرع واحد تدعيه يشفيك هو "الله".. وأمثلة كثيرة جدا، كل ده بيخليك وانت بتصلى تصلى صح (لأنك بتكلم ربنا وأكد هتأدب وانت بتكلمه لما بتبقى عايز منه حاجة) وهتقرأ قرآن صح (لأنك ساعتها بتسمع ربنا.. فهتسمعه باهتمام)..

من الآخر نظرتك للدين هتغير، وهتأكد انه معاملة، مش مجرد انك بتصلي وتصوم وشكرا. من ناحية ثانية بقى، خد بالك ان قعدتك لوحذك ممكن تخليك تبيع نفسك ودينك وربك. احنا مش عايشين لوحدنا، معانا "شياطين الإنس والجن" ودول بقى لما تبقى لوحذك بيقوا قاعدين جنبك عالكتبة، قاعدين على كتفك، عايشين معاك... وزن بقى عالودان.. وانا مش هاتكلم فى النقطة ديه لأن كل واحد عارف بيتوسوس له بياه..!

الخلاصة من الفصل ده: انك تعيش لوحذك فده سلاح ذو حدين، ممكن يرفعك لدرجات عالية قوي في حياتك يخليك نعرف نفسك أكثر وقدراتك أكثر.. أو انه يجيبك الأرض ويخليك تنوه أكثر، وماتبقاش عارف انت عايز ايه أو اذا كنت صح ولا لا. القعدة لوحذك "مسؤولية"، وده عشان هي "حرية مطلقة" بتديك صلاحيات ونفوذ كبيرة قوي، يا تعرف تستغلها لصالحك.. يا إما ماتزعلش بقى من النتائج.. خليك "أنت المتحكم" في حياتك، واثبت انك جدير بالثقة وقد المسؤولية، وساعتها.. ساعتها بس هتلاقى ان القعدة لوحذك هي "أجمل فترة هتقضيها لحد ما أهلك يرجعوا بالسلامة أو انك تسافرلهم تعيش معاهم، من الآخر.. قعدتك لوحذك.. "سيطرة".

الشبراوى والحب

الحقيقة مش عارف أبدا الموضوع ده ازاي.. يمكن عشان فيه ناس اتكلموا كتير عنه قبلى، وباستفاضة كمان. لكن خيلنا نقول إن معظم الكلام اللي اتقال قبل كده كان بيشويه شىء من الخيال.. اتنين اتقابلوا وبدأ الاعجاب اللحظى اللي بيخليك تتخيل ان ديه اللى هتبقى مراتك وتعرفها على مامتك وباباك وهى تعرفك على أهلها وتتخيل نفسك بقى وانتم قاعدين كلكم بتلعبوا "بنك الحظ" أو لعبة الأفلام المشهورة "بدون كلام"، وكل ده بيدور في ذهنك من أول كام ثانية بتشوفها فيها و"ييعجبك شكلها"..

خيلنا ما نضحكشى على بعض، الحوار ده بيدور في دماغك لأن ده اللى بيحصل في الحقيقة. أنا عن نفسى بحب جدا أفلام الكوميديا الرومانسية زى:

There is something about marry

The Ugly Truth

Just Friends

P.S. I love U

وغيرها من الأفلام دى ..

لكن كل ده كلام فارغ، دى مجرد أفلام معمولة عشان تخليك "تقتنع" ان هوده اللى بيحصل في الحقيقة. التجارب اللى هاتكلم عنها دلوقتى هى تجارب "واقعية" أنا شخصا اللى مررت بيها.. وفي آخر كل واحدة هاوضح ان الحقيقة "مختلفة"

عن الأفلام بأسلوب بسيط.. أنت أكيد اتحطيت فى موقف من المواقف دى وأنا متأكد أنك أول ما تقرأها.. هتبتسم وتفتكر، أو هتضحك.. أو هتتهم نفسك بالغباء لأنك عملت زى بالضبط والحوار باظ منك بسبب التصرف اللى أنا وأنت اتصرفناه. ملحوظة: كل الارتباطات اللى دخلتها، كان الهدف منها "البحث عن شريك الحياة المناسب".. يعنى ماكتش باروح "بار" ولا بانزل جامعة الدول عشان "أشقط" واحدة وأبقى كده راجل قوى.. ولا بروح شرم عشان يبقى هدفى الوحيد انى أنصور مع "كام مزة روسية" وأنزل صورى عالقسيوك وأتباهى بيهم، أصل أنا كده بقيت حرمجى ومقطع السمكة وذيلها. وبالمناسبة لما تلاقى واحد كل صوره مع سباح وبنات أجانب بس وهو مصرى زيه زيك وعایش في مصر زيك بالضبط، تأكد ان مافيش واحدة وضيت بيه وهو عارف كده كويس، فماتفتكرشى ان ديه رجولة يعنى.

العلاقات دى كلها هدفها كان انى عايز أتقدم رسمى. لكن الحوار كان بيوظ فى الآخر.. كل شىء قسمة ونصيب طبعاً، لكن كل مرة لازم تتعلم حاجة.. سبحانه الله، كأن ربنا بيجهزك للبت اللى هتستاهلك وتستهالها. خيلنا تقسم التجارب دى على "قصص قصيرة".. عشان نخفف جو الدراما اللى ينشوفه في حكايات كثير.

القصة الأولى: دروس فيزياء

فى سنة أولى جامعة، كان فيه بنت (خيلنا نسميها "ع") تعتبر من أجمل وألطف البنات اللى الدفعة كلها أجمعت عليها. تقريباً ماكانشى في منها اتنين، وكانت فيها كل الصفات اللى تخلى أى حد يعجب بيها. الكل كان بيتنافس عليها والكل كان هيموت وتعبه.. إلا أنا. كنت الوحيد اللى بيعد عنها دايماً، بانتجب أى أحاديث معاها أو أى تعامل. هى كانت بتفتكر ده "ثقل" وكانت بتستغرب ليه كنت الوحيد اللى بيعد عنها.. ماكانتشى تعرف ان ده "حجل"

وانى فى الواقع.. كنت أكثر واحد معجب بيها فى الدفعة، بس عشان اللخمة اللي كنت فيها لما بتتكلم معايا فماكتش بحب أكلها خالص تجنبا لأى ردة فعل غريبة قد تصدر منى.

كل ده كلام عادى، انك تكتم اللي جواك لمجرد انك خايف من انك تتكلم لا تخرب الدنيا، ففضل انك تقعد ساكت. لكن اللي حصل هو ان فى يوم كنا فى معمل بتاع مادة اسمها **human dentition** بننحت أشكال الأسنان من الشمع، وبما انى فنان (ساعتها مكتش متوغل قوي فى الفن لكن كنت رسام كويس) فكان النحت ده بالنسبة لى "متعة" وكنت بقفل درجات العملى بسهولة تامة.. لقيتها مرة واحدة طلعت من ورايا وقالت لى: "أنت ناجى صح؟؟؟" رديت عليها وانا مخضوض: "أيوه أنا.. ايه عايزة ايه؟؟؟" البنث سكتت ووشها احمر وقالت لى "انا بس باشوفك معانا فى الجروب ومابتتكلمشى ولقيتك عملت سنة بالشمع حلوة قوى، عملتها ازاى هاها ازاى ها ازاى؟؟؟؟" .. ساعتها رديت وانا متردد وقلت لها "وات مالك!!.. قصدى.. لو عايزة ممكن أعلمك!" ساعتها وشها كله ابتسم وقالت لى موافقة. من بعدها اكتشفت انها مش بس فاشلة فى المادة ديه، كان فى كل المواد الصراحة وبالأخص "الفيزياء"، وطبعاً من هنا بدأت الحكاية.

الفيزياء هى المادة الوحيدة اللي كل الناس أجمعت ان مالهاش أى لازمة انا ندرسها فى سنة أولى فى أى كلية طبية أو صيدلية. لولاكش بس الكلمتين اللي دكاترة الفيزياء يقولوهم لنا عن قد ايه الفيزياء مهمة لدكتور السنان وانها مادة "جوهرية" .. أنا معاهم، بس مش دى الفيزياء اللي احنا محتاجينها فى أسنان خالص!!! ما علينا ده مش موضوعنا.. المهم ان (ع) كانت عايزة تعدى منها بأى تقدير وخلاص.. ساعتها كنت شاطر فى الفيزياء وكانت دى فرصتى (أو زى ما كنت متخيل) انى اقضى معاها وقت أطول وأعرفها أكثر وهى كمان تعرفنى. مع الوقت بدأت العلاقة

اشيك واد في شجرا

تتطور.. وهي كمان بقت شاطرة فى الفيزياء، لدرجة انى في مرة حفظتها "الجدول الدورى" كله في قعدة واحدة.. حتى أصحابى والولاد اللى كانوا بييجروا وراها بدأوا يحقدوا عليّ لأنى بأقضى معاها أطول وقت. كل ده والله ما كان فارق معايا لأنى يبقى مبسوط جدا لما كنت بلاقيها بتتحسن فى المادة يوم بعد يوم، بتحس ان ليك لازمة أو بتعمل حاجة صح عالأقل.. انك بتساعد الشخص اللى بتحبه. لكن يظهر انى زودتها حبتين، وتقصت دور مدرس الفيزياء بزيادة، ومع الوقت بقى كل همى انها تنجح وتعدى.. بالتالى الدروس والكلام معادشى ممتع زى الأول، وهى كمان بقت تحس ان الوقت بتاع الفيزيا بقى دمه ثقيل.

الامتحانات عدت، والنتيجة طلعت.. قلت أنظمن بقى هى عملت ايه فى الفيزياء، لقيتها جايبه "جيد جدا" ! وانا جيت "جيد".. مش مشكلة، المهم انى ساعدتها، لكن لما لقيتها ماشية مع واحدة صاحبها وقلت لها: "مبروووك أنا شفتلك النتيجة".. وكان الرد: "ميرسى..". وكملت كلام مع صاحبها عادى وعدت.. وانا فضلت واقف مكانى مستغرب!! ازاي أنا كنت مبتسم ومبسوط قوي عشانها، وهى بمنتهى البساطة عادى كده!؟؟ ساعتها بس أفنكرت اليوم اللى هى جات لى بنفسها فيه وانا فى المعمل واستغلت سذاجة سنة أولى جامعة اللى كانت في كل واحد فينا ولبستى الـ"طرحة" عشان تنجح في مادة، ومش أى طرحة..دى طرحة "سبانش" كمان. حسيت كأنى بالضبط واقف فى الشارع وجه واحد بعجلة بسرعة وراح واكلى "قفا حكومة" وطلع يجرى.. وأنا من الصدمة مش عارف أجرى وراه.. ولا أقوله الله يسامحك.

الدروس المستفادة:

مش معنى ان واحدة ضحكك في وشك انها خلاص بقت مراتك المستقبلية

وتخصك.. فوووووق من الوهم يا حيلتها!!! .

ماتذاكرشى لبنات فى الكلية أبدا.. وخصوصا لو كنت بتحب البنات دى وناوى ترتبط بيها، عايز تساعدنا يبقى تصورلها ملازم، تديها محاضرات والا هتلاقى انك بتحط نفسك بكل أدب ومهنية واحترام وممنونية فى منطقة "انت زى أخويا".. وهاتفصل تغوووووص فى المنطقة دى لحد ما تبقى فى منطقة تانية اسمها: "انت زى أمى".

أوعى تكون فاكر ان لما أصحابك يلاقوك قاعد معاها وبتذاكرلها يبقى انت كده جامد بقى ومظبط يابن اللعيبة.. تبقى حصار.. وهم أحمر منك.

ماتاخدشى بالانطباع الأول أبدا.. لأن ربنا خلقنا احنا الرجالة بنحب به "عشينا" عشان كده اختص النساء بالجمال، الجمال فى كل حاجة حتى الصوت والضحكة والوجه والخجل.. انت غصب عنك هتلاقى نفسك بتشد للبنات الجميلة، حاول تسيطر على نفسك أبوس ايدك وبطل ترسم الفيلم بتاع الزوجة المثالية فى دماغك لوحدة انت ماتعرفهاش أصلا لمجرد انها جميلة.

أخيرا، لو لقيت بنت زى ديه وعملت معاك نفس الموقف، يبقى حاجة من ثلاثة مافيهاش كلام.. يا إما انها فعلا كانت معجبة بيك وكانت عايزة تعمل موضوع الشرح ده عشان تعرفك أكثر والباقي عليك انت بقى.. أو انها زبالة واستغلت سذاجتك عشان توصل للى هى عايزاه (وساعتها يبقى ربنا حب يعلمك حاجة فى أول سنة جامعة).. يا إما ان الموضوع كان مجرد إعجاب وما اتطورشى وخلاص مات وفى كل الحالات ده نصيب.. فماترعلشى.

البرنيسية: (القصة الثانية)

البرنيسية هى نوع من أنواع البنات الللى متأكد ان كلنا عارفينه كويس

واتعاملنا معاه (سواء ولاد أو بنات). موجود في كل شرائح المجتمع والكليات والطبقات التعليمية والأعمار. البرنيسية ببساطة هي البنت اللي دايمًا بتأخذ كل حاجة، وتتلاقىها محاطة على طول بـ "شلة بنات".. هي المسيطرة، هي اللي بتقول نخرج فين ونخلع من المحاضرة امتى وتقعدي فين يا بنات. البرنيسية هي من أكثر الشخصيات اللي عاشرتها وعرفتها كويس قوى، لأنى عرفت واحدة منهم، وللأسف.. دخلت المصيدة!. العلاقة المرة دى دامت ستين وكانت من الجامعة، والموضوع كان جدى وآخرته أكيد معروفة.. انى أتقدم لها.

البرنيسية بيطلق عليها اسم "بطلة المسلسل".. الجوايز كلها عندها، دايمًا بتحصل على كل اللي هي عايزاه.. لكن لو انت اللي عايز تحصل عليها، يبقى لازم تكون "الشخص الوحيد" اللي لا يمكن هي تحصل عليه.. لأن البرنيسية بتفكر زى الطفل الصغير اللي هيموت عشان اللعبة اللي هو عايزها ومش قادر يحصل عليها، وأول ما ياخذها.. يرميها، ما هي خلاص بقت عنده ومنين ما يحب يلعب بيها هيلاقها معنى هي هتروح فين.. مش بعيد كمان يكسرهما وفي الزبالة يرميها، ويرجع يجيب غيرها. ده بالضبط السيناريو اللي حصل معايا لما انتقلت لجروب جديد (وكان ده الجروب اللي فضلت فيه على طول) وكان طبعا أول مرة أعرف الناس اللي فيه.

هناك قابلت أول برنيسية عرفتها في حياتى. كنت طالع من تجربة الفيزياء الأولانية محطم وحذر جدا في اختياراتى المستقبلية، وده عمل شىء من الـ "تقل" لشخصيتى.. التقل اللي البرنيسية فهمته على انه تقل وهو كان فى الواقع "حذر" عشان ما تمشى في نفس الغلط تانى. الموضوع بدأ بتحدى معاها.. انها لازم تلفت انتباهى ليها، واحدة واحدة بدأ الاعجاب.. شوية تلاقى حاطط برفان ريحته حلوة

فتقوللى "الله حلو البرفيوم ده" .. وشوية "حلوة التسريحة دى قوى" (أيام ما كان عندى شعر).. لما كنا بتكلم ماكتشى بتقف بعيد زى مع بقية الناس، كانت بتبقى واقفة تقريبا "في جيب القميص بتاعى" .. او اتى ابقى ماشى في أمان الله وألاقيها بتنادى عليّ وجاية ورايا ولما بسألها في حاجة تقول لى: "لأ مافيش أنا بس كنت بسلم عليك" !!! لما عزمتنى على عيد ميلادها أول مرة ماعرفتش أروح، عشان ساعتها كنت قاعد مع جدتى وكانت تعبانة.. لكن جبتلها هدية تانى يوم، صحيح ماكتشى غالية، إلا انها كانت مميزة. بالمناسبة لما تيجى تجيب هدية لست، ماتفكرشى في السعر قد ما تفكر في القيمة والمواصلة في انك تهاديهها دائما.. لأن الستات بيشوفوا كل الهدايا و!!!!!! احد. الفكرة مش في انك تجيب ايه، الفكرة انك "تجيب هدية أصلا" .. يعنى لو هاتجيب لمراتك مثلا كل يوم وردة لمدة شهر هتبقى جمعت 30 نقطة، لكن لو فضلت طول الشهر مطشها بحجة انك بتشتغل عشان آخر الشهر تجيبها عربية "هامر" .. تبقى غلطان، لأن ديه هاتبقى نقطة واحدة بس (من كتاب رجال من المريخ ونساء من الزهرة).

المهم ان الموضوع بقى يتطور أكثر وأكثر وكل مادا باتعلق بيها أكثر وبدأت أرسم في دماغى الفيلم اياه وأنا باعرفها على ماما وبابا وينلعب بنك الحظ مع أهلها وهى تعرفنى بقى على أخوها الصغير.. عموما أول ما حد فيكم يلاقى نفسه بيتخيل الفيلم "القدر" ده أنصحه انه يغير المحطة.. أو يولع في التليفزيون. عيد ميلادها التانى قرب، صاحبته الأتيم قالت لكام شخصية ومن ضمنها أنا اتنا غايزين نعملها حفلة مفاجئة كده عشان عيد ميلادها. طبعاً المرة دى كنت أول المتطوعين، وكان يوم جميل جدا وفضلنا نتكلم تقريبا طول القعدة ولا كأن الناس اللى حوالينا دول ليهم لازمة. بعدها كنت رسمت لها بورتره وعجبها جدا، لكن رفضت أدهولها

وفضلت أخليه معايا، مع انها فضلت تزن عشان تاخده.. مارضتشي اديهولها. للاسف اكتشفت بعد كده اني كنت مجرد "نحدي" بالنسبة لها وخلاص.. وكانت عايزة تثبت حاجة، أو بصريح العبارة: أخذت اللعبة اللى هي عايزاها خلاص. ولأني كنت ناوى خير من الأول، فعملت أكثر حاجة صح المفروض انها تتعمل ساعتها.. عيد ميلادها الثالث كان قرب خلاص، فجبجت البورتريه اللى رسمته لها وبيروته في برواز حلو، ولقيته لفة حلوة، وف وسط صاحباتها ادتهولها وقتلتها: "كل سنة وانت طيبة" .. وسيتها ومشيت. الحركة دى وضحت منها حاجتين، أولها "عامل الناس بأخلاقك لا بأخلاقهم" صدق رسول الله- صلى الله عليه وسلم- و الثانية اني ماعدتس عايز أتكرها وتغور هي والبورتريه بتاعها هههههههه!

الدروس المستفادة:

البرنيسية مش شرط تكون "طاغية الجمال" خالص عشان تعجب.. لكن اللى يميزها هو السيطرة والثقة بالنفس العالية جدا.. وده بيعجب الرجاله لأنها بتبقى مستحيلة أو صعبة المنال بالنسبة ليهم.

لو البرنيسية رينا هداها واتغيرت (رينا يهدينا كلنا طبعاً) يبقى اديها فرصة، هي في الأول والآخر اتساة ويتحس.. لكن لو فضلت بنفس السلوك ده، يبقى خد بالك عشان في أقرب فرصة "هتركنك" في دولاب اللعب اللى عندها.. ده طبعاً في حالة لو انت اللى ادبتها فرصة انها تعاملك من الأول كـ "لعبة".

عامل الناس بأخلاقك لا بأخلاقهم.. يعنى ماتسمعشى كلام بعض أصحابك "الشبيحة" اللى فاكرين نفسهم بيساعدوك لما يقولوك "يا عم ده أنا لو منك كنت أ.." هو لو مكانك كان هيبقى زى القرية المخرومة، وماتساش ان كل واحد في حوار غير لما يشوفه من برة.

لو اخترت انك تتعامل بأدب مع الموقف، يبقى انت نضيف وكانت نيتك خير من الأول وربك ماينساش حد.. هيكرمك بواحدة تشيلك في عينها.. لكن لو رديت بقلة أدب، يبقى انت بقى اللي زباله ومن الأول بتسلى وربنا وقعك وقعة سودة زيك.

أهم نصيحة: "لوانت رسام أو موسيقار.. اوعى ترسم لها بورتريه أو تألف لها موسيقى أو أغنية إلا اما يبقى فيه حاجة رسمى بينكم" هههههه.

كأنك شايف نفسك مكانه بالضبط: (القصة الثالثة)

عارف لما تعرف واحدة وتكتشف انك بتتحط في "اللمسة" .. لما تلاقى رغم انها على علاقة "جديده" معاك إلا انك بتشوقها في يوم من الأيام في الجامعة قاعدة جنب واحد، بتضحك معاه وتهز معاه وتبص له وعينها بتلمع كده.. كأنك بالضبط بالضبط شايف نفسك؟؟!! يبقى انت أكيد، أكيد وقعت مع "الشبكة ستايل".

الشبكة ستايل: هي نوع البنات أو الولاد "اللعوب" .. انا مش قصدى المعنى السافل يعنى (مايروحشى مخكم لبعيد) .. انا قصدى انها (أو أنه) يتسلوا بالأشخاص اللي بيعرفوهم نتيجة احتياج عاطفى مجرد ما بينقضى بتلاقى ان ماعادشى ليك أى لازمة في حياتهم. أنا مش هتكلم عن النوع ده من الولاد (لأن ده مش موضوعى) لكن هتكلم عنه في البنات لأنى عرفت واحدة بالضبط بنفس المواصفات (و بالنسبة للبنات اللي يقرأوا الموضوع .. الصفات ديه موجودة برضه في النوع ده من الولاد.. فخذوا بالكم).

خلينى أقول لكم شوية معلومات بسيطة (بس مهمة) عن الشخصية ديه.. ولو أنا غلطان.. صححولى. مبدئيا كده، النوع ده من البنات كان في يوم من الأيام "المستمره" (اللى هي الشخصية اللي ناقشتها قبل كده معاكم في الفصل اللي فات اللي بعنوان "الجميلة والصرصار") اللي هي باختصار البنت المؤدبة الجميلة الهادية اللي بتدور

على راجل واحد بس ترتبط بيه وبشتمر كل جهودها فيه هو بس، عشان تحس انها أنجزت إنجاز تستحق عليه انها تنال الراجل ده بجدارة.. لكن الحياة للأسف مابتديش كل حاجة، فبنالقي البنت دي للأسف عرفت واحد "لعوب" وفضل يلعب عليها ويعيشها في وهم العلاقة "الطويلة" ويقولها انه ده في مصحتها عشان يعرفوا بعض أكثر.. بعد كده تفاجأ بيه ويقول لها: "معلش بقي مش عايزين لبن النهارده"، أو "انا بصراحة ظروفى ماتسمحشى أتجوز دلوقتى"، أو الجملة اللي خلت نص بنات مصر يتقنوا ان الرجالة فعلا ماتوا في ٧٣ "أنتِ تستاهلى واحد أحسن منى يا منى" ... مين منى دي؟؟..

بالتالى ده بيخلي البنت الغلبانة اللي كان كل أملها انها ترتبط بواحد للأسف ما قدرشى قيمتها واستغل اهتمامها بيه وثقتها فيه - ده طبعاً لأنه ببساطة "حيوان" - قررت انها من هنا ورايح هتبقى حذرة جداً فى اختياراتها.. جداً.. مش بس كده، دي كمان بقت مقتنعة ان الرجالة كلهم من نفس العجينة، وان كلهم زى الدبان.. تهش، يلزق ويجيلك منه أكثر.. للأسف البنت دي بتبقى أسوأ من الولد "اللعوب" وتبدأ تطبق نفس المبادئ اللي هو بيطبقها.

ماتستغريشى من الكلام ده، فيه ناس ممكن تقول انه ازاي يعنى من علاقة واحدة بس قلبت واتحولت، هو صوابع ايديها زى بعض، الرجالة مش كلهم كده.. ماشى انت صح، بس ماتنساش ان الست غير الراجل.. ربنا فضلنا عليهم بدرجة، الدرجة دي هى "الجلد" أو التحمل.. انت لما بتطلع من علاقة (على رأى الداعية مصطفى حسنى) بيبقى وجعها زى وجع خبطة في "كوعك" بتوجع قوي لكن بتخف بسرعة.. انما لما بنت بيتغدر بيه، بيبقى قلم سخن قوي.. قلم حكومة يعنى، فيخلياها مشوشة طول حياتها لحد ما تقابل بقى الشخص المناسب.. تخيل مقدار الوجع والكراهة اللي

جواها من ناحية الشخص ده، واللى يوجع أكثر انها - للأسف - لسه بتحبه.. ما هو أصل احنا البشر كده، لما بتحاول نكره حد حبيناه في يوم، بنفكر كل الحاجات الحلوة اللى عشناها معاه وبنفكره أكثر.. كأن المخ ده يستعبط، أول ما تقوله أنا عايز أنسى.. يقولك "وحياة طنط لأفكرك...!"

خلينا نتكلم عن الطريقة التواصلية اللى بيتبعها النوع ده من البنات. أولا ما بتربطشى نفسها عاطفيا بأى شخص مهما كان.. يعنى ممكن تلاقيها بتدلّع معاك فى الكلام وتهزروا مع بعض لدرجة ان أى حد هيشوفكم مع بعض هيصم بالعشرة ان فيه حاجة بينكم، ورغم كده يوم ما تيجى تصارحها بمشاعرك، أو حتى تلمح لها قبلها عشان تفهمها.. هتلاقيها قفشت قفشة سرودة، أو قعدت تنوه فى الكلام أو طلعت موبايلا وفضلت تلعب فيه وعاملة عبيطة، ولما تسألها انتى معايا؟؟ تقولك آه معاك كمل.. ده لأنها ببساطة "مابستريحشى للكلام العاطفى أو الرومانسية والكلام عنها" لأن ده يفكرها بالموضوع القديم.

"التشبيكة" هو الاسم اللى أنا شخصيا بأطلقه عليها عشان هو اسم على مسمى.. احنا اتفقنا ان البنت دى طالعة من تجربة سيئة جدا، فبقت حذرة فى اختياراتها قوى.. ده بيخلى عندها نوع من الهوس بالـ "رجل المثالى". يعنى مثلا تلاقى ولد كل حاجة كويسة فيه.. بس لو ينس شوية!، واحد تانى رياضى وشكله حلو وابن ناس.. بس لو يذاكر بقى ويهتم بمستقبله!!، واحد فيه كل حاجة كويسة شكلا ومضمونا.. بس لو يبتى "مدروح" شوية!!! .. وتستمر المعضلة. هى بيتقى عايزة واحد فيه كل حاجة.. وبما ان ده مستحيل عمليا.. اذن هتلاقيها بتعرف ولاد كتير، وتأكد ان كل واحد منهم فيه حاجة مميزة، حاجة بتلىب طلباتها، يعنى هتلاقيها عارفة "الولد الشيك" اللى تنباهى بيه قدام صاحباتها ويحسدوها عليه، وعارفة الولد "العاطفى الرومانسى"

اللى يقول لها كلام حلو ويجنن (وأكيد ما حدش يكره انه يلاقى حد يقول له كلام حلو
يعنى)، وعارفة الولد "الدحيح أو الشاطر" اللى بيصور لها الملازم دايما ويظبطها،
وعارفة الولد "اللى بيضحكها" اللى لما بتبقى عايزة برشامة ضحك عشان زعلانة
بيبقى هو أكثر واحد ملازم ليها ويحاول يعمل اللى يقدر عليه عشان يسعدنا ويبقى
مبسوط جدا يا عيني لما يلاقياها مبسوفة (لأنه يفتكر انها مبسوفة عشان هو جنبها
طبعاً).. وأخيرا الولد "كاتم الأسرار" اللى عنده كل أسرارها وبيتباهى انه عارف كل
أسرارها وانه كده مميز عندها.. بس يا حبي أحب أقولك لو انت النوع ده، خد بالك
انك كده اتحطيت من زمان عندها في منطقة "خلينا أصحاب أحسن" (دى
متكلم عنها في فصل لوحده).

أهم نقطة بقى في كل دول: انها على علاقة بكل الولاد دول في نفس الوقت.
من الآخر كده هي بتعمل شبكة كيبيرة وماسكة بيها كل الولاد دول وتحاول
تحافظ عليهم زى ما هم.. واللى يحاول منهم انه يتقدم بخطوة رومانسية بتهرب
منه، يفتكر انها بتسيه فيبعده.. لكن بيفاجأ انها بتراجع له تانى وتكلمه بدلع وطيبة..
ده لأنها عايزاه في مكان معين من حياتها ومش عايزاه يبعد عنه ولا يقرب أقرب منه..
ويمكن ده اللى بيحير الولاد منها ويخليهم مش عارفين هي عايزة ايه، وعليه بيتعلقوا
بيها أكثر ويفضل عندهم أمل.

الشبكة والفيسبوك:

الفيسبوك بتاع الشبكة هتلاقى فيه الأصدقاء الـ "أولاد" أكثر بكتير من
"البنات".. هتلاقى ان في ولاد كيبير بيعملوها كومنتات من نوعية "ايه العسل
ده" أو "عسولة قوي ي ي ي ي ي هي الصورة ديه" أو "ايه يا بنتى ده، أنا
مش متكلم والمصحف" .. بس أى بنت ممكن بتعملها كومنتات كده، إلا ان

صاحبنا برتد عليهم ردود زى "سانكس يا جمبيل" .. او "يا واد انت بطل بكش"
 أو "كبيمووووووزز ميرسى كثير يا مززز" (ماعرفشى ليه دايمًا كيموز ده بيبقى
 مززز).. طيب ولو هي مابتدش عليهم فى الكومنتات، ازاي تعرف انها من النوع
 ده؟؟؟ تأكد ان الفيسبوك مجرد "تغطية وهمية لعالم وهمى أصلاً" يعنى ماتعمدشى
 على كل اللى بتاخده منه.. لكن فى قاعدة عامة بتقول: "لما تلاقى الكومنتات عندها
 عمالة بتزيد قوي ومن ولاد ومن نوعية الكومنتات ديه وهي مابتدش.. وكل يوم
 عمالة تزيد ومن نفس الولاد هم هم وماتعملهمشى (ريموف).. يبقى يا بيه هي برتد
 عليهم.. بس inbox فماتاخدشى في بالك واسحب نفسك كده باحترام عشان
 انت أصلاً محطوط في لسته طويلة عريضة كلها شباب زى الفل وانت ممكن يكون
 رقمك ال ١٦ أو ال ١٠٠ ..

باختصار.. هي بترتاح أكثر لما الولاد يعاملوها زى "واحد صاحبهم" أكثر من
 "بنت" (عشان كده مش هيتلقوها أو يجاملوها).

حاجة كمان تاخد بالك منها.. واللى مريبها هو بس اللى هيضحك لما أقولها..
 من أكثر الحاجات اللى بتميز البنت ديه عالفيسبوك انك لو بتكلمها شات هتلاقيها
 دايمًا دايمًا بتقفل هي الشات الأول.. إلا مرة أو اتنين بس اللى انت قفلت فيهم
 الأول.. دايمًا بتحجج بحجج كثيرة ومالهش لازمة.. زى انها تقول لك كل مرة
 "معلشى هاطير أنابقى عشان ماما عايزانى" .. كل مرة ماما عايزاها، مع ان هي ممكن
 تكون قالت لك أو انت عارف ان مامتها "متوفية" أصلاً!!! المهم انها دايمًا بتبعد
 وتهرب هي الأول (وأنا مصمم على كلمة بتهرب، لأنها مش غبية ولا عبيطة.. دى
 بتستعبط) لدرجة انها ممكن تسيك مرة مستنى وتقولك معلشى خليك معايا كده،
 وتقفل أصلاً، وانت يا عيني تفضل قاعد تضرب أخماس في أسداس وتلمس لها

الأعذار، ماشى دعونا نلتمس الأعذار.. بس مش كل مرة يعنى، أو اللي يقفل غلط،
 برد تانى يوم.. غيرى يا حاجة (فعلا الستات مايعرفوش يكذبوا!!!!)..
 خد بقى الثقيلة، أكيد انت في مرة من المرات فكرت تسألها ويهدوء كده
 وتقولها السؤال المشهور: "أنا أكيد صدعتك بكلامى.. بس على فكرة لو ضايقتك
 ممكن تقولي لى مش هازعل عادى، لكن ماتسيينيش كده!!!".. هنا بقى هى
 بتحس أنك بدأت تجيب عليها الغلط، فترد عليك الرد اللى أكل نص شباب مصر
 "البلوظة": "على فكرة أنا أصلا مابتكسفى.. لو انت صدعتنى هاقول لك في
 وشك ومش هتكسف يعنى، فمتسألنيش السؤال ده كل شوية.. ماشى؟؟؟" (ويتقول
 له كده وهى جاللة جدا ومبينة انها محموقه قوى).. طبعا معظم الولاد وخصوصا
 لو بيحبوها هيردوا عليها الرد ده: "خلااص خلااص ماتز عقيش هههههه أنا بهزر
 معاكى".. تقوم هى قايله له: "طب سلام عشان ألحق أصلى الفجر وأناام" وهو طبعا
 يقول لها "خلااص وانا كمان قايم أصلى أهر".. فى الغالب بتبقى دى الصلاة الوحيدة
 اللى بيصلوها فى اليوم بالمناسبة.

اه بالمناسبة.. لما تلاقيا بتكلمك عالفيسبوك بمتهى الحرية، وفى الحقيقة بتكلمك
 بمتهى "الكسووووف".. ابقى خد بالك، لأن ده معناه مش كسوف أو خجل.. ده معناه
 سعادتك انها لابسة وشششش.. مش على طبيعتها وبشخصيتين.

الدروس المستفادة:

لما تلاقى حد بالمواصفات ديه، خد بالك أنك بتحط في لمتة كبيرة.. تصيحى
 : "اطلع منها بسرعة!!!".

افتكر ان البنت ديه كانت في يوم من الأيام "البنت المتألمة اللى أى راجل
 يتمناها"، لكن مش ذنبها انها عرفت واحد حيوان غير لها فكرتها عن الرجالة

"ناضجة"، لأنى كنت اتعلمت كتيسر قبل كده، وعرفت امنى اتقول "هى دى" ..
وامتى اتقول "فااااكس".

أنا ماعرفشى اذا كان ده غرور ولا ثقة بالنفس ولا ايه .. بس طول عمرى مقتنع انى أستاهل واحده حلوة جدا، بنت ناس جدا، محترمة جدا ودمها زى العسل جدا. بس طبعا "إذا أردت ان تطاع.. فامر بالمستطاع"، اذن احنا متفقين انه عشان ربنا يكرمك بحاجة زى كده يبقى لازم انت تستاهلها.. وفى حديث يقول: "من ترك شيئا لله أبده الله خيرا منه"، من المنطلق ده كل التجارب اللى مررت بيها قبل كده كنت دايمًا ياسيبها على الله، لدرجة ان لما الموضوع بيوظ بينى وبين واحده، بأصلى استخارة وأفضل أدعى ربنا انه يكرمها هى ويرزقها بابن الحلال اللى يستاهلها.. كنت بادعيلهم هم أكثر منى.. ده عشان أبقى من ناحيتى صفت النية ومابقاش شاييل من حد فرينا يكرمنى بالللى ما كتشش أتوقعه. الموضوع بدأ فى آخر سنة فى الكلية .. سنة البكالوريوس (سنة خامسة)، عندنا فى أسنان فيه من ضمن درجات العملى "دستة حالات عيانتين" لازم نخلصها وفيه حد أدنى عال أقل لازم يكون خلسان .. فيه مادة عندنا بتاعة الـ "تركيبات الثابتة" المادة ديه دخلت الامتحان العملى بتاعها وكان المفروض انى هاشتغل على جزء من التركيبة والجزء التانى هيشغله زميل لى من جروب تانى (نظرا للأحداث اللى حصلت فى الثورة وقلة العيانتين) .. انا خلصت الجزء بتاعى وسببت العيانة ومشيت؛ من غير ما أعرف مين شريكى اللى هيكمل. عدت الأيام والحالات فضلت قليلة قوي وساعتها الدكاترة قالوا لنا "كل واحد يدور على اللى كان معاه فى الامتحان ويجيبوا وييجى واحنا نمضي لكم عالحوالة كاملة!!! يا نهار مش فايت!!! طيب أنا حالائى كانت ناقصة وأملى الوحيد انى الاقى زميلى اللى ماعرفهوش ده .. بالصدفه قبل امتحانات العملى بتاعة آخر السنة، كنا فى

الى عملتهم لما سبت العيانة كلفتني كثير الصراحة.. بس برضه كنت مسوطة.
 تانى يوم كنت ماشى أنا واصحابى فى الجامعة فلاقيتها جاية فى وشنا هى
 وصاحباتها.. توقعت ان هى هتكشر (ماحنا اتخانقنا واكيد قالت بقى كلام وحش
 عنى)، قلت أكشر أنا الاول أحسن.. لكن اول ما شافتنى ابتسمت ووشها نور
 وقالت لى "ازيك يا محمد؟" لاقيت نفسى وبدون مقدمات بيتسم قوي ويقول لها
 "الحمدلله" (و فضلت بنفس الابتسامة طووووول اليوم) كم هو غريب الانسان!
 يوم بعد يوم بدأت أسأل عنها.. أحاول أعرف هى مين، وكان كل ما أسأل حد عنها
 يقول لى نفس الاجابة: "ازاى مانعرفشى (س) البنت الجميلة اليبضا اللى عنيا
 خضرا بنت الناس الكرويسين"!!! كانت كل الاجابات بلا استثناء لازم تلاقى فيها
 الأربع صفات دول.. كان فيه ثلاثة بس اللى قابلتهم هم اللى قالوا عنها: "اه هى
 جميلة فعلا.. بس مغرورة كده وشايفة نفسها يعنى"، بصراحة (وده رأيى الشخصى)
 اعتقد ان الثلاثة دول كانوا فى يوم من الأيام عرسان اتقدموا ليهما وهى رفضتهم.. لأن
 البنت فعلا ما شاء الله عليها "مميّزة".. حتى وان كانت ليهما زلات.

مع الوقت وكل ما أسأل عن البنت دى أكثر، اتشدلها أكثر، وكالعادة دماغى
 تودى وتجيّب وأسأل نفسى "هى دى.. ولا لا؟". لحد ما صليت استخارة وحسيت
 ان الدنيا مريحة وانى مستريح ليه.. وعليه قررت ادى الموضوع فرصة. كان رمضان
 قرب وفاضل له حوالى أسبوع، كمادة أى حد عايز حاجة تتحقق له بيدعى ربنا،
 وده اللى حصل فعلا. أنا مقتنع تمام الاقتناع ان موضوع الجواز وشريك الحياة ده
 قدريات، بمعنى انك مهما عملت فى اللى مكتوب لك تكون مراتك هتكون مراتك..
 دى مسألة مافيهاش كلام.. لكن كنت سمعت ان الصحابة- رضوان الله عليهم-
 كانوا بيقلوا انهم لما كانوا بيلتزموا بمجموعة دعوات طول رمضان.. ماكانشى

يعدى رمضان اللي بعده إلا والدعوات دى كلها استجيت. من هنا قلت أنا هالتزم في رمضان كله بمجموعة دعوات.. وهاركرز على كام دعوة أساسية ومن ضمنها: "اللهم اجعل هذه البنت من نصيبى". طول رمضان وأنا عالحال ده، التراويح كنت أحياناً بصليها ٢٢ ركعة (زى مكة المكرمة) مش ١١، والتهجذ طبعاً وقيام الليل وكله.. مع مراعاة الدعوات ومن ضمنها الدعوة اياها. كنت دايماً بقول "يا واد.. إن الله عند حسن ظن العبد به" عشان أفضل مؤمن باللى باعمله.

ملحوظة هامة: صلاة الاستخارة أعمق مما كنت بتخيلها دايماً.. انا كنت فاكرا ان مجرد ما تصلى استخارة هتلاقى ان ربنا بيديلك علامة فى ساعتها أو يقفل لك الموضوع، ولو انه يستجيب للموضوع بيحقق لك دعوتك. للأسف الفكر ده (الفكر الخاطيء طبعاً) خلانى أفكر - والعياذ بالله - ان لو أنا مثلاً ماصليتشى استخارة، يبقى خلاص الحاجة اللي أنا كنت عايزها هتتحقق (ما أنا خايف بقى لأصلى استخارة قربنا يدبلى علامة بالرفض فأفضل زعلان ومتضايق).. أنا متأكد ان كلكم فكرتم بالطريقة دى في يوم من الأيام.. عالأقل قبل ما تكبروا وتمقلوا، لكن فكرة صلاة الاستخارة في ان لو ربنا بعث لك الرد بالرفض اذن هو بيحفظ لك احترامك لنفسك، واكيد مجهز لك حاجة أحسن بكتيـر (أو أنسب.. عشان أكون دقيق).

المهم.. رمضان قرب يخلص والعشرة الأواخر دخلوا وخلصوا، وأنا كمان كنت خلصت وكلى أمل انى الاقى الرد من ربنا سبحانه وتعالى عالدعوات. تاتى يوم عيد (و مش هانسى اللحظة دى) بافتح الفيس لاقيت (س) غيرت ال relationship status من single to engaged .. "انخطبت!!!!!" .. ساعتها حسيت بإحباط شديد، لكن بعدها قلت معلشى، ده نصيب، وكالعادة: قعدت ادعيها زى اللي قبلها. اللي حصل انه بعدها بفترة قصيرة كده (قصيرة بجد)

لاقيتها رجعت تاني (سينجل)!! رغم اني كنت قلت أنا وكل الناس ان شكلها كان مبسوط والموضوع خلاص.. إلا ان الخطوبة "اتفركشت" صحیح أنا كنت زعلان عشانها لأنها مش حاجة سهلة يعني ان الواحدة تتخطب وتتفك الخطوبة بعدها، لكن الحقيقة أنا كنت مبسووووووط جدا وفي قمة السعادة لأنها رجعت لى تاني (ماتحوروش بقى ماهو أى حد فيكم لو مكاني كان هيجس بكده)، لدرجة اني كنت أول واحد يكتب لها جالفيس: "معلش يا (س) ده نصيب وان شاء الله ربنا يعوضك".. فى حين ان من جوايا كنت عايز أقول لها (على رأى محمد صحى): "يا حبيبتى.. تحاللى.. تحاللى ل حمو.. سيك منه ده ما يستاهلكيش.. مايقدرشى الهدية اللى ربنا بعتهاله" ههههه.. مجرد خواطر بيتيجى في دماغ أى واحد لما يلاقى ان خطوبة البنث اللى كان نفسه فيها اتفشكلت (و ديه طبيعة بشرية فينا).

زى أى حدث بيحصل زى ده.. لما بنت جميلة ولطيفة ومؤدبة وعنيها خضرا و"بنت فاس" (انا مش قصدى حاجة ربنا يزيدها.. لكن الناس دايمًا بيذكروا السيرة ديه عنها بالحاح شديد!) خطوبتها تتفشكل، لازم تلاقى الـ "غريان" بتحوم حواليتها من تاني، وكل اللى كانوا عايزين يتقدموا لها قبل كده بيفتكروا ان الفرصة المرة دى بزيادة.. على اساس انها خلاص بقى قطر الجواز كده هيفوتيا وبقت سوابق وأصبحت "الباحثة عن الحب" - فبدأ يحصل شىء من التجمهر الغريب حواليتها أو فى المكان اللى هى بتروحه.. بمعنى آخر: "ازدادت اللزقة" ومحاولات بقى للصيح وتلقيح جت.. البنث يا عيني هتعمل ايه؟؟ هتمشى ومعها "فازلين" فى الشنطة عشان الناس اللى بتلرق؟؟.. بما اني طبعًا كنت نويت اني ارتبط بيها وكنت ضمن المنافسين، قررت اني طالما جيتها، يبقى لازم أكسب احترامها.. عشان كده أخذت جنب من كل الناس دى وركزت على اني أحقق حاجة خاصة بي "بعيدا عن طب أسنان"، لأن ساعتها

وطالما قدرت أحقق حاجة بنفسى وبمجهودي، يبقى عالآقل أثبت انى مش بتاع كلام
وخلص.

فى الأفلام بتشوف البطل بيشتغل ويفتح فى الصخر عشان ينجز مشروعه
وفى آخر الفيلم البطلة بتروح له وتهنيه عالنجاح وفى الغالب بتبقى ليلة مميزة جدا
لا يمكن تنسى، الاتنين يفضلوا يضحكوا ويهزروا ويفتكروا مواقف بينهم وبالذات
أول مرة اتقابلوا فيها.. فى الآخر البطلة بتقول له "انا لازم أمشى عشان اتأخرت"
وهو طبعا بيوصلها لحد عربيتها ويتظمن عليها وبعدين تمشى.. يفضل فى الآخر
المشهد ده فى راسه طوووول حياته. أنا فضلت مؤمن ان المشهد ده هيحصل معايا
من أوله لآخره.. بكل تفاصيله، كان الانجاز اللى هاحققه هنا هو انى أعمل المعرض
بتاعى، معرض فنون تشكيلية أعرض فيه أعمالى وتبقى بداية حقيقية أحول فيها
مجرد هواية لـ "حقيقة" وأمر واقع. فضلت أشتغل فى صمت وكل أملى انى أوصل
للصورة اللى فى دماغى (بتاعة الفيلم) وف نفس الوقت كنت بسأل على (س) دايمًا
وأعرف أخبارها (حتى لو مكاتشى تعرف ههههه).. سواء عالشات أو لو شفتها (مع
تجنب اللزق غير المبرر زى الباقيين).

فى مرة كان واحد صاحبي عامل رحلة.. وكانت فرصة عشان الناس تشوف
بعض.. لما سألتها قبلها بيومين "انتى رايحاه؟" قالت لى "ايوة ان شاء الله..
وانت؟"، قتلها "أكىد ان شاء الله" .. انا مانتمش أصلا طول اليومين دول
لحد ما طلعتنا الرحلة (و ديه كانت أسوأ حاجة عملتها، لأنى فضلت طول الرحلة
متيس من كتر النعاس اللى كنت فيه).. كنت مخطط انى أقول لها حاجات كتير قوى
يوميا.. كنت حاسس انه آن الأوان انى أخرج من "الشيرزذ" اللى جوابا، لكن
كل اللى كنت باعمله انى فضلت باصص عليها بس ومبتسم.. ده لأنى مش قادر

أتحرك ونعسا!!! حيكيت يعنى أفضل سهران يومين.. صحيح، ديل الكلب عمره ما يتعدل. لما كنا قاعدين فى الباص طول الرحلة، كان ممكن تفضل قاعدة فى أول كراسى مع أختها وصاحبها.. لكن رجعت قعدت ورا معانا.. وتحديدنا قريب منى، وانا مش قادر حتى اتكلم لأنى فرهدت من أول الرحلة أصلا، وكل اللى عملناه "تبادل النظرات".. د أنا كنت متثيل وفي أسوأ حالاتى، وأعتقد انها كانت بتقول في سرها: "ايه العيبط ده، بيص لى كده ليه؟؟!!!".. آخر ما زهقت حطت سماعات الموبايل في ودانها وسمعت أغانى. استمرت طول اليوم بالمنظر ده وكانت خيبة أمل لى وخلص اليوم على كده.

معروف ان لما بتحب حد بتلاقى نفسك برضه بتحب الحاجات اللى هو بيحبها. بالنسبة ليهما هى كانت بتعشق حاجة اسمها "خيول" وخاصة العربية.. الخيول العربية ليهما سحر خاص، بتحسن ان ليهما كيان وعزة نفس، و(س) كانت بتفكرنى بيهم ويمكن عشان كده كنت مسميها اسم بينى وبين نفسى يعنى بتاديها بيه "مرجانة".. على اسم خيل عربى مشهورة بتفكرنى بيهما (بس هى ماتعرفشى الموضوع ده.. ماחדش يقول لها بقتى).. رغم انى كنت بحب الخيل قبل ما أعرفها، لكن بقت بعشقم عشانها.. وبيت خيبر فى كل ما يتعلق بالخيول - خاصة العربية - عشانها.. حتى اتى رسمت كذا لوحة عن الخيل - و كانوا من أحسن الحاجات اللى عندى - لأن طبعاً اترسموا بـ "شغف". كنت دايماً ولازلت بحب طريقة اختيارها للبسها وألوانها المتناسقة مع المكان والزمان اللى بتواجد فيهم.. بتهم بنفسها جدا وواثقة من نفسها الى أبعد الحدود، وده تحديدا اللى كان عاجبى فيها.. كنت بأستحى اتى ابص لها بصة مش كويسة (خايف عليها حتى من نفسى أو اتى أديها ذنب بسبب نظرة مش كويسة)، ويأتضايق جدا!!! لما حد كان ييفكر يقرب لها أو يجر ناعم أو حتى يبص بقلة أدب

(بأبقى عايز أنهشه بساني).. كنت حاسس ان هي دي اللي تستاهل اني أتعب عشانها وهتستحق كل اللي هاعملوا عشان أخلبها ماتحسش في يوم انها أساءت الاختيار.

خلاص قربت أخلص حوار المعرض، ولما قلت لها عليه اتبسطة جدا وكنت مستنى بقى اليوم اللي هتيجي فيه.. بس للأسف قالت لي انها مسافرة برة مصر عشان ظروف وكان واضح انها ظروف جامدة لأنها كانت ناوية تعيش هناك على طول.. سابعها كان فيه شوية إحباط، إلا اني قلت لازم أكمل وده حلم مش هتخلي عنه، لحد ما حصلت مشاكل، بسببها القاعة اللي كنت حاجزها راحت مني، والمعرض اتأجل حوالي شهرين.. لكن ده كان من حسن حظي لأن بسبب التأجيل ده كانت هي نزلت مصر ولما قلت لها ان المعرض ماكانشى اتعمل ولسا هبدأ، ساعتها كانت فرحانة وقالت لي "أكيد هاجي ان شاء الله".. وفعلا هي جات المعرض في الأسبوع الثاني، كان باقي عليه عشان يخلص حوالي ٥ أيام.. انا فاكر اني أصلا ماروححش باقي ال ٥ أيام، لأني ماكتتش عايز أشوف حد تاني بعدها (من غير زعل يعنى، بس كنت عايز دبه تبقى آخر ذكرى في المكان).. كان يوم لايمكن يتوصف (بالنسبة لي)، نفس اللي كان في الفيلم، اتكلمنا كثير جدا وف كل حاجة، اتريقنا على اللوحات بتاعتى كلها واللوحات اللي في المعارض اللي جنبنا (لوحة لوحة)، كنت حاسس ان فيه "فقاعة" عازلاني عن أى حاجة تانية حواليها.. وافتكرونا أول مرة عرفتها فيها-يوم الخناقة عاليان- واكتشفت انها كانت ناويالي نية سودة ساعتها! .. واحنا بتتفرج على المعرض اللي في الدور اللي تحتي قابلت صحفى كان عمل معايا حوار في قناة تلفزيونية، لما كنت بأقدم له (س) وباعرفه بيها، كنت باعرفه بيها على انها حد قريب ومميز جدا بالنسبة لي.. مش مجرد زميلتي. خالص اليوم اللي ماكانشى نفسى انه يخلص ابدأ، ووصلتها لعريبتها زي الأفلام بالضبط، اتطمنت عليها لحد ما مشيت

ولما وصلت البيت.. وفضل اليوم ده وهيفضل واحد من أكثر الأيام الـ "مميزة" في حياة محمد ناجي، يوم (٢٢-١-٢٠١٣) لأن من ساعتها مايقاش في يوم يعدى إلا ولازم البنت ديه ليها نصيب من الدعوات اللي بدعيها في صلاتي، سواء كانت من نصيبي بقي أو لا.

بالمناسبة: ده كان آخر بورترية في حياتي أرسمه لـ "بنت" .. ومش أي بورترية.. أحلى بورترية (بورترية حقيقي) وبصراحة كده ما عا دشى يتفع أرسم واحدة بعدها.. ومش ندمان عليه، إلا إذا واحدة تانية أخذت مكانها.

الدروس المستفادة:

هو درس واحد بس: "إذا أردت شيئا بشدة فأطلق سراحه.. إن عاد اليك، فهو ملكك.. وإن لم يعد، فهو لم يكن لك منذ البداية".

القصة ديه أنا مش هاقول نهايتها.. لأن النهاية مفتوحة. وبعد كل اللي مررت بيه في حياتي بوجه عام، أتأكدت من حاجة واحدة بس: انك لو اتشقلبت على راسك كده.. لا يمكن هتعرف ايه اللي هيحصل ولا ربنا مجهزلك مفاجآت ايه تاني، ببساطة.. ربنا يبجهزك لحاجة دايمًا.. حاجة في علم الغيب، هتضحك قوي على كل مرة كنت بتعانده فيها وتكتشف بعدها انك كنت مغفل لأنه- سبحانه وتعالى- عارفك كويس قوي وعارف بتفكر في ايه وشكلها عامل ازاى اللي نفسك فيها.. تفكر يعني اته مش هياقدر يخلق لك واحدة متفصلة عليك بالمقاس؟؟.. تبقى محتاج تعيد حساباتك من تاني.

كملخص عام للفصل ده:

مش عيب أبدا انك اتعرضت لحوارات كتير طالما الغرض منها دايمًا هو البحث عن شريك الحياة المناسب..

مش عيب أبدا انك تحط مواصفات للشخص اللي عايز ترتبط بيه (حتى لو كانت مواصفات تبان للبعض انها مستحيلة) مافيش حاجة اسمها مستحيل على رب العالمين، بس انت خد بالك ان اذا أردتها عائشة فكن لها محمدا، يعني ماتبقاش انت ابن ستين في سبعين ومابتحاولشى تعمل حاجة عدلة في حياتك وعايز ربنا يكرمك بالهور العين يعني!..

مش معنى ان واحدة جميلة وعجبك شكلها انك ترسم في دماغك الصورة اللي كلنا عارفينا بتاعة التعارف والعيلة وشكل ولادك المستقبليين

ممكن يكون فيه "إعجاب من أول نظرة" لكن مافيش حاجة اسمها "حب من أول نظرة".. ماتسمعشى من أى حد يقولك نصيحة بتبدأ بـ "دا أنا لما كنت في سنك.." فى الحوارات المتعلقة بالحب (حتى لو كان أبوك) ، لأن فى الغالب أى نصيحة بتبدأ بالجملة دى بتبقى الحاجة الوحيدة فيها الصحح هى النص الأولانى بس (انه كان في سنك في يوم من الأيام).

أنا يمكن ماأكونشى مدرب عاطفى أو خبير علاقات عشان أقول لك تعمل ايه وماتعملشى ايه.. بس اللي متأكد منه انى عالآقل جريت واتعلمت، فلما أقول لك حاجة ياريت ماتستخفش بيها عشان يمكن في يوم من الأيام تشكرنى.. لو انت عايز تشوف الحب زى ما هو فى الأفلام يبقى ده اختيارك وانت حرفيه، لكن أوعدك انك هتفضل تلف وتدور ومش هتلاقيه، عشان فى الواقع غير فى الفيلم.. على أرض الواقع الحب يعنى "نجاح" وتعب وتحمل مسؤولية، ماهو مافيش أب هيديلك بته من غير ما يتأكد انك تستاهلها.. انت نفسك مش هترضاها لأختك.. ولا ايه؟

آخر نصيحة.. ودى اعتبرها من أخوك الكبير (أو الصغير): بطل تشوف الدنيا من برة بس، حدد أولوياتك، وشوف انت عايز ايه.. لو خلاص قررت ان هى دى

البنيت اللى هتكون مراتك.. قل لها كده.. عرفها كده.. اثبت لها انك عايزها.. وبطل
تفكر كثير فى العواقب وتوكل على الله وسبب النتيجة بعدها على الله.. وخذ بالك
ان الوقت اللى بيعدى ما بين اعجابك وحبك للبنيت دى وبين انك تقول لها على ده
بيتناسب "طرديا" مع نجاح الموضوع أو فشله.. كل ما الوقت زاد كل ما الموضوع
هيفشل أكثر، وكل ما دماغك هتفضل تودى وتجبب وتفضل تخترع لك فى أسباب
عشان تقول "لا.. أكيد مش هينفع".. لآخر مرة هاقولها لك.. كفاية جُبن.. ماتبقاش
جَبَان.. وافتكرا انه رغم انى ممكن أكون جرىء فى طرح تجارى، ويمكن ناس تفتكر
ان ده قهور.. بس صدقتى، يوم ما هتتخلص من "خوفك" من الفشل، خوفك من
الخسارة، خوفك من ان يظهرلك أعداء جدد، خوفك من رأى الناس فيك.. "يوم
ما تبطل تخاف".. هتعرف انت مين وتقدر تعمل ايه.. وساعتها افتكرا كلامى/
افتكرى كلامى لما أقول لك "هتضحك قوي على ماضيك" وتستغرب: "هو أنا
ازاى كنت عبيط كده"!!

حرام ولا حلال.. بنفسى أعرف!

الفصل ده أنا مش هاتكلم فيه عن ايه اللي حلال وايه اللي حرام.. ده ببساطة لأنى "مش شيخ" .. أصل ما فيش شيخ بيلعب جيتار وكمانجا أصلا، لكن أنا شاب زيك يا ولد وزيك يا بنت مريت بمسائل كثير من النوع ده في حياتى وكنت عايز أعرف إذا كانت حلال ولا حرام، وإذا كنت واثق من رأى الشيخ اللي قال لى كده وللا لأ.. الفصل ده تحديدا عشان ما طولشى فى المقدمة أكثر من اللازم: هاتكلم فيه عن رحلتى مع الحلال والحرام.. الرحلة اللي انت وهى طلعتوها قبل كده كتبـرر ولسا ياما هاتظلموها، وفي كل مرة بتحتاجوا "دليل سياحي معاكم"، الدليل ده ممكن يكون صح ويوصلكم لبر الأمان.. او يليسكم فى الحيطه. من الآخر وقبل ما أى واحد متشدد أو ضيق الأفتق أو معدوم البصيرة يطلع يقول لى "ما تفتيش فى الدين" .. انا ماباقولشى رأى من ناحية الدين، أنا هاناقش معاكم رأيكم الشخصى أو اللي كان يببجى فى دماغك وكل اللي كنت بتحنن بيه لما كان يقى نفسك تستفسر عن أمور معينة فى حياتك من وجهة نظر "حلال ولا حرام"، الأمور اللي حيرتنى بس.. مش كل حاجة طبعاً.

المزيكا والمعازف:

زى أى شاب مصرى أو عربى جات عليه فترة من فترات حياته وقرر "يتدين"، يسمع شرايط كاسيت أو يتفرج على برامج دينية لبعض الشيوخ "اللى ببيزعقوا جالاهم" ويتكلموا فى مواضيع زى "عنااااب القبر" أو "جهنم وبئس المصير" ، قرر فجأة أنه يتخلص من كل شرايط الأغانى بتاعتوا أو اللي على الكمبيوتر أو انه "يكسرها فعلاً" عشان ديه فجأة بقت فسق وفجور. زى أى شاب مرة واحدة بقى

يشوف كل المغنيين والممثلين الاستعراضيين "هشتك بشتك" .. زى كل دووول ..
انا مریت بالوضع ده .

بدأت مع الجيتار والكمانجة كانت صدفة .. بداية بأنى في عيد من الأعياد
كانت العيدية زيادة شوية، وكنت مش عارف أودى الفلوس دى فين، فقررت انى
هاجيب "جيتار" . كان جيتار رخيص، لكن أهو جيته وخلص، ومع الوقت قلت انى
طالما جيته يبقى مش هاعلقه فى البيت يعنى وأكيد لازم أستعمله .. من هنا بدأت آخذ
دروس وأتعلمه أنا وواحد صاحبي . مع الوقت لاقيت نفسى بدأت أحترفه، وشوية
شوية دخلت على آلة تانية (اللى هى الكمانجة) .. لكن حصلت حاجة غريبة أوى،
حاجة خليتنى أعيد النظر فى النقطة ديه من الأول . أخويا عبدالله فى مرة لاقيته بيقول
لى: "يااااه .. فاكر ياد زمان اما كنا فى السعودية وكنا بنتتريق على فلان وفلان وانهم
يبلعوا جيتار وعيال "سيس" .. ادينا بقينا زيهم!!!" .. الحقيقة هو قالها بهزار، لكن
الكلمة سكتنى شوية وقعدت أفكر .. هو ايه اللى حصل!؟

موضوع المزيكا من المواضيع اللى علماء كثير اتكلموا عنها، فى منهم قال ان
المزيكا فى حد ذاتها مش حرام وانما "الكلام" الخادش للحياه والعاطفى اللى
بيذهب العقل هو اللى حرام فى الأغنية .. وفى شق تانى بيقول لانا ده الموسيقى أو
"المعازف" هى اللى حرام والكلام مش حرام ومن هذا المنطلق بقى فيه أناشيد
(الصراحة أناشيد خنيفة ولو يطلوها بصراحة هيبقى أحسن من وجودها أصلا)، أو
الشعر مثلا ما هو كلمات بس وأول ما يتحفظها موسيقى بقى حرام، مع ان الكلمات
برضه هى كمان ليها تأثير قوى جدا على المشاعر ولا نقل أهمية عن الموسيقى .
فى موضوع كمان حيرنى جدا فى مسألة المعازف .. اذا كانت الموسيقى هى اللى
حرام مش الكلام هو اللى حرام، طيب ليه بتلاقيها عادية وحلال ومش حرام فى

أغاني "سامي يوسف" أو "حمزة نمرة" أو في مقدمة برامج "مصطفى حسني" أو "الدكتور عمرو خالد"؟؟ مع ان الناس دول المفروض انهم دعاة ويتكلموا في الدين والمفروض ان مسألة زى دبه ياخذوا بالهم منها.. ولا هو بقى هيبقى الموضوع زى ما الشيوخ السلفين يقولوا "تميع للدين"؟؟

الحقيقة أى حاجة فى الدنيا سلاح ذو وجهين.. ممكن تستعمله صح وممكن تستعمله غلط.. ممكن تستعمله في أغاني هادقة زى أغاني "سامي يوسف" ودى مااعتقدشى ان فيها أى إغراء أو ملهيات عن ذكر الله خالص يعنى.. أو انك تستعملها غلط بقى زى الأغاني اللي احنا عارفينها أو في كباريه أو الفيديو كليبات الزبالة اللي بنشوفها. زى ما قلت قبل كده انى عمرى ما ندمت على حاجة عملتها، ماندمتش على انى عزفت على آلة موسيقية.. عالأقل لأنى فكرت واتعلمت وسألت، والأهم من ده انى بدل ما كنت بأتريق على المغنى فلان الفلانى اللي بيفتح القميص وشعر صدره بيجنن البنات وماشى بالجيتار فى المصيف، دلوقتى عرفت انه رغم أى حاجة فهو بنى آدم زى بالضبط ووارد انه يغلط.. مش معنى انه بيطلع بالصورة ديه بيقى هو كده، ولو عايز تحاسب حد أو تنتقد حد عالسلك ده يبقى تنتقد اللي "خلاه يعمل كده".. المخرج اللي بيخرج له الكليب ده ويطلع كده عشان شايفه خامة ممتازة للـ "سيسنة"، انتقد المجتمع اللي كل ما يشوفه بتريق عليه ويعامله على انه لا يمكن يتغير.. وده بيخليه يعند أكثر ويقول من جواه "طرز فى الناس، المهم انى راضى عن نفسى، ان الله لا ينظر إلى وجوهكم ولكن ينظر إلى قلوبكم" وللأسف بدل ما يحسن من نفسه، يستسلم للمخرج اللي بيظبطه فى كليب كل مرة بيطلع أسوأ من الأول.. وده اللي خلى مثلا الناس تاخذ في بالها ان أى حد يلعب جيتار ما هو إلا شاب "سيس".

ما ترسمشى "بور تريهات وجوه" عشان حرام

من أكثر المسائل اللى حيرتنى وخلتنى أسأل كتيـــــر وأبحث الموضوع ده.. ده لآنى ببساطة فنان، وأى فنان أو حد بيرسم أكيد مر بالتجربة دى.. انك تلاقى ناس فجأة كده بعد ما كنت بترسم لهم بور تريهات يقولوا لك: "خد بالك ان رسم الوجوه حرام"!!! أو واحد صاحبك مثلا كان عايزك ترسمه وأنت ماكانتشى عندك وقت فاعتذرت له، يقوم يقول لك: "طب على فكرة بقى أصلا رسم الوشوش حرام.. والملايكة مابتدخلشى بيت فيه صور" .. طب أنت يا!!!! حيلتها جاي تقول لى دلوقتى اتها حرام؟؟؟ ماكانتشى حرام لما كنت هارسمك وبقت حرام لما قلت لك لا؟؟؟..

لكن أنا فعلا أعرف ان فيه حديث بيقول ان التصوير حرام.. إلا ان قعدتى فى السعودية والدين اللى درسته بالتفصيل خلوا عندى عادة انى لما أقرأ حديث لازم أقرأ معاه مناسبة الحديث ده والظروف اللى ذكر فيها. من هذا المنطلق قررت أبدأ رحلة البحث عن الحقيقة، وبدأت من الانترنت. لو دورت عالانترنت على فتاوى بصفة عامة، يبقى لازم تاخذ بالك كويس قوي من المصدر.. لأن فيه مصادر ممكن تؤخذ من "مذهب شيعى" أو أى مذهب تانى أو انك تلاقى واحد أصلا حاطط رأيه هو (هى جات عليه يعنى؟).. بعد مرحلة النت بتبدأ تنوغل أكثر وتحب انك تتأكد من الفتوى صح، فتبدأ تسأل شيوخ. واحد صاحبي كان دايمًا يقول لى: "فكك من

شيوخ الجوامع العادية.. لو عايز فعلا رأى تمشى عليه وأنت متظمن، عليك وعلى الأزهر.. دار الافتاء.. بس ازاي أتق في رأى الأزهر وهو نفس المكان اللي أجاز في الأول حوار "كيونت" وبعدها قال ان هما ما كانوا فاهمينها صح ورجعوا حرموها تاني؟؟ أنا مش قصدي خالص انى أشكك في حد، لكن قصدي ان المسألة بتاعة البورترية من زمان وهى منطقة خلاف بين العلماء.. في منهم قال انه "يجوز رسم الوجوه مالم تشتمل على اظهار مفاتن أو تمجد شخصيات فوق مستوى الخالق- والعباد بالله- زي تمثال بوذا أو التماثيل اللي بتعبد" وفي الحالة دي (لو هنعمل بالقول ده) يبقى مايفعشى أرسم واحدة مش محجة لأن شعرها من مفاتها، وفي رأى تاني يقول "لا يجوز ووز ويحرم رسم أى وجه.. بل أيضا لا يجوز التصوير بكاميرات رقمية ولا تعليق صور كاميرات على الحائط" وده طبعاً الرأى السلفى اللي أصلاً مانع حتى التصوير بالكاميرا.. وفي رأى ثالث بقى يقول ان "كلمة: التصوير أو الصور اللي ذكرت في الحديث الشريف كان المقصود بيها (التماثيل المنحوتة) وليس الصور ثنائية الأبعاد" لأن التماثيل كانوا يبعدوها زمان..

صداء..... صداع جامد كان في دماغى من كثر التفكير، ولأنى كنت ولازلت مقتنع ان ربنا سبحانه وتعالى لما بيحرم حاجة لازم يدي لك سبب مقنع (لأن الله لا يُعبد بانجهل) وان العلم أساس كل شىء.. كنت دايمًا لازم أسأل العالم اللى يسأله عن فتوى عن سبب التحريم، ومن حقى عليه انه لما يدي لى تحريم انه يوضح لى السبب، إلا ان الشيوخ ضعاف الحجّة لما ما يلاقوش تفسير ليك يقولوا لك: "يا أيها الذين آمنوا لا تسألوا عن أشياء إن تبد لكم تسؤكم".. ونسيوا ان الآية ديه معناها عدم السؤال عن "الغيبيات" اللى لا يعلمها إلا الله وحده، واللى احنا نتعرفها بس يوم القيامة لما ربنا يكشف لنا المستور..

آخر أما تعبت من كثر التفكير، ولأني عايز أرضى ربي ونفسي ألاقي حل..
 قررت أصلى استخارة وأدعي ان رينا يهديني ويوصلني لحل جذري، وهو أعلم
 باللي جوابا بقى أكثر من غيري وعارف ان في نيتي خير.. واحدة واحدة لاقيت نفسى
 ببعد شوية شوية عن رسم البورتريه، لاقيت ان في حاجات تانية تستاهل برده انها
 تترسم وأعبر عنها، حاجات فيها تحدى للفنان فى كل الجوانب التانية.. الموضوع
 ما بقاش زى الأول بالنسبة لى، ما بقاش هوس بأتى أرسم وشوش وخلص..
 واحدة واحدة بقيت أبعد لوحدى، كأن رينا بيدرجنى براحة أو يبشغلنى عنها
 بحاجات تانية. وعشان أجيب من الآخر كده: فى حديث عن الرسول -صلى الله
 عليه وسلم- يقول «اجتنبوا الشبهات».. الشبهات ديه هى الحاجات اللي واقعة في
 منطقة وسط ما بين الحلال والحرام.. ممكن تستعملها بطريق حلال (زى انك ترسم
 وشوش عشان دراسة لو انت في كلية طب أو جراح تجميلى وتدرس تشريح، أو
 انك بتشتغل مثلا في مكافحة الجريمة وترسم وجوه المشتبه فيهم بناء على أوصاف
 بيديها لك المجنى عليهم).. أو تستعملها بطريقة حرام (زى انك ترسم بنات وتظبط
 بقى وتعيش حياتك وتعمل حبيب على كل واحدة).. لو انت مش متعرف تظبط
 نفسك فى الحلال بتاعها، يبقى يستحسن تبعد عنها وتجنبها لأنها فى الحالة دي
 شبهة.. ومن ترك شيئا لله، أبدله الله خيرا منه.

مش شرط تكون محترمة عشان محجة

فاكر زمان لما كان حد يسألك يقول لك ايه مواصفات البنت اللي هتتجوزها؟ وكنت بترد عليه دايمًا أو في الغالب بتقول له مجموعة صفات من ضمنها انها لازم تكون «محجبة»؟؟؟.. اكيد في الزمن ده الوضع اختلف.. لأن دلوقتي بقينا نسمع الجملة ديه كتير: «على فكرة ممكن تكون مش محجبة لكن بتلبس محترم وهي محترمة جدا».

الكلام ده حقيقي، وأنا شخصيا زمان كان لازم شرط من شروط اللي هاتجوزها انها تكون محجبة.. لكن هو يعنى ايه حجاب أصلا؟؟؟.

الحجاب هو حجاب مفاتن الجسم والحشمة، والحجاب هو «حياء».. دى أبسط كلمة ممكن توصفه.. الحياء اللي يخلى أى راجل فى الدنيا يحترم الست من غير حتى ما ترد هى عليه ولا تضطر تقوله «احترم نفسك».. انا عارف ان فيه بنات هيزعلوا من الكلام ده.. وفيه منهم هيتهمونى بعدم الحيادية وان صوابى ايدى مش زى بعضها.. انا أسف والله مش قصدى، لكن قصدى ان اللى يبلسوا حجاب «غلط» هما اللى ادونا انطباع غلط من الأول، وبقينا فعلا بسببهم نتقن ان الحجاب في مصر والوطن العربى دلوقتي - بقى للأسف - حجاب الرأس وليس حجاب الخلق والحياء. فى نقطة كمان مهمة أنا عن نفسى لاحظتها.. ان دايمًا البنات ال «مش محجبات» ولكن يطبقوا أحكام الحجاب «الأخلاقية» (يعنى هى شعرها لكن هدومها محترمة

واسلوبها محترم) بتلاقيها دايمًا في يوم من الأيام «اتحجبت بعد كده» بحق وحققي
 ويمكن كمان تتنقب أو تلبس إسدال.. ده لأنها في الأصل «متدينة» ومع الوقت
 بتحاول انها تطبق تعاليم الدين واحدة واحدة، لكن هي أصلاً متدينة وتصلي وعارفة
 ريتا يمكن أكثر منك كمان، لكن الفرق انها «اختارت تتحجب عن اقتناع». في شيخ
 من السعودية مشهور جدا قال: «ليست المتبرجة فاجرة وكافرة.. هو إثم وذنب،
 إنما لا يجوز على الإطلاق تكفيرها».. ده برضه ينطبق على الشباب اللي بيطلعوا
 «ألقاب» عالبنات اللي مش محجيات (خصوصًا لو كانت حلوة).. ألقاب للأسف
 تتدرج تحت «قذف المحصنات» ديه مصيبة.. زى انه لمجرد انها مش محجبة تسمع
 ألفاظ زى «يا عم دى بنت ستين..» أو «دى تلاقيا..» أو «أو أو..» لمجرد انها مش
 محجبة يبقى تجوز معاملتها على انها «من أسرى الحرب وحلال فيها أى حاجة»
 (وهي قد تكون أحسن منك بكتي—ر).

اذن ده كان رأي الشخصى في انى عايز واحدة لازم تكون محجبة.. اللي
 خلانى أغيره بعد كده هو انى فعلاً عرفت بنات منهم زملاء عمل وكلية وجيران
 وفي كل مكان روحته كانوا بيثبتوا لى انها والله ما بحتة الاشارب اللي عالراس ولا
 حتى بالعباية اللي للأسف بتبين أكثر ما بتستر، كانوا بيثبتوا لى ان مش شرط أبداً انك
 تكونى مغطية راسك عشان تبقى «محترمة».. وان هي مسألة وقت بس لحد ما
 هتلاقى نفسك مرة واحدة.. اتحجبتى.

فى حاجات كثيرة في حياتى أنا وأنت وهى هتفضل طول عمرها لغز بالنسبة
 لنا.. هتفضل شاغلة تفكيرنا وبتزقنا في منطقة «حرام ولا حلال نفسى أعرف»، وياما
 هتقابل آراء كثير وفناوى كثير (أو خيلنا نقول هساااوى) لكن أهم نقطة بقى عايز
 أقولها لكم.. خدوا بالكم من «الرخص فى الدين».. الرخص فى الدين، أو زى ما

يسموها في الفقه «الأخذ بأخف الحكمين» هي أسوأ حاجة بقينا نقع فيها في الزمن
ده.. انك تاخذ رأى كذا عالم دين وشيخ، وتستمر في تجميع الآراء لحد ما تلاقى
أخف رأى فيهم (أو الرأى القريب لهواك انت) وتعمل بيه.. بعدين تتحجج وتقول
«ما هي دي فتاوى برضه!!!» خذ بالك من النقطة ديه.. اللهم بلغت، اللهم فاشهد..
ربنا يهدينا كلنا بقى.

صراع «الشبراوي والفن التجريدي»

مين فينا ماسألش نفسه: «ليه الفنانين التجريديين مجانين؟؟».. بما انى قررت انى هاشتغل دكتور أسنان وهاكمل فى الفن لحد ما يجى اليوم اللى هيقى لى أسلوبى الخاص فيه وأبيع لوحاتى بملايين الجنيهات (إن شاء الله يعنى من غير مقاطعة).. كان حتما ولا يد انى أتعرف فى الطريق على نوع الفنانين ده... «الفنانين التجريديين». ماخيش عليكم، أنا كنت بأعتبرهم مجانين رسمى، زى بالظبط ما الإعلام الجميل بتاعنا شوهم قدامنا وحتى ماكلفشى خاطره انه يتكلم عنهم «بصرحة» ولو مرة واحدة.. على فكرة أنا مابانكلمشى عن البرامج والكتب والكلام ده... أنا باتكلم عن السلطة الحقيقية للإعلام، القوة اللى بتوصل أسرع من الضوء لقلوب الناس وعقليتهم.. أنا باتكلم عن الأفلام. الأفلام اللى بتعرض أو اللى بتتج بأيدى مصرية كلها بتكلم عن الفن التجريدى على انه حاجة متعلقة بالجنون والتطرف والحرية المبالغ فيها فى التعبير، وانك ممكن تعمل أى حاجة عشان توضح فكرتك.. ده حقيقى فعلا، لكن مابيقاش بالشكل ده يا حاشا!!!.. الإعلام أعطى صورة سيئة جدا للفن والفنانين التجريديين، حتى لو واحد فيهم طلع وقال لك: «ده هزار وكوميديا يا عم»، إلا ان مايمينش كل ده، اللى يهمنى ايه اللى بيوصلى أنا كمشاهد.. كأنك بالظبط جيت اتنين بيهزروا مع بعض هزار بوابين، وبعد كده اللى ضرب التانى على قفاه يقول له «حبيبي والله انت عارف كده كويس، دأنا بهزر يا ملك»!!!.. اذن خلينا متفقين على ان بسبب أفلامنا الجميلة بقت كل الناس (بما فيهم أنا في مرحلة من مراحل عمرى) فأكرة ان الفنانين التجريديين دول مجانين.. أو

منحليين.

قبل ما أفهم معنى ايه فن تجريدي.. كنت معتقد ان أى شخصطة وأى ضربة فرشاة
 وخلص هتزدى إلى لوحة تجريدية عبقرية! وان كل ما أزود الجنون والتعقيد فيه
 ..كل ما اللوحة قيمتها تزيد. في مرة كنت في قعدة فنية مع فنانين كبار قابلتهم بالليل
 بعد العيادة.. كانوا بيتكلموا عن معرض جديد عايزين يعملوه (معرض تجريدي)..
 الحقيقة أنا كنت عارف من الأول انى مش هينفع أشارك فيه عشان دول قدام
 وأكثر خبرة بكتيـــــ منى وأكيد عايزينه يبقى بمستوى معين، لكن لما عرفت انه
 «تجريدي».. حمدت ربنا وبوست ايدى وش وظهر اتى مش معاهم، أصل مش طالبة
 هبل وأنا أصلا فنان انطباعى وواقعى مش تجريدي (الكلام ده قبل ما أفهم معنى ايه
 فن تجريدي بجد).. من كتر ما كنت بأضحك عليهم، قلت أدخل معاهم فى الحوار
 بفكرة (أى هبل بقى ما أنا أصلا ماكتش مقتنع بيهم).. كان فيه فنان سورى منهم
 اقترح اقتراح للوحة بصراحة استفزنى أنا والفنانين المصريين اللى كانوا معنا بطريقة
 مش طبيعية!!.. البيه كان عايز يعمل لوحة عن «الزبالة فى مصر المحروسة»، كان
 عايز يعمل لوحة كبيرة قوي عبارة عن مقلب زبالة فى مصر وكلها بقى اكياس زبالة
 وعيال معفنة.. كنا متضايقين جدا منه، وانا شخصيا كنت عايز أقول له: «يعنى انتى يا
 كميلة سايبة زبالة الدنيا كلها وجاية تعبرى عن زبالة مصر؟؟؟».. ساعتها رميت له
 كلمة كده فقلت له: «طب احنا ممكن كمان عشان نعبر تجريديا عنها اننا مانرسمشى
 بزيت ولا ألوان مية ولا أى حاجة.. احنا نرسم بفضلات كلب أو قطة مثلا عشان
 الريحه تبقى مقلب زبالة بحق وحقيقى؟؟؟ ايه رأيك بقى؟؟؟»

وقلتها له وانا قاصد أقولها بنبرة استهزاء.. الله يمسيه بالخير بقى صديقى وحبيبى
 وأخويا الفنان طارق زايد (مدير ومسؤل الفنون بساقية الصاوى) فهم أنا عايز أقول

أهم الأسباب التي كرهت الناس في الفن التجريدي، لأنهم ببساطة أظهروه بصورة غلط تماما.. وبقي فعلا بالنسبة لينا «مجرد شخايط».

الفن هو أسلوب حياة.. مهما عملت ومهما حاولت، فنك ولوحاتك تعتبر عنك. لو انت مبهدل في حياتك، لوحاتك وأعمالك هتبقى كده غصب عنك.. لو انت منظم ودقيق جدا في كل حاجة بتعملها، تأكد يرضه ان لوحاتك هتكون بالمثل.. لو انت جرىء ويتحاول دايما تجرب حاجات جديدة، ده هيبان في اختيارك لألوانك (كل شوية هتتعجبك بالية ألوان جديدة وبتجرب تشتغل بيها).. القصد ان حياتك هي اللوحة التي انت بت رسمها.. في ناس بتحبها «ملونة».. وفي ناس بتخافون تلونها لا «تعميها» وتثيل الدنيا (فيخافوا ويفضلوا يرسموا أبيض وأسود طوووول حياتهم).. في ناس لوحاتهم تبان معقدة وهم عايزنها معقدة عشان التي يشوفها بحتار فيها وفي عبقريتها.. مع انها الصراحة.. ولا!!!!!! أي اندها!! في ناس بت رسم لوحات كثيرة، بتبالغ في استعمال ألوان حزينة أو انطباعات رومانسية بانسة.. وكأنهم بـ «يشحتوا» الحب والعاطفة والاهتمام..

بالنسبة لي ^{١١} شخصيا، دايما بركز في اللوحة على حياة الفنان التي رسمها.. زي البني آدمين التي باتعامل معهم، كل واحد باعامله على أساس لوحته (حياته).. خذ بالك من طريقة رسمك، اختار أدواتك صح، ألوانك صح، مواضعك صح وما تفكر شئ تقلد غيرك في لوحاته (حياته).. عشان مافيش حد هياخد بصمة أو مكان حد، وافكر ان «الإنسان مخير وليس مصير».. فماتجيش بعد كده وتقول «ليه يارب حياتي عاملة كده».. انت التي اخترت.

«الفن التجريدي يا عزيزي عامل بالظبط زي الستات.. عمرك ما هتفهمه، ومع ذلك.. لوحته بتباع بأغلى ثمن ولها مكاتنها بين كل الأساليب وفي كل المتاحف..»

زى الست بالظبط... ماتعرفشى نفهمها، ولا تعرف تعيش من غيرها!!!».

ازاى.. ازاى تحول اللين لـ«بلاستيك»

ارجع بالزمن ورا كده.. أيام ثانوية عامة.. لآ تانية ثانوى مش تالته.. ايسوة كدا. فاكرا لما كنت بتمنى انك تبقى حاجة؟؟... أى حاجة غير اللى أهلك عايزينها طبعاً.. فاكرا لما كنت بتذاكر المواد اللى بتحبها بس، والباقي كنت بتذاكره وانت قرفان من نفسك؟؟... طب فاكرا «الكيمياء العضوية»؟؟... ولا أقول لك على حاجة أحسن.. فاكرا السؤال المشهورووور قوي فى الكيمياء العضوية اللى بيقول «كيف تحول المركب كذا الى المركب كذا»؟؟ اوعى تقول لى نسيته!! ده كان من أمتع الأسئلة اللى الطالب المصرى كان يحب يحلها فى الكيمياء أو فى المناهج عامة كلها.. السؤال ده كان السبب فى انى كنت عايز أطلع عالم كيمياء فى يوم من الأيام، وكالعادة أهلى سمعونى كلام زى «يابنى عالم ايه وهيا ايه.. ماتتلم يا حمادة.. يابنى بتوع كلية علوم بيطلعوا مدرسين فى الآخر».. نفس الكلام اللى قالوهولى فى حوار فتون جميلة بالظبط. أنا ماسمعتش كلامهم كالعادة وفضلت أسرح بخيالنا الى العالم.. لدرجة انى فعلاً صدقت انى عالم كيمياء عضوية، لآ وايه.. خطرت فى بالى فكرة جهنمية!!!.

أى حد فينا لما ييلاقى نفسه متمكن من مادة بيذاكرها.. اول حاجة بتخطر فى باله «انه بقى جالامد جدا فيها» وانه أكيد لاقى نفسه فى المادة ديه. بالنسبة لى أنا

وطلبة كثير في ثانوية عامة كانت المادة ديه هي «الكيمياء العضوية»، وبالأخص السؤال بتاع كيف تحول المركب العضوى كذا لكذا. السؤال ده كان بيمثل تحدى من كل النواحي، وممتعة انك تفضل تستعمل معادلة ورا معادلة ورا الثانية (حتى لو كانوا غلط مش مشكلة المهم انهم يوصلوك للحل) وانك توصل للحل فده في حد ذاته إنجاز.. إنجاز بتحس بعده انك «المحقق كونان» أو «المفتش كورومبو»، كأنك حلّيت لغز من ألغاز الكون. ماتستغريوش من الكلام ده، اللي درس كيمياء عضوية في مصر (أوبرة مصر) أكيد كان بيحب السؤال ده. لو انت بقى بتحب الكيمياء قوى، هاتلاقى نفسك بتاخذ المستوى الأعلى من الموضوع.. انك تبدأ تطبق المعادلات ديه عملياً. تاخذ معادلة معادلة وتجرب تعملها.. مين فينا عارف المعادلة بتاعة الصابون ومعملهاش؟؟.. اللي فاكرها منكم كانت بتقول انك لو حطيت «زيت + صودا كاوية» وقلبتهم لمدة ٢٠ دقيقة في اتجاه واحد (عشان الصابون مايكلكعشى) هيديلك صابون مكعبات (صابون صلب).. ولو بدلت الصودا الكاوية ب «بوتاسا كاوية» الناتج هايكون «صابون حلاقة» (أنا بنفسى جربتھا). المهم ان ده خلاى أسرح بخيالى فى الكيمياء والسبب الحقيقى للأسف فى ده اننا فى مصر طوووول عمرنا بتتعلم الحاجة من غير ما نتعلم بنستعملها فى ايه. عمرك سألت نفسك الـ «جا» والـ «جتا» بتاعت الرياضيات لازمتها ايه؟؟؟؟ مع إن ليها لازمة عميقة جدا فى علوم المجرات وفى حاجات ثانية عرفتها لما بطلت أتعلم «الزبالة» اللي بتتعلمها فى ثانوية عامة.. لكن هتقول ايه.. لا حياة لمن تتادى.

خال والدتى.. الأستاذ عاطف، هو سفير سابق وحاليا متقاعد كان بيشتد دايمًا بالصينيين، ولما كنت بأسأله عن ده كان يقول لى «يا حبيبي كل حاجة عندهم ليها فائدة.. حتى لو كانت فائدة درجة تالته هتفضل فائدة» وحكالى حوار بيحصل فى

الصين هو اللي لفت انتباهي للفكرة العجيبة اللي جاتلى. قال لى ان في الصين ما بيرموش حاجة، كل المخلفات عندهم ليها لازمة.. حتى الزيت (زيت الطبخ) بعد ما يستعملوه ويتهرى من كتر القلى يستعملوه. لكن عشان العمل الجماعى هو بمثابة عبادة عندهم.. كلهم بيشاركوا فيه بانتظام. قدام كل بيت بيبقى فيه «زير» كل واحد بيحط فيه الزيت بتاعه اللي بيوظ من كتر الاستعمال، ولما الزير يتملى تيجى عربية تلمه ويعاد استعمال الزيت جه بس في صناعة صابون درجة تالته أو بجودة أقل يعنى.. منها يبقوا استفادوا منه ومنها ماترماش. فكرة هائلة مش كده؟؟! مع انها بسيطة لكن عالأقل تطبيقها سهل عالناس وفي نفس الوقت هما مش خسرانين حاجة.. أصل الصابون ده يتصدر للدل التعبئة (زينا بالطبط).

قعدت أدورها في دماغى ولاقيت ان احنا كمان عندنا حاجات كتير ممكن يعاد تصنيعها.. وفي يوم كنت قاعد في مصيف (فى الساحل الشمالى تحديدًا)، قاعد على كرسى أبيض بلاستيك (اللى انتم عارفينه ده) وماسك كوباية شاى بلبن والجو فى متهى السكروون.. مرة واحدة سمعت صوت عربية نقل!!! .. الكلام اللى هاقولوا ده غريب بس معلشى حاولوا تفهموه للأخر.. عارف لما تبقى طالع من امتحان وكنت بتتموت نفسك عشان تفتكر اجابة سؤال وما فتكرتهاش؟؟ ووانت قاعد فى الحمام أو سايق عربيتك أو قاعد ساكت والنور قاطع بعدها بكام يوم ومرة واحدة تكتشف الحل أو زى مايكون الوحى نزلك!.. ده بالطبط اللى أنا حسيت بيه!!!. كوباية شاى بلبن + كرسى بلاستيك + صوت عربية نقل + جو ها ادى... أنا قررت أحول اللبن لبلاستيك!!!!.

من غير شتيمه بس وقلة أدب وبالراحة كده عشان ما أردش عليكموا بسفالة.. هى الفكرة مجنونة عامة، وأى واحد هيسمعها هيقوللى «يا عم الناس غلابة.. دول

عايزين اللي بجيب لهم اللين من البلاستيك.. بس أكيد زى ما انت ذكى كده ومفتح.. انا كمان مش غبي عشان أعرض نفسى للسخرية.. الفكرة بمتهى البساطة ان احنا عندنا في مصر كميات لبن كبيرة جدا بتبوظ نتيجة التخزين الخاطيء ليها.. والأهم من التخزين النقل الخاطيء.. في ناس بيتبعوا أساليب قديمة في نقل اللين (أساليب بدائية جدا) زى انهم يحطوا قطع ثلج كبيرة في الكوتينر اللي بيتقل اللين مسافات طويلة.. مع المسافة الطويلة والحر الشديد الثلج بيذوب ويخفف اللين.. الناس اللي يشتره أو يشتريه وهى فاهمة عارفين كويس ان ده لبن وعليه مائة.. يفتكروا انه مغشوش أو صاحبه هو اللي قاصد ينشه عشان يبيع أكثر، فمحدث بيشره.. ناهيك بقى عن اللين اللي اتسوطن واللى اتلوث واللى واللى واللى.. الموضوع ده بقى للأسف مصيبة، وفيه كميات لبن مهولة بتترمي.. يبقى اذن بقى عندنا أول ركن في المعادلة.. ان فيه حاجة هترمي وهيعاد تصنيعها. تاني ركن في المعادلة هو «ازاي نحول اللين للبلاستيك؟».. طبعا احنا اتفقنا اننا هنشتغل على اللين البايظ، مايجيش واحد يقوللى بقى لااا ده بايظ وهيطلع بلاستيك بايظ!!!.. ده على أساس مثلا ان الحاجات البلاستيك اللي انت بتستعملها ديه ممسولة من بلاستيك كلها؟؟؟؟! ديه معموله من مخلفات الزبالة يابى.. فكرتى هنا بمعادلة بسيطة جدا.. اللين عبارة عن سكر لاکتوز + بروتين + حاجات كتير تانية ماتهمش البلد في حاجة.. كان فيه معادلة فالقبن دماغ أبونا بيها كانت «بتحول سكر اللاكتوز لحامض اللاكتيك».. من حامض اللاكتيك ده تقدر بمعادلة تانية (طريقة كيميائية تانية يعنى) انك تحوله لـ «بوليمر» (وحدة البلاستيك الأساسية).. من الآخر احنا عايزين نستفيد من اللاكتيك أسيد ده ونحوله لبلاستيك.

الفكرة قد تبان انها ساذجة، وتقريبا كل قرابىي وأصحابى اتريقوا عليّ فيها.. فيه منهم كمان اللي كان متأكد ان كل ده بسبب ثانوية عامة ودعوا لى بالشفاء كمان (دى

حقيقة).. لفيت كذا حنة في مصر عشان أعرض الفكرة، كل ده وأهلى مايعرفوش..
 وقرابيس طبعاً مش في بالهم. آخر مكان روحته أخذت تريقة جامدة جداً للدرجة
 خلنتى أزعت في واحد من الدكاترة وأقول له «لما انت مش عاجبك الفكرة قول
 لى ليه.. ادينى سبب يا أخى عالقل أتعلم منك ولا انتم ولا منكم علم ولا فائدة
 وماينوبنا منكم غير قلة الأدب والكلام الفارغ»!!!.. ساعتها الدكتور ده اتضايق
 جداً ازاي أكلمه كده؟!.. حطوا نفسكم مكانى، عمال ألف على كذا حد وأشرح
 له وأخذت تريقة من اللى يسوى واللى مايسواش.. حتى الجهلة بيتريقوا من غير ما
 يسمعوا. فى دكتور واحد بس هو اللى سمع الموضوع للأخر-ربنا بجزاه خير-
 عالقل سمعنى.. لما خلصت كلامى ابتسم وقال لى: «طيب انت كلامك هايل،
 وينم عن دماغ بتفكر.. بس يا فندم انت فكرت في كل حاجة إلا حاجة واحدة..
 حاجة مهمة كمان.. قتلته «ايه هي حضرتك؟!؟».. قال لى «تفكر مشروع زى ده
 لو اتعمل- وأنا واثق ان فائدته هايلة- هيجتاج مبلغ قد ايه؟؟ سواء الجهاز العملاق
 اللى هيعمل العملية أو العملية نفسها بالطاقة والمصاريف بتاعتها؟؟».. بصراحة هو
 كلامه مقنع، أنا فعلاً ما فكرتش في ده، لكن رديت عليه وقلت له «حضرتك أنا طالب
 ثانوية عامة لسه معلوماتى ضعيفة انما انتم ممكن تساعدونى أنا ادبتلكم الفكرة، انتم
 عندهم ناس بتفكر أحسن منى ويبقى مشروع مشترك، والله ما عايز فلوس!!».. قال
 لى «شوف بابو حميد.. انت دماغك نضيفة ووصلت للفكرة، لما توصل لطريقة
 تطبقها بيها بتكاليف متناسب معاها.. انا معاك وهاساعدك، لكن عشان ما أكبرشى
 في دماغك حلم عالفوضى، لو جيت معلومات أقل.. مش هتقدر تعمل لك حاجة»..
 ساعتها رجعت البيت وقفايا يفمر عيش.. لأنى حسيت الناس كلها خلاص،
 حتى الكلمة المحلوة مستكترين يجاملوك بيها. مرت الأيام والسنين وقربت أخلص

جامعة، بالصدفة بافتح الفيسبوك وقرأت خبر من الأخبار اللي بنلاقيها عالجنب دى.. الخبر كان مكتوب فيه بالنص: «شاب اميركى يكتشف طريقة للاستفادة من اللبن المتعفن واعداد تصنيعه لمنتجات بلاستيكية للاستعمال الخفيف»...!!!!!! ساعتها قلت لأخويا تعالى بص كده.. بيقول لك واحد امريكاني اخترع جهاز بيحول اللبن لبلاستيك!!! وانا وأخويا قعدنا نضحك.. وقرابى يضحكو!!!!!! واصحابى يضحكوووو!!!!!!، وقلبت بفيلم كرتون.

الخلاصة: الناس في مصر للأسف مايتعرفش بالاختراع ولا قيمته إلا لما بيتعمل برة.. لما واحد امريكى أو بابانى أو صينى يعمله. احنا كده، لما الواحد منا يجيله فكره (حتى لو كانت عبيطة) أحسن حاجة نعملها بيها.. اننا نطلع عليها نكت، وعلى صاحبها نكت وتريفة، ولما تسرق منه أو حد يكتشفها غيره.. نضحك عليه برضه ونتهمه بالغباء والنحس ونقول له «المنحوس منحوس.. لآخر المثل».. احنا شعب للأسف على رأى واحد صاحبي «نمووت فى النضاهة وندوووس فى الهياقة».. الموضوع ده عامل بالظبط زى اما أكون بأرسم لوحة والاتى واحد ذكى وانا لسه فى أول اللوحة بيقول لى: «ابيه ياعم ده؟؟ دى مش شبيهها؟؟» «ابيه بابا ديه ملخبطه خالص».. مع انه لو استنى شوية الصورة هتوضح، ولما بتحاول انك تتجاهله بتلاقى كلامه برضه مستفز.. واللوحه بتطلع سيئة. عشان كده أنا ساعات بأحمد ربنا اتى عشت برة مصر ١٠ سنين من أهم مرحلة فى حياتى.. مرحلة «التربية».. لأنى بقيت المتحكم وماحدث اتدخل فى أسلوب حياتى. المرة الجاية اللي جد يحاول يفرض رأيه عليك فيها، بطريقة فيها استهزاء.. قل له: «طرز فى رأيك»، وفى الآخر... هتشوف مين اللي هيضحك.

«خلينا أصحاب أحسن.. المعنى الحقيقي وراها»

«خلينا أصحاب أحسن».. هي الصخرة اللي تحطمت عليها آمال وأحلام تقريبا ٩٠٪ من شباب مصر والعالم كله في انهم يتجاوزوا البنت «اللى بيحبوها» (ما هو أكيد لو ماييحبهاش ماكتشى الجملة ديه هتفرق معاه بتلاته تعريفة). هي الجملة التي حولت ٤٠٪ من شباب العالم (بما فيهم مصر طبعاً!!!!!!) إلى «مرضى نفسيين» ومعقدين نفسياً وشافين ان كل البنات عايزين «ضرب الجزم» لمجرد ان واحدة بس قالت لهم «خلينا أصحاب احسن».. هي المحطة اللي شباب كثيرة نزلوا فيها والقطر هرب وسابهم ولسه في منهم عمال يجرى وراه لأن عنده أمل لمجرد انه فكر يغيرلها عن حبه وانه عايز يكمل حياته معاها.. نعم يا حضرات.. الجملة اللي أحبطت شباب كثير، زى الفل وأى واحدة في الدنيا تتمناهم، لكن للأسف قد يكون اختار الشخص الغلط اللي يحبه، فسمع منه الكلام اللي ما يحبوش.. نعم يا سادة، إنها: «خلينا أصحاب أحسن».

الفصل ده فصل شيق جدا، لأنه هيناقش حالة يمكن مافيش شاب ما عاشهاش في حياته (تقريباً)، واللى هيقول لى انه ماعداش بالمرحلة دى هيقى حاجة من اتنين.. يا اما انه اتجوز جواز صالونات وفي الحالة ديه هو اللي شافها وعجبته وعجبها وشكرا على كده وفي الحالة ديه أكيد فعلا ما جريشى (وإن كان في شباب قبل جواز الصالونات عاش تجربة من ديه).. او انه بيضحك على نفسه وعليك عشان مايانشى

انه ضعيف.. بس على فكرة انت كده مش ضعيف.. انت كده جبان.. او حاجة تالته
«ان رينا يكون رحمه من الاول».

الفصل ده ممتع وشيق وكل التجارب اللي فيه هي من الواقع.. الواقع اللي
عشته أنا شخصيا بلحمي ودمي.. وفاكر كل لقطة من مشاهده لقطه لقطه (ولا يمكن
انساهها.. زى ما انت كمان لا يمكن تنسى).. بس أنا اخترت انى أتعلم من كل ده
وأحوله لسلح فعال عشان ماتحطش فى المنطقة «القنطرة» دى تانى. وانت بتقرأ
الفصل ده أنا متأكد انك هتضحك كثير على مواقف معينة.. لأنك انت وانا عارفين
كويس قوي (بينى وبينك معنى من غير ما حد يعرف) انك عملت كده بالسيللى،
وكانت النتيجة زى ما ماقول لك بالاستيمير المربع. هاتكلم فى الفصل ده عن السبب
الحقيقى اللي يخللى أى بنت تحطك فى المنطقة دى.. منطقة «انت زى أخويا» (مع
العلم ان منطقة انت زى أخويا دى منطقة غويطة.. أغوط من خيلنا أصحاب.. ده
أنت كده اتمرغت فى الغويط قوى). مش بس كده، بما اتنا اتفقنا من أول الكتاب ان
الهدف منه انك ماتتعشى فى نفس الغلطات.. يبقى هاقول لك على كام حل «واقعى»
وبعدين حل «سحرى» ممكن يطاموك من الورطة ديه (بس ده بيعتمد على مدى
النيلة اللي انت تيلتها.. وعلى مدى انت دخلت لحدفين) أصل انت لو كنت دخلت
لـ«انت زى أمى» مثلا.. يبقى خلاص هاعمل لك ايه.. ما قدامكشى غير انك تتبرأ
سها وخلص.

القصة المعتادة:

الموضوع ببدا به انك بتشوف بنت شكلها حلو.. لازم يكون شكلها حلو لأن
زى ما اتفقنا الرجالة بيتشدوا الأول بعيونهم (دى حقيقة لا انا تقبل النقاش)، بعدها
ببدا «خيالك المريض» يصورك ان البنت دى هي اللي كنت بتعلم بيها، وتتخيل

بقى انها بتتعرف على مامتك وعيلتك وأنت كمان تتعرف على عيلتها وبتقضوا وقت ظريف مع بعض، ومش بعيد تتخيل أنك مخلف منها ولدين و بنت (ولد اسمه معاذ والثاني حمزة والبنت اسمها جازمين أو مورا).. كل ده بيحصل في جزء من الثانية الأولانية اللي بتشوفها فيها وتعجبك.. بتبسملها، هي بتبسلك.. تسلم عليها «هاى أنا فلان، انتِ عاملة ايه؟».. هي ترد «ازيك أنا فلانة الحمد لله كويسة».. وحدة واحدة تتعرفوا على بعض.. واحدة واحدة تذاكروا مع بعض (لو في جامعة يعنى أو درس)، واحدة واحدة فيسبوك بقى وشات للصبح.. رينا كرمك انت وهى وجبت «البلاك بيرى» و«بين بن ام» بقى يا عالمي يا ابن اللعية وعيش.. رينا كرمك أكثر واشترت موبایل «أندرويد» بقى يابن الغنية وركبت الـ«فايبر» والـ«واتساب» وانطلقت بقى معاها.. لحد ما جات اللحظة اللي الأمور كلها اتطورت فيها.. بدأت تحس ان الوقت المناسب جه وانك لازم تقول لها.. أصحابك كلهم بيزنوا عليك «يا عم اقلح بقى وانطق» واللى يقول لك «يا بنى خليك صريح، البت تحب الواد الصريح» وخلاص بقى كلهم بقوا «خيراء علاقات عاطفية».. وانت تقعد تحكى لكل واحد فيهم وتساله «أقول لها ولا ما أقول لها؟!!» أقول لها ولا ما أقول لها!!؟؟.. اعمل ايسه يا ولاد الكلب؟! وكل ما تسيب واحد فيهم في آخر القعدة تقول له «صاحبى.. دا سر بينى وبينك ما حدش يعرف وحياة أبوك!!» (و انت أصلا قلت لكل الناس).. ويبقى باين عليك لما بتحب حد من غير ما تقول.. احنا الرجالة كده، لما بتحب بجد، ببيان علينا أكثر من الستات وبتبقى عايزين نقول للعالميا كلها اتنا خلاص، لا قينا البنت اللي هتبقى مراتنا.. بتفضل بين القيل والقال وضغظك بيعلا وبتعرق وبتصلى استخارة أقول لها ولا ما أقول لها.. يا رب أنا بجهبا ونفسى انها هى كمان تطلع حاسة.. وبتاخذ قرارك وتقابلها مرة واحدة..

قصدي حاجة وحشة، لكن قصدي انك من جواك أخذت قرار انك «متصاحبها الأول
عشان تبني ثقة وطمأنينة، بالتالي هي تتظمن واحدة واحدة وهيبقى فيه بينكم قواسم
مشتركة ومع الوقت الموضوع هيزيد».. وبناء عليه بتلاقي نفسك واحدة واحدة بتتعرف
على صاحباتها وأصحابها، بتتعرف على كل الناس اللي حواليتها عشان توصلها بطريقة
«غير مباشرة».. يا عزيزي، انت غلط.. غلط.. غلط! .. اوعى تاخذ الطرق الملتوية أو
الجانبية، لو هي عاجباك من الأول وعايزها وناوي ترتبط بيها (نتيك خير يعني من الأول)
يبقى انسى اصحابها وصاحباتها وروح لها هي.. لازم من أول لحظة ومن أول نظرة كمان
هي تبقى عارفة انت عايز منها ايه عشان على أساسه كل حاجة هتمشي..

لكن تقول لي بقي احنا نتصاحب الأول عشان نعرف أخلاق بعض ونفضلوا
مقضيها «واتساب» وبالليل «فاير» ويوم الجمعة بعد الصلاة عال«فيسوك».. هاقول
لك الـ «واتساب» ده يبقى خالك، والـ «فاير» ده يبقى عمك وخليتنا بقي نقل أدبنا
على بعض.. لأن انت كده متوافر الـ ٢٤ ساعة × ٢٤ ساعة قدامها.. دا انت يا راجل
تقريباً أكثر من صاحبها.. وتقول لي بعد كده مش عايزها تعتبر انكوا اصحاب..
أمركم عجيب أيها المصريون، تؤمنون بأشياء غريبة!!!

كاتم الأسرار:

كاتم الأسرار من الشخصيات اللي بيصعبوا عليّ جداً، لأنى عارف نهايتهم فى
الغالب بتبقى عاملة ازاي.. كاتم الأسرار ده أنا شخصياً بأشبهه بتشبيه كده غريب
شوية استعملونى فيه.. ده عامل بالظبط زى «كاتم الصوت» بتاع المسلسل.. فإيدته
الوحيدية انه بيكتفم الصوت لما الرصاص بيطلع.. لكن تفتكر لو استعملته لوحده،
هيضرب نار؟؟؟.. هيقفل حد؟؟؟.. فهمتوا؟؟!!.. ببساطة كاتم الأسرار هو الشخص
اللى عنده كل أسرار بنات الدفعة، وبالأخص البنات اللى بيحبها.. للأسف بيبي فاك

انه كده برنس وانه عارف عنها كل حاجة وهي كده بتثق فيه.. الحقيقة انها بتثق فيه فعلا.. جدا كمان.. جدا لدرجة انه «أخوها».. من الآخر كل مهمته في حياتها زى كاتم الصوت للمسدس.. انت تعديلت معاها مرحلة الطمأنينة لدرجة انها مابقتشى منجذبة ليك أصلا كشخص تتجوزه.. انما انت فعلا بقيت أخوها.. خصوصا بقى يا حلو لو كانت هي ماعندهاش اخوات ولاد.. يبقى انت كده «الأخ الروحى». عشان ان خاطرى، لو سمحت.. من فضلك.. «وعى تبقى كاتم أسرار»..!

الموضوع ده بالضبط عامل زى حوار جواز الأقارب.. «استحالة» (و بقولها لك على مسؤوليتى الشخصية) انك تلاقى اثنين أقارب متجوزين إلا ولو سألتهم هيقولوا لك ان تقريبا مايشوفوش بعض إلا مرة أو اثنين فى السنة ويتبقى «زيارة عائلية».. او ان الولد يقول لك «ده أنا له من ستين عارف ان لى بنت عم أو بنت خالة».. انما لما تلاقىهم محتكين دايمًا ببعض العيلتين يبقوا فعلا مستغربين «هو ليه العيال بيصوا برا؟».. عشان اللى جوة دووول بقوا اخواتنا!!! يا جماعة.. واللى يتكسف من بنت عمه!!!!.

انت طيب قوي يا محمود: (محمود ده مجرد اسم كمثال)

انك تبقى انسان طيب فديه حاجة جميلة جدا.. حاجة على المستوى الانسانى ناس كثير بتدور عليها، ومش بعيد يدفعوا فلوس كثيرة كمان لو كان يتفع عشان يحصلوا عليها.. ان البنت تبقى عارفة عنك ده وعارفة من جواها انك طيب ومحترم فده شىء جميل برضه.. لكن لما تلاقىها بتقول لك «انت طيب قوى» في وسط الكلام كده (و شايقة ان هي ديه الحسنة الوحيدة اللى فيك).. يبقى كده تبدأ تقلق. طبعًا أنا ماليش دعوة بأى بنت تانية، أنا بأتكلم عن البنت اللى انت المفروض بتحبتها، لما تسمع منها كل شوية كلمة انت طيب قوي ديه.. يبقى خد بالك انها بتعتريك «أبوها»..

مش بعيد كمان لو انت اسمك محمود مثلا تلاقيها مسجلة نمرتك على موبايلها :
 «بابا محمود». أنا هنا ما اتصدش الطيبة اللي أي حد يتناها.. الطيبة اللي أي بنت
 تتمنى انها تلاقيها في الرجل اللي هتجوزه وإلا كنت هاقول لك اثبت على كده)..
 الطيبة اللي بأتكلم عنها هنا هي طيبة «التحدى». أي ست في الدنيا (أي ست) بتحب
 الرجل القادر عالمنافة، اللي يقدر ياخذ قرار في حياته ويلتزم بيه، اللي لو شافها
 بتقول أو بتعمل حاجة غلط يبقى عارف امتى يعترض ويقوول لأ.. وامنى يتكلم
 بهدووووووو.. الطيبة اللي بأتكلم عنها هنا يا عزيزى القارىء هي «السلبية».

فرق شاشع بين انك تبقى طيب وانك تبقى «سلى» بتوافقها على كل حاجة
 بتقولها، كل رأى يطلع منها كأنه قرآن منزل لا يجوووز التشكيك فيه.. بترد عليها
 ردود زى «!!!!!!» ايوه فعلا!!!!!! براافووو عليك، أو «ممتا!!!!!!» ززز جميل..
 انت صح جدا!!!!!!..!!!!!! هو ايه أصله ده!!!!!! انت بتعاملها كده كما لو كانت
 ملا!!!!!! ما بيغلطش.. وده سلوك غير سوى بالمره لأن هي أصلا بتبقى عارقه انك
 بتجاملها. مشكلتك هنا انك ما بتحاولش تتحداها.. ما عندكشى شخصية، لأن لو
 عندك شخصية ورأيك الخاص كنت هتلاقى نفسك بتعرض على مواقف وحاجات
 هي بتقولها وبالتالي هي هتحس ساعتها عالأقل انك بتعاملها كبنى أدمه طبيعية..
 أصل ما فيش حد صح دايمًا يعنى، وكمان الردود المبالغ فيها قوي بتحسسها بحاجة
 من اتنين، اما انك بتاخذها على قد عقلها أو انك بتجاملها بزيادة.. وده مش كويس..
 رجالة كتير فاكرين انهم لما يعاملوا الست بأدب بزيادة قوي وبراافوها على
 كل حاجة.. هتبقى هي راضية عنه وتحب تسمع له.. لكن الحقيقة المعاملة الذوق
 الـ«زيادة» عن اللزوم» بتعمل ضغط نفسى على الشخص اللي بيتلقى المعاملة دى..
 تخيل معايا الموقف التالى.. انت قابلت شخص لسا أول مرة تعرفه وهو كمان

أول مرة يعرفك، لاقيته يبسلم عليك بحرارة كده وشه مبتسم قوي وبيضحك
 و«ازيك ازااى حضرتك عامل ايه معاليك أخبار سعادتك ايه؟؟؟؟!!»
 ..بتلاقي نفسك «غصب عنك» بتعامله بنفس الـ «تكلف» والمجاملة، وبعد ما كل
 واحد يمشى ويسيب الثاني، يتسأل نفسك «هو ايه اللي حصل؟؟؟»..ده لأنك لما
 بتلاقي حد مايعرفكشى كويس ولا انت تعرفه كويس وبيعاملك معاملة خيالية كده،
 يبقى أكيد يا إما نصاب، يا إما بيتملكك، يا إما يياخدك على قد عقلك (لأنك بتبقى
 عارف ان ده تمثيل) وده بيضايقتك.. او انك لما بتلاقي نفسك مضطر غصب عنك
 انك تردله المعاملة الفظيعة ديه (الأدب المبالغ فيه) كنوع من «رد الجميل».. وطبعاً
 ده بيخليك تجت «ضغط» انه طالما عاملك كويس قوي كده فأنت لا لازم تتبسم
 وتضحك في وشه.. حتى لو كنت متضايق وقران.. مش بدمتك حاجة تترفز؟؟!!
 نفس الكلام بالظبط مع الست، الست ما تحبش تعمل حاجة غصب عنها أبداً، ولما
 بتفضل توافقها على كل حاجة فانت كده بتعمل حاجتين:

انك بترفعها فوق مستوى البشر وهى بتحس بضغط انها لا لازم تعاملك كويس
 قوي قوي زى مانت بتعمل، فبالتالى هى ما بتقاش على طبيعتها معاك.
 انك ما بتشكلىشى أى تحدى بالنسبة لها.. مافيش أى نقاش هيحصل بينكم لأنك
 ببساطة مش معترض على أى حاجة، وشايف انها صح الصح وكأنها ما بتغلطشى..
 كأنها قاعدة قدام المرآة بتكلم نفسها.. مافيش «رد فعل».
 رجاء.. خذ بالك واعرف الفرق بين «الطيبة».. والـ «سلبية».

هو لسه فيه أصل؟؟؟!

انت ممكن تسأل نفسك.. يا ترى هى ديه آخرتها؟؟ فى أمل ولا خلاص كده
 الموضوع ياااااااااا؟؟؟.. بما اتنا ما نعرفشى الغيب، اذن ما حدش يعرف المستقبل هيحصل.

ماتيقاش انت داخل تتسلى من الأول وبعدها تزعل لما تقول لك «خلينا أصحاب احسن». طيب ازاي أحدد أولوياتي؟؟ .. ازاي أعرف اذا كان ده اعجاب وبيقلمب حب واهتمام مع الوقت ولا مجرد انجذاب؟؟.. اسأل نفسك ٣ أسئلة:

آخرة العلاقة دي ايه؟؟..بمعنى لو آخرتها جواز كمل، لكن لو أولها وآخرها تسلية.. اسف، الكتاب ده هدفه انك تضحك وتستفيد.. مش انك تزيط.

طيب لو انت نالوي ترتبط بيها (شرعى).. هل انت مؤهل لكده؟؟.. اذا كان الجواب نعم.. اتكل على الله ومايهمكشى رأى حد.

تالت حاجة وأهم حاجة.. اسأل نفسك السؤال ده وركز فيه وادى نفسك فرصة تجاوبه.. «ايه المميز فى البنت ديه يخليك تعاملها بمتهى الحرص كده؟؟؟» ايه اللى يخليك هتمووت عليها كده؟؟؟ هي مش بنت زى كل البنات؟؟ اشمعنى دي يعنى؟؟..لو جميلة فده مش سبب لأن فيه أجمل منها، ولو غنية بيقى انت بنى آدم واطى، ولو دلوعة بيقى انت محرووم.. خليك فاكرا انك عايز تجوزها والمفروض انك هتعيش معاها سنين.. لازم يكون في حاجة فيها تستاهل انك تعمل عشانها كل ده.. مش أى واحدة تعجبك وخلص تقوم ترسم الفيلم اياه في دماغك.

ببقى خليك فاكرا.. اوعى من الأول تاخذ سكك ملتوية وغير مباشرة عشان توصلها..

لازم توصلها من الأول انها مش «صاحبتك» وانك لاا يمكن تعاملها على

هذا النحو..

انتم أغراب عن بعض ولو انت عايزها بيقى عايزها كـ «زوجة»..مش صديقة!!!..يعنى يا إما تاخذك «كلك على بعضك»..يا اما شكرا، ماتلز مكشى.. لكن شغل بقى: «أنا بحب محمود الانسان الاخ، مش محمود الزوج»..تبيت!!

تاني حل محتاج منك شجاعة جامدة.. بس معلشى، استحملنى..لما البنت

«اللى بتحبها» تقول لك «خلينا اصحاب أحسن».. «اوعى تخليكو اصحاب»..
اقولها لك تانى؟؟؟.. اوعى.. تخليكوو.. اصحاب!!!

اوعى تستسلم للجمله ديه.. بعيدا عن ان فيه بنات «أغيبيا» يقولوها عمدا عشان
يختيروا الولد (وده تصرف قمة فى الغباء بالمناسبة).. الا ان لو انت استسلمت
للجملة ديه يبقى حاجة من اتنين.. والاتنين أسوأ من بعض:

اما انك كنت من الأول بقى بتسلى فعلا فقلت خلاص.. طالما هي كده اصحاب
x اصحاب، خلينا اصحاب ونفضيها.. فى الحالة ديه بروح خالك ماتشكيش.. لأن
الكتاب ده مش للتظييط.

أو انك هتستسلم وتقول طيب ما يمكن لما بقى اصحاب هي هتعرفنى أكثر..
وتفضل تنوغل فى الموضوع وتوافق وتعاملها كأصحاب.. بيل بالعكس ده انتو ممكن
فعلا تبقوا «أخوات»، وهي واحدة واحدة خلاص اقتنعت انك فعلا قبلت بكده..
وهتعاملك على هذا الأساس.

اوعى تقبل بأنك تكون مجرد صديق.. اقول لك على حاجة؟، لما تقول لك
كده.. قول لها: «شوفى يا بنت الناس.. انا أصحابى باقعد معاهم عالقهوة وينلعب
كورة واستيميشن وينكروز بالعربية مع بعض، وأخواتى قاعدين فى البيت.. فلا أنا
ناقص أصحابا، ولا ناقص أخوات.. يا تاخذينى زى ما انا.. يا ما اعطلكيش!».

الحل الرابع: لو البنت ديه فعلا تستاهل (تستاهل بجد)، جرب انك تعيد النظر
فى نفسك، يعنى لو انت ظروفاك ماديا لسه مش متظبطة حاول تظبطها.. لو انت مليون
شوية روح جيم يا أخى، مش عشانها هي.. عشانك انت، من الآخر حسن من نفسك فى
كل الجوانب.. عرفها انك تقدر تبقى الشخص اللى انت عايزه، وتقدر على أى تحدى
تدخله.. سيبك من كلام الأفلام الهبلة اللى يقول لك «اللى يحبك يحبك زى ما انت»..

الكلام ده جميل، لكن حط نفسك انت مكان البنت.. زى ما انت نفسك تتجوز واحدة جميلة وقوامها ممشوق وفي نفس الوقت عايزها مؤدبة وخلقوة ومتعلمة، هي كمان من حقها تحلم بواحد «مزززز» وبرضه متعلم ومتقف هههه.. وما سمعشى حد يقول لى دى خلقة ربنا.. لاا يا حبيبي، ربنا خلقك فى «أحسن تقويم» انما الكرش والبهذلة اللى بنهدلها لنفسنا دى هي من عملك انت مش من خلقة ربنا.. بس الكلام ده «لو هي تستا اهل انك تتغير».

الحل الخامس؛ يندرج تحت «الوقاية خير من العلاج».. اوعى تحت أى ظرف من الظروف ووف تطلب مساعدة بنت ان هي تتوسط لك من الأول. انت بتبقى فاكرك لما تسأل بنت زيبا أو تاخذ نصيحة من بنت عن بنت يبقى هتاخذ المفيد.. غلطاً ان، مش عشان قصدى حاجة وحشة عليهم.. مع كامل احترامى ليهم إلا انهم أصلاً مش عارفين هم عايزين ايه!!!.. انت لو سألت ست عن رأيها في حد النهارده، وتانى يوم سألتها.. ممكن تلاقى رد تانى خالص.. على خلاف الرجالة اللى عارفين كويس أهدافهم ولما يبقوا عايزين حاجة ببيان عليهم (عشان كده الستات يعرفوا يقرأو اللى في دماغنا كويس).. هم بقى مش عارفين هم عايزين ايه، لو دخلت جوة دماغ ست استحالة تفهم أى حاجة، هتلاقى زحمة كبرى وأفكار كبرى.. أى موقف صغير قوى بتلاقى ليه كذا قصة وكذا رؤية فى دماغهم.. صدق اللى قال: «ابن كذا، اية اللى يقول لك أنا بقرأ أفكارهم». انت لو عايز واحدة، كلمها بنفسك.. ماتاخذشى رأى بنت، ولا حتى «أختك».. انا شخصياً المرة الوحيدة اللى طلبت فيها مساعدة أختى.. لبستى فى الحيطه، لأنها بتقول لى: اصلها مش لايقة عليك، أصلى مش مستريحة لها كده.. يااا ستى أنا مش عايز رأيك!! هتعرفى تساعدنى ماشى، مش هتعرفى.. اسكتى!

حاجة كمان بخصوص الموضوع ده.. لو هي عرفت انك باعت لها واحدة عشان تعرفها بيك، ممكن يجي في دماغها انه «هو مش راجل يعني بشنب؟؟ ما يجي يكلمني هو!!».. ده حقيقي، لأن ممكن ينم عن قلة ثقة بالنفس.. إذا كان من أولها مكسوف أو خايف تاخذ الخطوة الأولى (اللى المفروض تيجي منك انت الأول).. امال ازاي بقى أخذت قرار؟؟!!.. يبقى انت بتعمل حاجة غلط بقى وخايف منها..

الحل السادس:.. اخطب.. انت فأكرنى بهزر؟؟.. لا باتكلم بجد ههههههههه.. فيه سحر عالارم بيلتف حواليك أول ما تحط الدبلة في ايدك اليمين.. كأنك بقيت «كازانوف».. فجأة بقيت مرغوب فيك.. البنات اللى كانوا معاك في الجامعة أو الشغل، اللى كانوا دايمًا بيصوا لك على انك زى أخوهم.. فجأة هيجيروا نظرتهم ليك (مش كلهم يعني ماتسرحش بخيالك).. الفكرة ان لما الولد بيخطب (و خصوصًا لو خطب بنت كاملة الأوصاف) بتبدأ البنات اللى كانوا حواليه يفكروا «طب ما هو خطب أهو، أكيد فيه حاجة مميزة.. أكيد هي دورت واكتشفت فيه حاجة مميزة، يا ترى ايه هي؟؟؟! والا ماكانتش اتخطبت له!!».. تبدأ دماغها تودي وتجييب، نظرتها له بتتغير لأنه أصبح رجل «مرغوب فيه»، بل ان لو البنت اللى قالت لك خيلنا اصحاب احسن كانت بتسلى بيك، ساعتها هتقيسد ناار جواها لأن الراجل اللى كان يجري وراها وبيعمل الـ«لاللى» عشان هي تعبته حتى.. دلوقتي بقى ملك لواحدة تانية (مش بعيد تلاقبها بتيجي دايمًا جنب خطيتك وتتكلم عنك كأنك كنت حبيبها وان لسه في بينكم حاجة.. ما هو البنى آدم كده.. ما يحسش بقيمة الحاجة وهي في ايده).

الحل السحري: كل الحلول اللى فاتت ديه كانت «حلول واقعية».. الحل

السحرى بقى (و ده اللي أنا بحترمه جدا).. ان «مافيش حاجة أصلا اسمها خيلينا اصحاب أحسن».

ببساطة.. فكرة ال **Friend Zone** ديه هي فكرة «شربية» الأصل.. الفكر الغربى اللي دايمًا مصممين يحشروه فى الأفلام اللي بنشوفها، اللي طبعًا عايزينا نعمل بيه ويدخلونا واحدة واحدة فى حوارات العلاقات المعقدة.. وساعتها هتلاقى نفسك بتدور على حلول!!!.. وهناراحوا عاملين أشخاص متخصصين فى العلاقات والتخطيط **Dating Coaches** وبيتزولوا نصائح كثير عن التعامل مع الستات وازاى تجذب امرأة وكل الأفكار اللي للأسف الشباب يقرأوها ويعملوا بيها ونسيوا انها جاية من ناس «آخر حاجة عايزينا لنا اننا نبقى كويسين».. بص أنا ممكن أقول لك على حاجات تخلى أى بنت فى الدنيا تنجذب لك.. بس ده يا عزيزى هيبقى انجذاب «لحظى»، مش هيدوم.. انت اللي بتحدد اذا كانت العلاقة هتدوم ولا لأ.. لكن لو اعتمدت على الجذب بس، يبقى أول ما هتتجوزوا هي هتكشف ان مش ديه الشخصية اللي هي حبتها، وانت كمان هتلاقى ان مش هي ديه اللي مستريح معاها.. الجواز المفروض بيدووم العمر كله، هتفضلوا باصين في وش بعض وطباع بعض فترة طويلة، الحكاية مش حكاية انجذاب وخلص، إلا بقى اذا كنت عايز كده، عايز تتسلى وترميها بعد كده.. ساعتها أنا آسف انى خيلتك تقرأ كل الكلام ده وتعبتك.

أنا عارف انها جملة صعبة قوي لما بتقال.. لأنك بتبقى حاطط أمل وراسم حياة فى دماغك مع البنت اللي بتحبها، ومرة واحدة كل ده اتمسح بأستيكة.. مدى تقبلنا لجملة «خيلينا اصحاب أحسن» بيتناسب عكسيا مع مدى حبتنا وتعلقنا بالشخص ده.. كل ما بنحبه ونتعلق بيه أكثر كل ما يقبل تقبلنا للجملة ديه ويتراجع

أكثر.. ويمكن ده بيفسر ليه الرجالة "اللعوية" أو "زير النساء" مايزعلشى لما واحدة تقول له كده، لأنه دايمًا مايحطش نفسه في المنطقة ديه، ولو حط نفسه فيها.. يشوف انها "لعبة".. يا اما انك تصطاد.. يا اما تقع في المصيدة.. مصيدة "الحب والاهتمام بالآخر". الحل أبسط من كل ده.. حل دينى بحت.. "مافيش حاجة اسمها صحوبية بين ولد وبت". عايزها، قل لها، اثبت لها، وضح لها.. وادخل البيت من بابه من الأول.. معلش أنا طولت في الفصل ده نظرا لأنى شفت شباب كثير بيلجأوا لنفس أساليب أفلام الكوميديا الرومانسية اللى هي أصلا أس الفساذ اللى احنا فيه كله، وانتم اخواتى وعالأقل زى ما بنضحك مع بعض.. نعمل حاجة صح مع بعض. من الآخر.. وبالنسبة للبنات، لو أنا قلت كلام غلط، سامحونى.. او اعتبرونى ب "أهرتل".. بس ان كان فيه حاجة واحدة هاقولها لكم: "قبل ما تسألوا نفسكم هو ليه مابقاش فيه رجالة كويسة، افنكروا انهم كانوا في يوم من الأيام تحت أمركم.. كانوا بيغيروا عليكم.. يستحوا من رينا (مش بيتكسفوا يصولكم زى ماتم فاكرين).. كانوا مستعدين يعملوا البدع عشان وشكم يفضل مبتسم.. بس انتم اللى ضيعتوهم لما حطتوهم في منطقة "خلينا اصحاب أحسن". مع ان مافيش حاجة اسمها: "خلينا اصحاب أحسن".

”كيف تصبح مليونيرا فى شهر“ (ده او عايز يعنى)

في مرة قررت انى هابقى ”مليونير“.. اه والله، مليونير بحق وحقيقى.. زى
-لم كل الناس في سننى انهم يحققوا أهدافهم المادية في سن الشباب ويتجاوزوا
ويعملوا مشاريعهم بدرى. زى أى شاب مصرى أصيل، كانت أول حاجة أعملها هي
انى ادخل على جوجل وأكتب ”كيف تصبح“.. لاقيته هو لوحده كمل : مليونيرا-
عبريا- كاتبا- غنيا“ .. وطبعاً أول ما كتبت مليونيرا، لاقيته مكمل : ”مليونيرا فى
شهر- مليونيرا فى 3 سنوات- مليونيرا فى يوم!!!!“.. مليونيرا فى يوم؟؟!! دا أنا لو
هاسرقهم مش هابقى مليونير في يوم. الحقيقة اكتشفت ان أحسن طريقة عشان تبقى
مليونير فى شهر: ”انك تألف كتاب وتسميه كيف تصبح مليونيرا فى شهر“.. اسمع
منى.. هيتباع قبل ما تلحق تفكر أصلاً.

طبعاً ده واقع مؤلم، ان الناس تبقى بتدور على الكم ده من المصادر عشان
تبقى أغنيا، وقليل اما تلاقى واحد بيدور على كيف تصبح عالماً.. يبقى احنا عمالين
”نزل لتحت“ يا اخواننا. فيه ناس ممكن تفسر ده بان الفلوس بتشتري العلم..
هو كلام سليم طبعاً، وأكبر دليل على كده ان علماتنا كلهم بيسافروا على برة لأن
ما فيش ظروف معيشية ولا تقدير مادي لمجهوداتهم فى بلادهم، وده بيلاقوه برة..
بالرغم من كده - ولو هتكلمنى من نواحي فلسفية- هاقول لك طيب ما ”العلم هو
اللى بيعمل الفلوووس“!! اذن احنا وصلنا لنقطة ”مين اللى جه الأول البيضة ولا

الفرخة ١٩٩٠“.. عموما أنا ساعتها كنت كل اللي عاوزه اتى أبقي مليونير، فما اهتمشى بالفلسفة الفارغة بتاعة العلم هو اللي بييجيب الفلوس.. ساعتها عملت مسح شامل لكل الكتب اللي من النوعية ديه اللي قدرت أقرأها.. وطبعاً لسا فيه كتير قوي ما قرأنهوش.

بيبيع لك الهوا في كيبس:

النوع ده من الكتب دايمًا بتلاقيه بيستعمل غلاف ”صاادم وقوى“.. غلاف متزوق ومهندم وشيك جدا، الكلام اللي مكتوب فيه محكم ومايستعملشى فيه عبارات واضحة (عشان مايحسكشى انهم بينصبوا عليك أو يتحايلوا عليك عشان تشتري الكتاب).. دايمًا هتلاقي نوعية الورق بتاعه وطريقة الكتابة راقية جدا لدرجة هتخليك تقول: ”أكيد الناشر مش هيكلف خاطره وفلوسه عشان يعمل كتاب زى ده إلا اذا كان فيه معلومات قيمة“. لكن في الحقيقة هي كتب بتستعمل أساليب جذب فقط لا غير.. من ضمن الأساليب ديه كلمات تشجيعية زى ”ماتستقلش بنفسك.. انت كيبير“، أو كلمات زى ”الغنى غنى القلب، لا غنى المال“ أو ”أعرف نفسك وإمكانياتك وحدد أولوياتك- بص للدنيا بمنظار تاني- شيل النظارة السوداء اللي على عينك- بص خلى عندك إيمان بقدراتك“.. كل ده كلام جميل، بس فين بقى التطبيق العملي ١٩٩٠؟. معظم كلمات وصفحات الكتاب هتلاقيها محشية بصور فلوس وناس لابسة بدل رسمية وبيتسموا ويضحكوا.. الكتاب كله على بعضه مش هتطلع منه إلا ب ١٠ صفحات بس هم الى استفدت منهم.. والباقي كله فنتسسسس، دراما رخيصة. طيب ليه بتلاقي ان الكتب ديه بتباع بسرعة؟؟ لأن احنا بشر في الأول وفي الآخر، والكلام الحلو بيأثر فينا.. الكلمات اللي بتبقى في النوع ده من كتب ”كيف تصبح مليونير“ بتبقى كلمات نفسية، تشجيعية، بتديلك أمل بأن انت لو

سعت هتوصل في يوم من الأيام، وهتتحقق أحلامك.. معظم الكتاب هتلاقيه من النوعية ديه، وطبعاً انت بتفضل تكمل قراءة للأخر عشان تشوف آخرتها ايه ومستى منه الحلول.. اذن هو بيدخلك في "حالة"، حالة للذبة بتخليك تقرأ وتفضل تقرأ لحد ما الكتاب يخلص ويتبقى استمتعت بقراءته، لكن في الحقيقة لما تقعد كده شوية مع نفسك.. هتلاقي ان نسبة استفادتك منه.. صفر.

تجارب العظماء:

أنا عن نفسي بأحترم نوعية الكتب ديه جداً.. لأنها ببساطة ولا فيها دبش وحشو عالفاضي، ولا فيها كلام مشجع كتير مالهوش لازمة، ولا فيها أى كلام مالهوش هدف. النوعية ديه من الكتب بتحكى لك تجارب لعمالقة الاقتصاد والتجارة في العالم، الشخصيات المعروفة بنجاحها الساحق وازاي استطاعوا يجمعوا الثروة بتاعتهم والكتب ديه بتحكى بالتفصيل عن الطرق والتكنيكات الفعلية اللي استعملوها..

مش بس كده، دى كمان بتحكى لك تفاصيل من حياتهم.. زى الدوافع اللي خلقت كل واحد فيهم يقرر يبقى مليونير (أو ملياردير) وبتحكى لك هو أخذ وقت قد ايه عشان يحقق هدفه وبدأ من وهو في سن كام وبدأ بمبلغ قد ايه.. وهتفاجئ لما تعرف ان فيه منهم بدأ من تحت الصفر. احترامى للكتب دي كان سيبه انها بتدي لك تقريباً "أسرار الأثنياء" كلها، اللي فيه منهم كانت ظروفه وامكانياته قريبة منك وبالتالي ممكن انت كمان تجرب طريقته (حتى لو ما حققش نتائج مشابهة، لكن عالأقل هتتحقق نجاح أو ممكن تتعلم من طريقته وتطور فيها). الأهم في كل ده بقى ان الطرق ديه كلها "اتجربت قبل كده"، وكلها نجحت طبعاً.. لأنها أصلاً تجارب حقيقية لناس حقيقية، عشان كده في رأى الشخصى (وكل واحد حر في رأيه)..ديه

أحسن نوعية كتب ممكن تقرأها و"تستفيد" منها، لأنها بتدي لك حلول، وابت
 بقى صاحب القرار في انك تختار أيه يناسبك واية اللي ظروفه بعيدة عن ظروفك.
 كده أنا قلت كل الأنواع اللي هتقابلكم من نوعيات "كيف تصبح مليونيرا"، ووضحت
 ان تاني نوع منهم هو أحسن نوع لأنه على الأقل "واقعي" وتجاربه كلها متجربة قبل كده. قبل
 ما تسأل نفسك كيف تصبح مليونيرا في شهر، عايزك تسأل نفسك سؤال واحد بس.. "لماذا
 تريد أن تصبح مليونيرا في شهر؟؟!!" .. ايه السبب اللي بخليك تبحت وتشغل نفسك قوي
 عشان تبقى مليونير في شهر يعني؟ ليه دايمًا عايزين نغتنى في أقل فترة ممكنة؟؟ أحب أقول
 لك ولا سنة حتى عشان تبقى مليونير. في ناس هتوافقني الرأي وفيه ناس هتعارض.. اللي
 هيعترضوا هيقولوا ان فيه حلول زي انك تتجه للتجارة، أنا معاهم في ان التجارة بتكسب
 كثير.. لكن مش بسرعة، والناس اللي بنشوفهم ممكن يعملوا صفقات بملادين في شهر
 واحد تأكد انهم ماوصلوش للمرحلة ديه بين يوم وليلة.. ده ممكن يكون أخذ عمر كامل..
 ومانتاش ان رأس ماله اللي داخل بيه في الوقت الراهن غير رأس المال اللي دخل بيه زماان
 لما كان في نفس سنك ومامعوش غير مرتبه القليل.. او حتى ممكن ماكانشى حيلته حاجة
 كمان. واحد تاني ممكن يقول لي طيب ماهو لو دخل برنامج زي "من سيربح المليون"
 وكسب المليون.. يبقى كسبها في يوم واحد.. ده بقى هاقول له "هو يعني هيتصل من أول مرة
 هيردوا عليه؟؟" وحتى لو ردوا عليه، انت ضامن منين انه يكسب المليون.. ولو هو عبقرى
 زمانه وهيجابو على كل الأسئلة، تفكر هو أخذ كإاااا سنة من عمره عشان يوصل للعلم ده
 ويكسب المعلومات ديه.. الاجابة ببساطة كلمتين: "عمره كله" .. مش شهر أو سنة.

نصائح ذهبية:

ملحوظة: أكيد ديه مش كل النصائح اللي في العالم.. انما الفكرة من الكتاب ده
 من الأول اننا نتشارك الآراء والتجارب، ديه النصائح اللي أنا شخصيا بأتبعها، وبدأت

تجيب "شوية" نتائج:

اوعى تبحر عالنت (أو تفكر تعمل كده) عن "كيف تصيح أى حاجة" .. لأن من الآخر كل الهبل ده الغرض منه الكسب وخلاص .. مافيش حد أصلا هيعلمك سره يا عيبط.

انسى تماما فكرة انك تبقى مليونير فى شهر .. ولا فى سنة .. ولا ستين .. ولا حتى جنية الحيوانات. عشان تبقى مليونير (عالأقل للمرة الأولى فى حياتك) محتاج من خمس لست سنوات .. ده لو انت بادىء من الصفر، بعد كده هيبقى معاك رأس مال ويمكن يبقى أسهل شوية انك تبقى مليونير (إلا إذا كنت انت من الأول معاك رأس مال كبير، فده هيسهل عليك المهمة جدا).

قسم حلمك لأجزاء .. ماتقولشى أنا هجمع مليون جنية، لأنك مش هتعلمهم (خصوصا لو بادىء من الصفر)، ابدأ ب ٥٠٠٠ جنية، ولما تحققهم ابقى حوش منهم والجزء التانى اقسمه نصين، نص تعيش بيه والنص التانى شغله فى حاجة بسيطة، وكل مرة على الهدف بتاعك .. هتلاقى نفسك واحدة واحدة مبلغ ال ٥٠٠٠ جنية ده بتجيبه من الهوا.

انسى تماما المبدأ الأهبل اللى بيعلمولنا فى الأفلام والمسلسلات العبيطة بتاع "اللى يبدأ كيبزر يفضل طوووول عمره كيبزر" .. إذا كان فيه حاجة واحدة اتعلمتها شخصيا من الشغلانات الكثير اللى اشتغلناها الى جانب طب أسنان فهى ان: اللى يفكر بالمبدأ العقيم ده، لما يقع وقعة ثقيلة تجيبه الأرض يبقى صعب قوي عليه انه يقوم تانى، لأنه ببساطة "ابن عز" .. أتعود انه يبدأ بمبالغ ضخمة قوى، وماعودشى نفسه يبدأ من أقل القليل، فلما بيلاقى نفسه نزل للصفر (و ده وارد جدا انه يحصل فى التجارة) .. مايعرفشى يبدأ منين.

حاول دائما تنوع فى الوظائف أو مصادر الدخل بتاعك.. لأنك ماتعرفشى انت ممكن فى يوم من الأيام مصدر من المصادر ديه يخلص أو انت لأى سبب تسييه، ساعتها ماتبقاش حصرت نفسك فى خانة واحدكم بس.. من الآخر خللى عندك دائما "حرفة" تقدر من خلالها تجيب فلوس بسرعة (بخلاف جو الموظفين اللى ييقبضوا آخر الشهر).

أتأكد من مصدر المشروع اللى هتخط فيه فلوسك كورس قوى.. مش معنى ان الناس كلها جريته يبقى المشروع ده آمن، أو عالأقل مناسب ليك ولظروفك.. اعمل بالمقولة اللى بتقول: "لا تختبر عمق النهر بكلتا قدميك".

أخيرا: خللى عندك ثقة كبيرة برينا-سبحانه وتعالى- قبل ثقتك بنفسك، وان رينا هيكرمك وهيعلى شأنك مهما كانت ظروفك طالما انت بتحاول بكل جهدك، لأن الله عند حسن ظن العبد به.. مايهمكش من كلام أى حد بعد رينا بقى، وخليك فاكرك انك طالما عملت اللى عليك، يبقى انت مش محتاج انك تشوف معاك ملايين الدنيا نقدا.. انت فعلا ممكن تكون مليونير وربنا كارمك زيهم بالضبط، مليونير فى صحتك، فى علمك، فى أخلاقك، فى محبة الناس ليك ورضا أبوك وأمك.. وكل ده من علامات رضا رينا-سبحانه وتعالى- عنك.. يبقى انت ممكن تكون فعلا مليونير وانت مش واخذ بالك.. وكل ده ليه؟؟؟.. عشان انت مغفللللل.

الأسطورة بتقووول..!

في حياتنا أساطير كثير.. منها الخيالي والخرافي ومنها اللي احنا بتفترضه
 ونعمل بيه عشان يهون علينا مشاكلنا، أو يخفف عننا خوفنا. مفهوم الأسطورة على
 مر التاريخ هي الحاجة الهلامية الخارقة للطبيعة اللي أي حد ممكن يحكيها لأبنه أو
 اللي أصغر منه عشان يحمسه أو يعلمه حكمة أو يديله موعظة.. موعظة من خلالها
 يقدر يستشف الخلاصة.. باختصار، كلمة أسطورة يعني "تشييه بليغ" مبالغ فيه
 ومثالي لوضع أو شخصية أو قصة أو حادثة معينة، الغرض منها استعمالها كدروس
 ومواعظ للأجيال الأصغر منا. لكن الحقيقة الأساطير اللي هتكلم عنها في الفصل
 ده هي أساطير "شعبية" بالدرجة الأولى.. أساطير يمكن اتربينا عليها وعشنا على
 ذكراها سنة ورا سنة لحد ما ترسخت في دماغ البعض منا على انها "أحاديث نبوية
 شريفة" أو "قرآن منزل".. دون حتى معرفة أصلها ايه ومدى صحتها. الأساطير اللي
 هتكلم عنها في الفصل ده هي أمثلة شعبية ومقولات وحكم ومواعظ قديمة بتتردد
 على ألسنة البعض وكأنها فعلا ليها أساس من الصحة، ويسببها ناس كتير راحت
 ضحية جهلها وجهل معانيها.. رغم ان في ناس عارفة ان الأمثال هتفضل أمثال ولا
 يجوز الأخذ بيها كدليل يبيح أو يحرم أي حاجة.. لكن ما فيش فائدة! . يمكن ده
 السبب اللي خلاني سميتها "أساطير" .. وده اللي هاوضحه بالظبط في الفصل.

الأسطورة بتقول: "احنا يابني بنشترى راجل.. واحنا يا عمى عايزينها بشنطة

هدومها!!“:

جرت العادة على اننا نسمع الجملة دي في كل الأفلام.. حتى لو سألت أي عينتين في الحقيقة، هايقولوا لك ”اه طبعا يابنى.. الركحالة بقوا عملة نادرة“. لكن اللي بنشوفه على أرض الواقع غير كده خالص!! .. الجوازات بتبوظ على أتفه الاسباب.. أمهات كتير عايزين بناتهم يتعلمهم أفراح في أحسن أماكن، يركبوا أحسن عربيات، يلبسوا أغلى أسورة، يعيشوا حياة زى اللي هم عايشينها في بيوتهم.. ونسيوا ان هم أنفسهم لما بدأوا حياتهم زمان مع اجوازهم بدأوا من تحت الصفر!! وفيه أمهات كمان كانوا بيعاندوا أهاليهم اللي كانوا جايبين لهم عرسان ”أكااااااير“ ومتريشين وهم رفضوهم عشان الشخص البسيط اللي اختاروه.. الشخص ده اللي فحت في الصخر وهم صبروا معاه لحد ما كبر ولادهم وعرف يدخلهم جامعات ويعيشهم في المستوى ده.. كل ده ماحصلش في سنة ولا ستين، انما في عمر كااامل.. إذا الأهالي مش هيربوا بناتهم على كده من الأول، ويربوا ولادهم على كده.. يبقى هنفضل في نفس الدوامه ديه في كل جوازه. أنا مابقولش اتك تسلم بتك لأي راجل وخلص، حتى لو ماكانش لاقى ياكل.. فيه أساسيات طبعا لازم تكون موجودة زى الشقة والوظيفة.. لكن بلاش التعقيد الزيادة عن اللزوم ده.. مش عشان بنت خالتها ولا بنت عمتها جالها خاتم ”سوليتير“ يبقى هي كمان لازم يجيلها زيبا وأحسن.. انت مالك ومالها؟؟!.. مش عشان هي ساكنة في فيلا في التجمع الخامس، يبقى لازم بتك هي كمان تسكن زيبا.. اذكري نفسك وانتِ قدها وانتِ تحكمي عقلك.. وبالنسبة للأبهات ففي منهم يرضه بيفكروا بنفس المبدأ.. حضرتك متوقع مني اني في أول ما هابدأ هاحقق كل اللي انت حقته في ستين

عمرک وشعرك شاب بسببه؟؟.. الشباب دلوقتى يجاول بايدو وسنانه وماقاش
عارف يا ترى المشكلة فى الأهل.. ولا هو فعلا مقصر ومايعملشى اللى عليه؟؟!!..
ولسا برضه فيه ناس مصدقة أسطورة: "أحنا يابنى بنشترى راجل.. واحنا يا عمى
عايزنها بشنطة هدومها".

الأسطورة بتقول: "على قد لحافك.. مد رجلك".

المثل ده من الأمثلة اللى الأهل بيستعملوها أو الأشخاص اللى حواليك عشان
ينصحوك بيها فلنا منهم ان هى ديه الحل لمشاكلك المعيشية.. لكن السبب اللى
خلانى أضعها لقائمة الأساطير هو الفهم المغلوط للمثل ده. ناس كتير قابلتها فى
حياتى بيستعملوا المثل ده وكأنه الشماعة أو المسكن اللى بياخدوه لما يفشلوا فى
تحقيق حلم من أحلامهم ويبدوروا على أى حاجة تخفف عنهم الوجد والألم، بانهم
يقنعوا نفسهم ان هو ده النصيب، وان خلاص انت مهما عملت عمرک ما متوصل،
وعلى قد امكانياتك ولحافك اتصرف ومد رجلك، ارضى باللى قسمهولك ربنا
وكفى بالله حسييا. مع الوقت المثل ده اتحول من الرضا بما قضاه الله، الى استسلام
للواقع.. تلاقى نفسك فى شغلك ما بتعشى نفسك زيادة عشان عارف انك مهما
اشتغلت كده كده هتاخذ مرتبك زى ما هو، مش هيزيد نكلة.. لو بتفكر انك تحسن
من مستواك المعيشى، تلاقى واحد يقول لك "يا عم على قد لحافك مد رجلك"..
تفكر انك تنجوز بنت زميلتك أو تتقدم لها، وظروفك المادية لسا ماتسمحشى..
دل ما تاخذ ده سبب تنوى بيه عند ربنا انك تشتغل وتطور من نفسك عشان تحسن
ستواك.. تلاقى اللى يقول لك "يا ابا على قد لحافك مد رجلك.. شوف لك واحدة
على قد حالك" !!! . اذن دعونا نتفق على ان الجملة ديه بقت تستعمل بصورة سيئة

دى. تلاقى واحد فى الشغل بيسمع كلام مديره (حتى لو كان غلط أو حرام) ولما تبجى تنصحه، يقول لك "يا بيه أنا عبد المأمور وووور" .. مع ان سبحان الله "ولا تلقوا بأيديكم الى التهلكة" . الكلمة ديه يرضه بدأت بتريدها فى المسلسلات والأفلام عادى، وشوية شوية الناس بقت تقولها كـ "هزار" .. لحد ما فيه ناس بقت تقولها باعتقاد جازم فيها .. لأنه لو مانفذشى كلام رئيسه هينطرد، وده بيقودنا لجملة تانية "د أنا لحم كثافى من خيريه"، ونسى ان الله هو الرزاق وخير الرازقين (يعنى أحسن حد يرزقك) .. فلما حد يقول لك "أنا عبد المأمور" .. قول له "وأنا عبد الله" .

الأسطورة بتقول: "خلى يا باشا":

"خلى يا باشا" هى الجملة اللى خليتنى أول ما عشت فى مصر بقت شايف كل المصريين "نصايين" !!! . تنزل من تاكسى، يقول لك خلى يا باشا .. بتشتري حاجة (أى حاجة) يقول لك خلى يا باشا .. ولما تخلى بقى .. يزعق "انت صدقت يا باشا!!!!!!" . ايه المغزى منها مش فاهم .. يعنى ولا منها مجاملة ولا منها أدب ولا أى دالاعى .

الأسطورة بتقول: "الراجل من غير كرش .. ميسواش قرش":

الجملة الشهيرة اللى بتضحك بيها على نفسنا .. الغريب اننا مصدرة نها . الجملة دى فى الغالب يقولها الأشخاص اللى "مش ناويين يلعبوا رياضة"، ويحاولوا يقتنعوا أنفسهم بيها عشان يداروا على فشلهم .. بس خلىنى أقول لك حاجة يا عزيزى .. ان ربنا خلقك فى أحسن تقويم، خلقك من غير كرش ولا جنااب ولا دهون مرترة مالهاش لازمة .. فياريت ما تتسبشى حاجة لربنا- سبحانه وتعالى - وهى مسؤوليتك ..

زى ما انت من حقتك تحلم بواحدة بتهم بصحتها.. البنت كمان من حقها تحلم.. ولو في يوم واحدة جبتك على كرشك الكييسر قوى.. فده من كرم أخلاقها، أو عشان محفظتك "ياطلظة" من البنطلون ومليانة.. انما مافيش واحدة هترضى ان ولادها يطلعوا تعبانين بسبب والدهم اللي حتى ماييفكرشى يعمل حاجة يصلح بيها من نفسه. من الآخر بلاش نضحك على نفسنا.. لو انت بتلعب رياضة، ما تعلقش، مسيرك هتخس وتعمل القورية.. سواء في المستقبل القريب أو البعيد.. لكن تقول لى "الراجل من غير كرش مايسواش قرش" وتسيب نفسك وتهمل في صحتك وبعد كده مستنى انك تاخذ واحدة بمواصفات قياسية.. (ضحكة رقيقة).

الأسطورة بتقول: "انت... بنت تتمناك":

أى أم في الدنيا بتبقى شايفانة ابنها الرجل المثالى لأى بنت.. سواء ده حقيقى أو لا، انما هى بتبقى شايفاه كده. لكن اللي ينشرفه اليومين دول "مباالغ فيه"، لدرجة ان الواد بيبقى معفن، عاطل، أخلاقه زيالة، ولاا يعتمد عليه بالمرة.. لكن برضه "١٠٠٠ بنت تتمناه". بصراحة أنا فكرت كتيير في الجملة ده.. واستغربت ازاي فيه "١٠٠٠ واحدة (أو الأعداد المبالغ في تقديرها ده) ممكن تتجوزه وهو مافيهوش حاجة عدلة، واكتشفت فعلا ان ده ممكن.. بس في الحالة ده أكيد هم بنات فرز خاااa

الأسطورة بتقول: "أنت لو آخر راجل فى الدنيا.. مش هتجوزك":

كلنا بنسمع الجملة ده فى الأفلام مش كده!!؟ طيب هى سببها الأساسى لو البنت

مش عايزة شخص معين فبتشبه مدى عدم رغبتها فيه بأنه لو آخر راجل في الدنيا.. مش هتتجوزه. حبيبتى انتى وهى خليتى أقول لكم على حاجة.. لو انتى مش عايزة الله، قوليلها ببساطة.. انما تقولي له "انت لو آخر راجل في الدنيا مش هتتجوزك"؟؟!!.. احب أقول لك ان الأبحاث أثبتت ان : لو هو الراجل الوحيد على وجه الأرض.. غصب عنك هتتجوزيه يا حلوة عشان مش هتلاقى غيره قدامك!!! .

الأسطورة بتقول: "انتم لسه بتصوموا رمضان؟؟!؟":

القصة ديه حصلت بالفعل.. لما كريم ابن عمى (بيشتغل في أحد البنوك) كان عند مديره، الكلام ده كان في شهر رمضان.. ساعتها كان بيستأذن منه يروح عشان يلحق الفطار.. المدير رد عليه بمتهى الجدية وقال له: "يااه.. هو لسه فيه حد بيصوم رمضان؟؟!!.. مش الكلام ده خلاص خلص من زمان؟؟!!.. " ثانية واحدة كده!!، هو رمضان بقى دقة قديم للدرجة دى؟؟!! . الموضوع ده انتشر جدا.. لما باروح مولات كبيرة زى "ستى ستار" مثلا، كذا مرة بأشوف منظر مستفز.. بأشوف ستات محجبات قاعدين في عز الظهر في رمضان يياكلوا ويشربوا وعادى جدا.. اذا كان ده من قبيل الصدفة، فده اتكرر كذا مرة. حتى في الشارع، كنت بأشوف ناس أنا عارفهم شخصيا وعارف انهم مسلمين، يشربوا عادى جدا ويياكلوا ولاا كان فيه حاجة.. طيب لو واحد لوحده فمممكن يكون مريض أو على سفر.. لكن ألاقى جروب كامل قاعدين في عز الصيام يياكلوا ويشربوا ويضحكوا كأنها حفلة عالمي!!! .. هو جرى ايه في الدنيا يا نانااا؟؟!! .

الأسطورة بتقول: "هأقلل السجايو.. كل يوم أقلل سيجارة":

أنا عن نفسي ما باشربهاش ولا بطيق ريحتها.. ولكن كان كل أملى انى أخلى اصحابى (أو بعضهم) يظلوها. حجتهم دايمًا انهم ”يحبوها وما يقدروش يستغوا عنها“، ولما بأسأل واحد فيهم عن معنى ده، كان بيرد عليّ ويقول لى: ”انت مثلا بتحب الرسم جدا!.. تقدر تبطله ١٩٩“.. قلت له الرسم ما يضرش صحتى، بالعكس بيخليها أحسن.. ساعتها ما بيلاقيش مبرر لكلامه ويبسكت.. أى مجموعة شباب يقرروا انهم ”بيظلووا سجاير“.. أول قرار بياخدوه هو انهم يظلوها زى المدمنين.. كل يوم يقللوا سيجارة. شوية شوية وينقلوا على موضة ”الشيثة“.. يستدلوا بدليل غريب قوي يقول: ”الشيثة دية بتبقى تفارحى كده ومش إدمان“.. ومع الوقت، يطلع واحد صاحبهم زى الخازن ووق يقول: ”يا جدعان يقول لك نفس الشيثة الواحد يعادل ١٠٠ سيجارة!!“.. ساعتها كله يرجع يقولوا لا وعلى ايه بقى، خلينى أرجع للسجاير تانى.. وتستمر الأسطورة!

الأسطورة بتقول: "أجمل ما فى الحب انك تلاقى حد يحبك زى ما انت":

أهى دى بقى من أغرب الأساطير اللى سمعتها فى حياتى.. لأن الناس بتسـء فهم الجملة دى بالكامل. فيه فرق كبير عزيزى القارىء بين انك تحب حد وتقبله على حقيقته اللى ربنا خلقه بيها.. وانك تقبله على حاجة أو عادة موجودة فيه هو اللى عملها ب إيدـه. فى إذا كانت الحاجة اللى فيه غير قابلة للتغيير، أو ربنا خلقه بيها كده.. ساعتها تقول الجملة ديه، إنما لو حاجة هو اللى عملها فى نفسه.. ساعتها لازم تبطل تستعمل الأسطورة دى. هناخد على ده مثال صغير جدا.. احنا بنشوف كثير رجالة بكرش بيتجوزوا أو يرتبطوا بينات أو ستات حلوين جدا.. بس هاسألك سؤال تجاوب عليه بصراحة.. انت لو شفت بنت مليانة أو وزنـها زيادة.. مش بتبقى

نسبة اعتبارها كـ "أختك" أكبر بكثير من انك تفكر فيها كمراثة؟؟! أنا عارف ان ديه سطحية، لكن خيلنا نتكلم مع بعض بصراحة (وعلى فكرة الوضع ده برضه مشابه بالنسبة لو راجل بكرش كيبسر).. الفكرة ان ربنا خلقتك في أحسن تقويم، واحنا اللي بنبوظ أشكالنا بارادتنا.. فلما تلاقى حد بيحبك وأنت فيك مشكلة، اعرف انه يا إما بيحب حاجة ثانية فيك.. يا اما بيحبك بجد لكن مش هيسيك إلا لما يصلح فيك . المشكلة دى.. المشكلة اللي ممكن تكون كرش، سرعة نرفزة وعدم ضبط نفس، عدم تحمل مسؤولية، كلامك دبش بقى ولسانك زفر.. كل ديه حاجات انت اللي عملتها في نفسك مش ربنا اللي خلقتك بيها.. وتأكد ان لو حد حبك وفيك العير ديه، فده لأنه عنده أمل فيك انك هتغير وهيساعدك على ده.. انما لو انت مصمم على انك تفضل محللك سر.. يبقى بطل تستعمل أسطورة "اللى يحبنى يحبنى زى مانا".

الأسطورة بتقول: "مكياج البنات فى الأفراح":

دى بقى أسطورة حقيقية.. أكيد كل الولاد بيلاحظوا ده لما بيروحوا أى فرح، بيلاحظوا البنات حاطين كمية ماكياج مهور و وولة!!!.. فيه اللي بيسمياها "بوهية"، "طلاء حيطان" أو "بودرة تلك".. واللى بيسمياها جيس!!! المهم ان ما فيش ولد هيعترض على كلامى ده.. المكياج بيبقى زى الزفت!! . أنا أسف انى كلامى تقيل المرة دى، بس والله احنا بتقول لكم عشان ديه الحقيقة.. الحقيقة اللي لازم تعرفوها ان شكلكم لما بنشوفكم فى الجامعة أو فى أى مكان عالـ "طبيعة" من غير أى أفراح أو مناسبات بيبقى "زى القمر".. بتبقوا حلوين فعلا.. حلوين بجد.. ايه اللي بيحصل بقى فى الأفراح!!! اح؟؟ بتحولوا لـــــــ. عشان الهدف من

الكتاب انه "لا ازم نفهم" (لا مواخذة يا أستاذ مجدى الجلاذ).. قررت أعمل بحث ميدانى عشان أعرف ايه السر وراء المكياج المبالغ فيه (عموما لو كان السبب تجبىوا عرسان.. اطمنوا، انتوا بتخلوهم يفكروا ١٠٠٠ مرة). فيه بنات كتير جاوبونى عن الموضوع ده بصراحة، منهم اللى قالت ان احنا بنبالغ في رد فعلنا ده، ومنهم اللى قالت ان فى بنات فعلا ما بتعرفشى تحط ماكياج مطبوط.. وفيه اللى قالت لى "انت ماالك.. وشى وأنا حرة فيه" !!!! (ساعتها احترمت خصوصيتها ولميت نفسى ههههه). لكن أكثر الاجابات الأسطورية الحقيقة كانت الاجابة دى: "بص هو الموضوع كله فى الكاميرا مان.. الكاميرا مان لما يبسلط ضوء الكاميرا على وشنا.. بتطلع فى الصور منورين قوى، ولو فيه أى تجاعيد أو بشور أو وحدة سمرة حبتين أو أى عيوب عامة بتبان.. عشان كده المكياج أساسى.. وفيه بنات بيفتكروا كل ما يزودوا كل ما الصورة هتطلع أنقى". عموما بغض النظر عن الكلام ده كله.. احب أقول لكم باسم كل شباب مصر والعالم: "أبوووس ايديكم.. والذى خلق السماء بلا عمد ترونها.. انتم زى القمر كلكم من غيره.. والله انتوا كده مش بتداروا حاجة.. انتم كده بتبيلوها!!!!".

فوكوشيما

يقولوا "العقل السليم.. في الجسم السليم" .. ده هم اللي يقولوا. بس أنا عندي مشكلة صغيرة مع الموضوع ده. أنا طول عمري معتقد ان أفضل الرياضات على الاطلاق هي الرياضات "القتالية"، مع اتى بطبعي هاالدى جدا ومايناشي علي أي نزعة عنف.. لكن كنت دايمًا (ولازلت) معتقد انها بتنى كل أنواع المهارات جواك، بتديك ثقة بنفسك غير عادية، قوة جسدية، سرعة رد فعل ملحوظة.. كل ده وبتديك اللياقة اللي تمانها وكمان تدافع عن نفسك في الشارع.. دعابة ممتازة كأنها اعلان، بس كل ده لما تجربه في الحقيقة بتلاقيه مش بنفس الصورة اللي في خيالك.. صحيح هي ايه الصورة اللي في خيالك؟؟!

وانا صغير.. كان مثلي الأعلى هو "جاكى شان" .. شخصية مرحة، ذكي، قوي، شعره طويل ونااعم (ابن اللعية)، والأهم من ده كله: "انه يلعب كونج فو". في فترة كده عدت على الشعب المصري كانت أفلام "بروس لى" و"جاكى شان" و"اميتاشان" و"فان دام" والمعلم "رشدان" (بتاع سلاحف التينجا) وأي حاجة على وزن "فعلان" بتااكل دماغهم.. حتى في القهاوى كانوا يبشغلوا أفلامهم وكانت الناس بتتلم وتقعده تفرج عليهم.. حتى زمان أيام برنامج "اخترنا لك" اللي كان يببجي كل يوم أربعاء الساعة ١٠:٠٠ مساء، كنت بتابعه عشان لو جاب فيلم للباطرة دول.. حتى العبقري "أحمد زكى" -الله يرحمه-أخذ باله من الظاهرة ديه وعمل فيلم عنها "مستر كاراتيه" والفيلم حاز إعجاب المشاهد المصري. احنا طول عمرنا مفتونين بأفلام الأكشن وتحديداً "الكونج فو" .. ومن كتر ما ده متعلق

بالجماعة الصينيين، بقي عندنا اعتقاد ان أى واحد صينى بيتولد وحواليه "ماااالة التنين" وبيعرف يلعب كونج فو (بس لما كبرنا اكتشفنا ان ولاد اللذين بيعرفوا يعملوا كل حاجة).

وأنا صغير كان نفسى أجيب بدلة الكاراتيه وأروح دروس الدفاع عن النفس بقى وامشى فى الشارع بالبدلة وأنا لابس الحزام الأصفر أو الاخضر زى ما بنشوف العيال الصغيرة.. مش بس كده، أنا كنت بحب أى حاجة متعلقة بالرياضات القتالية.. أفلام بقى وألعاب اتارى وأسلحة ولعب بلاستيك.. حتى تسريحة شعر جاكى شان كنت بقلدها. مرة وأنا فى أولى ابتدائى قلت لأبويا أنا عايز أعمل "تسريحة شعر جاكى شان"، أبويا قال لى "ليه يا حبيبي اسمعنى؟" ..قلت له عشان شعري يطير كده زيه لما أهز دماغى.. لاقيته بمتهى العفوية أخذنى للحلاق وما صدق أصلا انى هالحق أخيرا ومن غير ما نعمل الفيلم بتاع كل مرة والزمزة والعياط. الحلاق أنا فاكر شكله كويس قوى..حلاق مصرى عن أبوه، لابس ٥ خواتم فى صوابه، رفيع قوي ورافع البطلون لحد صدره، لابس قميص نص كم أصفر مشجر أخضر وبنطلون كاكى، أصلع وعنده حبة شعر مطولهم من ورا وملزقهم ب "فازلين" ..من الآخر أنا مااستريحتلهوش.. انا قلت فى سرى "هو ده اللى هيعملى تسريحة جاكى شان؟؟!!" ..ده هيعملى تسريحة جاكى اللى ربنا هيكرمه!!" .. ايه يا بابا ده، ده تاجر مخدرات!! أول ما قعدت على الكرسي وشوشت أبويا وقلت له قول له أنا عايز تسريحة جاكى شان.. الراجل سمعنى، فقال لى "مانا هعملك تسريحة جاكى شان احبيبي" ..!!!.. الحلاقين فى مصر عامة بيتبعوا مبدأ "حط الزبون فى الأمر الواقع" .. أول حاجة عملها مسك المكتنة وراح دااخل فى نص دماغى.. كدة شكرا ماعادشى فيه حاجة تتعمل، ويعد ما خلص أكيد كلنا عارفين النتيجة. النهاية ماكانتشى زى

ماتوقعت، ولما سألته "ابه يا عمو ده ايه الى انت عملته ده ديه مش تسريحه جاكى شان!!" ..رد عليّ بمتمهي اللذاعة "يا حبيب عمو جاكى شان شعره جاي لقدام صح؟؟؟.. انا جيتيها لك لقدام!!" ..ياهن ال...!

فضلت الرغبة في أن أكون "جاكى شان" تملكني يوم بعد يوم وتزيد.. وكالعادة عملت زي أي شاب مصري ييفكر انه يتعلم أى حاجة في الدنيا "بأقل التكاليف" .. اشتريت كتاب "كيف تصيح بروس ليه في شهرين.. القبضه الحديدية" .. (ده زي كيف تصيح مليونيرا في شهر كده). الكتاب ده اشتريته في ثانوية عامة، كان كتاب رخيص جدا (١٥ جنيه وفاضلت وأخذته ب ١٠) ومعظمه صور.. الكلام اللي فيه كان عبارة عن "سيرة ذاتية" للبطل بروسلي - الله يرحمه - وازاي عاش حياته ومماته والنخ.. كان فيه عبارات تشجيعية وتحميسية وشوية كلام كده مالهوش معنى وكام وقفة بتقهم وات بتدافع عن نفسك في الشارع.. بس كده.

الكتاب ده كان كفيلا انه يكرهني في الكونج فو واللى ييلعبوها. استمرت المعضلة والصراع الداخلي اللي كنت بخوضه كل ما أشوف أى فيلم قتالى وازاي الناس ديه يتحرك ويتضرب ببراعة متناهية كأنه برنس الليل القتالى.. لحد ما أخذت القرار اني فعلا تتعلم رياضة دفاع عن النفس. اللي شجعني على كده هو اني ساعتها كنت في الجامعة وقاعد لوحدى (فشقة شبرا اللي اتكلمت عنها على انها بداية امبراطوريتي الخاصة) وكنت أنا لوحدى صاحب القرار.. وانا اللي برضه هتحمّل العواقب. ساعتها قعدت أدور على مدرب كويس عشان ديه مسؤولية ومش عايز أى واحد عارفه كام حركة على كام نظرة يدريني ويهدلني معاه من غير ما أكون فعلا بتعلم.. وهنا اتعرفت على "د.كايتن محمد عبده".

مع الوقت، موضوع الفنون القتالية ده بدأ يلفت انتباه زمائلي واصحابي، وانه من

الجميل انك تتعلم حاجة تدافع بيها عن نفسك.. حتى البنات زمايلنا فيه منهم كان يفكر جديا انه يتعلم.. الموضوع بس كان محتاج واحد ياخذ الخطوة الأولى، واللى أكد لأصحابي ان الكابتن اللي بيمرنى محترف هو انى كنت معاهم في جيم بيتمرونوا فيه والكابتن بتاعهم لما عرف ان كابتن محمد هو اللي بيمرنى قال لى "انت طالما مع كابتن محمد.. انا ماقدرشى أتكلم". ساعتها كله قال لى أنا عايز رقمه.. ماكدبشى عليكم، أنا عمرى في حياتى ما اتخانقت بايدى، لأنى دايمما باحل مشاكلى بدماعى.. او بأتجنب المشاكل المفتعلة، لكن المرة الوحيدة اللي اتخانقت فيها كانت مع عيان في عيادات امتياز فى القصر العينى. الراجل كان بيقل أدبه ومد ايده عليّ ومسكنى من البالطو.. ساعتها ماكتش اتعلمت اتحكم في نفسى، واكتشفت ان ردة فعلى زادت بنسبة ٣٠٪ (ده من الخوف طبعا) وعملت فيه حركة من حركات "الهيثيرو تورى" (حركة ايكيدو) العيان اتلف ١٨٠ درجة وارتزع عالارض..!!! بس طبعا في آخر اليوم صالحته.. فى الأول والآخر هو عيان وانا دكتور. من بعد الموضوع ده اكتشفت اتنا كلنا كنا غلطانيين.. الموضوع ماطلعش "مجرد لعبة" بنلعبها ونسلى بيها.. وان لازم آخذ بالى بعد كده عشان مش حاجة حلوة هى انك تتخانق مع أى حد يزق فيك.. النهاية ممكن تقلب بجد.

حياة الكونج فو كانت ومازالت لذيذة، واصحابى بعد موقف الخناقة بتاعة العيان واللى شافوها بعينيهم منهم خلاهم يتأكدوا ان التمارين بتجيب فائدة على أرض الواقع وانهم يقدروا فعلا يدافعوا عن نفسهم.. لكن اللي ماخدوش بالهم منه كويس هو ان أى حاجة عشان تتعلمها ليها ثمن. لما بدأت انزل "ماتشات" ودورات قتال امام فرد (و فردين وثلاثة كمان) وكان العدد بيزيد كل مرة مستواك بيعلا فيها، وطبعا الضرب بيزيد.. عشان تعرف تدافع عن نفسك لازم تضرب وتتحط في مواقف لازم تدفعك انك تستعمل فيها قوتك.. وإلا عمرك ما هتعود جسمك على الحركة والتركيز والهجوم والدفاع. كنت بارجع

عن "العصر" الإعلامي أتحدث

قبل ما ندخل في الفصل ده، عايز أقول انه مالهوش أى دعوة بالسياسة.. لأن في منكم هيفتكر انه طالماً هتكلّم عن الإعلام، يبقى أكيد هتكلّم عنه ودوره في السياسة وعن الإعلام المغرض وال "تطويل" والـ "مطبلاية". لكن كل ده فيه ناس أحسن منى بكتير قوي اتكلموا عنه، وأنا بصراحة مهما عملت أو كنت خبير في الكتابة (والتطويل) عمري ما هنافس حد.. اللي عايز أتكلّم عنه هو موضوع أكبر من كده.. مش موضوع واحد، كذا موضوع.. اتما كلهم بيندرجوا تحت مسمى واحد.. قوة الإعلام. وطالما هتكلّم عن قوة، والقوة لازم لها سلاح يديها المعنى ده.. يبقى هاتكلّم عن أقوى أسلحة الإعلام، وقد ايه هي يتدخل لقلوب وعقول المشاهدين.. مش بس كده لآ، ديه كمان بتجبره "بدوووون ما يدرك" انه ينفذ معتقدات صاحبها وأفكاره تحت شعار "ده مجرد هزار" أو "ده كله كلام أفلام".. عرفتم أنا بتكلّم عن ايه؟؟... الأفلام.

الأفلام هي أسوأ سلاح للإعلام (وأقواها).. ونوعية الأفلام اللي هاتكلّم عنها مش الافلام الواقعية (لأن ديه كده كده موجودة في الحقيقة).. الأفلام اللي أقصدها هي الأفلام اللي بتناقش قضية معينة في المجتمع ولكن بتسلط الضوء عليها "بشدة متناهية" تخليك تحس ان المجتمع كله كده! . الغريب انك لما تلاقي الجيل الصغير يترسخ في دماغه مفهوم من مفاهيم الأفلام ديه ويبدأ يقلده شوية شوية.. لما بتهاجم المخرج على ده ويتحاول انك تحط رقابة، المخرج بمتهى البساطة يرد ويقوللك "ده فيلم يا بيه.. للمتعة والترفيه فقط لا غير" وكأن واحد بيشتكم ويديلك على قفاك

مثلا وبعدها يقولك "جيبسى وعمى.. بهزر معاك" !! . أى فيلم هتشوفه في حياتك بيبقى فيه "رسائل خفية" أو هدف المخرج أو القائمين على الفيلم عايز يوصلهولك.. فى أفلام ممكن بيان انها عادية وفكرتها عادية جدا.. بس اذا كان الكلام ده صح، تفكر ايه اللى بيخلى الناس تقلدها وكان هو ده الطبيعى.. او ان الناس تاخذ فكرة عن الشخصيات اللى فيها على انها شخصيات سيئة واحنا بطبعنا كمان بـ "نعمم" الأحكام، فنحكم على كل الشخصيات اللى بنشوفها فى الحقيقة بنفس الحكم اللى شناه فى الفيلم.. مع ان سبحان الله.. ده مجرد فيلم للترفيه !

الأفلام كلها للأسف (و بالأخص اللى بيغلب عليها طابع الترفيه) لازم فى آخر الفيلم هتوصل لك رسالة أو "اعتقاد" معين بشخصيات الفيلم أو الأماكن أو الأزمنة المتعلقة بيه. أنا مش باستثنى نفسى والله.. ما أنا زيكم بأنفج على أفلام عادى وبأدخل سينما عادى وقشطة الأفلام الأكشن جنوون بالنسبة لى والأفلام العربى بتاعتنا بأنفج عليها وزى زيكم.. لكن للأسف بدأت أغير طريقة تقبلى للأفلام ديه لما لاحظت كام حاجة بسببهم، سواء وانا فى مصر.. او برة مصر.

المصرية الرقاصه:

من أشبع الحاجات اللى كنت بأسمعها لما كنت فى السعودية (و أى حد عاش فى دولة خليجية كان يسمعها) هى اتك تلاقى واحد معاك فى المدرسة يقول لك "انتم المضارا كلكم رقاصات" !!!.. أو "والله آانا أبى اتزوج مصرية ترفصلى" .. الكلام ده حقيقى.. للأسف الشباب الخليجى الجديد (نسبة كبيرة لكن مش كله طبعاً) معتقد ان مصر هى بلد الرقاصات.. او أنا أسف فى اللفظ ده بس والله هو اللى بيتقال "بلد الأذف ورك" .. الموضوع تعدى الشباب كمان، وكان فيه واحدة زميلة والدتى فى الشغل كانت فى حفلة عيد ميلاد واحدة زميلتها ومرة واحدة وسط الهيصه.. زميلتها ديه بتقول لها

"ارقصيلى يلا" .. صاحبة والذتى بتقول لها لا'أنا ما بعرفشى.. ردت عليها وقالتها بلهجة ساخرة "ليش؟؟ هو فيه مصرية ما تعرف ترقص؟؟" .. وحياة أمك؟؟ . لما الموضوع ده اتكرر كذا مرة من ناس كانوا معايا فى المدرسة، قررت اتى لازم أعرف ايه السبب.. وساعتها مسكت كذا واحد منهم وعملنا جلسة عشان أعرف منه بالظبط ايه أصل "الهرتلة ديه" . لما سألت كذا واحد منهم عن السبب وانه ايه اللى مخليه متأكد كده ان المصريات كلهم "رقاصات"، كلهم ردوا بمنتهى الأمانة: "يابو ناجى والله انتم أفلامكم ما تجيب إلا كل خير.. ياخوى ما فى فيلم واحد إلا وتوه جاب مصرية ترقص" .. كلهم أجمعوا على ان أفلامنا "الزبالة" هى اللى نقلت لهم الفكرة ديه، ولما قلت لهم ان يا اخواننا ديه أفلام وأكد مش حقيقة كلها، قالوا لى "والله هاذى مو مشكلتنا.. حنا ماا نشوف منكم أى شى تانى غير الرقاصات.. وحننا مو مصريين، تراكم تغفلون صورتنكم للعالم كيف ما تبون" .. اذن هم فكرتهم انهم ناس غرب عن البلد ومش مصريين لكن اللى بيوصل لهم متابس هو أسوأ ما فينا، لأن الأفلام المفروض انها بتنتقل فكرة عن بلد أصحابها.. والا فتكروا ليه بلد زى "تركيا" اتشهرت ويقت من معالم العالم؟؟ .. لأن فى كل مسلسلاتها بتطلع ناس "شكلهم حلو" ومناطق "شكلها أحلى" .. ببساطة بتدى فكرة هائلة عنها، مش بتطلع أوسخ ما فيها وتقوول ديه حضارة وتجرد من الأئعة!!!!!!

اشرب عشان تتسى:

مين فيكم فكر يسأل أبوه أو أمه قبل كده عن "أزايذا الويسكى" اللى كانوا شايلنها فى النيش أيام السبتييات؟؟ ولما كانوا بيتترفزوا أو يتضايقوا من الدنيا كانوا يفتحوها ازازة ويصبوا كاسين ويشربوا عاالدى جدا لحد ما يهدوا وخلص على كده؟؟ .. لا ولو لفقوا الازايذ فاضية، الأب يتزل جرى يجيب ازازة ملفوفة بورقة جرنان ويشرب تانى لحد ما يهدا.. ايه ده؟؟ عمر ما حد سأل أبوه واهه السؤال ده؟؟ غريبة!..

اصل اللي يشوف أفلام زمان يحس ان كل المصريين كانوا ييشربوا ويسكروا.. بس المفهوم الأساسي هنا اللي كانوا عايزين يوصلوه مش انك تسكر.. خالص بقى.. لكن انك تشرب عادى بس "من غير ما تسكر".. عشان لو سكرت طبعاً هتخرج عن شعورك.. فلما كنت بتشوف فنانيين ييشربوا خمر فى الأفلام وتلاقيه بدأ يكثر منها.. بتلاقي صاحبه "الشهم" يتدخل ويقول له: "كفاية كده انهارده.. انت شربت كتير" .. لا لا لا لا لا يا راجل!!!! ..يعنى لو كان اتحكم بالشرب يبقى عادى ؟؟؟!! .. قوول يا عم الشيخ، قوول و"افسى" كمان وكمان.

الرسالة اللي كانوا عايزين يوصلوها باستمرار فى الأفلام ديه هى انه الخمرة "مشروب العائلة" طالما انت بتحكم فى مستوى الشرب وما بتسرفشى أو بتبالغ فيه.. يا أخى "ان الله لا يحب المسرفين" .. اشرب بس بالأدب.. على رأى ستيفان روستى: "الكونياك" هو مشروب البنت المقدية" .. الله يرحمه بقى. أنا الأول فكرت ان ده كان فيلم أو فيلمين أو ثلاثة وعدوا خلاص.. لكن انى الاقى كل الأفلام القديمة لا تخلوا من "كبياريه" و"ازايز بخر" وكأنها نوادى أو حفلات عاديه جدا والخمرة ديه زيه زى "مشروب غازى". بالذمة مش حاجة غريبة؟؟ ان الخمرة اللي ذكر نص تحريمها فى القرآن الكريم والتوراه والانجيل بالنص الصحيح تتعرض فى الأفلام على انها حاجة عاديه جدا؟؟! ومصممين يدخلوها البيوت عادى كده؟؟.. اننا مش شيخ زى ما اتفقنا فى الأول، انما من ضمن أهداف الكتاب انه يوضح حاجات شفتها وعايزكم تفكروا فيها معايا.. ما تقوش مجرد "عابرى سبيل" فى الدنيا وخلص كده.

اعتصام الأطباء:

هو أنا بس اللي بحس ان كل الدكاترة اللي بييجيوهم فى التلفزيون فى الأفلام

بتأثر على انسان لو اتعطلت.

الدكاترة بيحيوهم فى الأفلام دايمًا فى ٣ حالات: يا إما "بتوع ستات" وليهم قصص حب مع أى واحدة ست بتدخل لهم.. يا إما دقة قديمة وتقليديين وكل اللى بيعملوه فى حياتهم الشغل ويس.. يا إما "جزارين" .. وجزارين ديه باختص بيها "دكاترة السنان" بالذات. كنت دايمًا بأسأل نفسى السؤال ده: "ليه الناس بتخاف من دكتور الأستان؟؟" .. قد يكون ده بناء على تجربة سيئة خاضوها فى الماضى، إلا انى فوجئت ان فى منهم عمره ما راح لدكتور أستان.. مجرد اته سمع "حكاوى" عنهم أو انه "شاف أفلام رخيصة" بتصورهم بالصورة البشعة ديه. دكتور السنان فى السينما المصرية (والأجنبية الصراحة) كل دوره انه يتنسم، يظمن العيان.. ويخلع. الخلع هو الحاجة الوحيدة اللى طيبب الأستان بيعملها بالآت التعذيب بتاعته فى الأفلام المصرية.. يمكن أشهر مشهد فى السينما المصرية هو مشهد "جورج سيدهم" فى فيلم "البحث عن فضيحة" .. وساعتها الناس صدقت ومازالت مصدقة ان دكاترة السنان كلهم كده.. مع ان يا أخى سبحان الله يا أخى.. ده فيلم والغرض منه الترفيه بس.. ده هزاز ياها!!!

الإنس والجن:

الجن مذکور فى القرآن.. ديه حقيقة لا شك فيها، ومعروف ان الجن ما بيظهرشى أبداً بشكله، اتما لو اتواصل معاك فده بيبقى عن طريق وسيط. ده مش موضوعنا عامة، الموضوع انه فى السينما المصرية العفارية والجن أخذوا حقهم قوى.. بس فيه حاجة لفتت انتباهى أكثر من مرة فى الموضوع ده. دايمًا تلاحظ ان الجنى بيلبس البطلة أو البطل ويطاردهم طووووول الفيلم، وبعد ما يعملوا كل حاجة ويروحوا "الزماار" ويقدموا الـ "قرباين" ويعملوا اللاللى.. يفتكروا فى الآخر بقى ان ربنا هو القادر على

كل شيء وانهم بقروا قرآن ويصلوا عشان العفريت أو الجنى يبعد. من المشاهد اللى استفتتسى جدا في فيلم "الانص والجن" للفنانة يسرا والفنان عادل امام (انا بحبهم جدا على فكرة.. بس الحق لازم يتقال) مشهد لما كانت الفنانة يسرا نايمة والجنى (عادل امام) دخل عليها من غير ما هم يشوفوه وعمل حريقة فى الستاير والأوضة كلها.. ساعتها هي صرخت وأميا وأختها دخلوا عليها وحاولوا يهدوها.. اللى لاحظ منكم هيسمع آذان الفجر أذن عليهم.. امها (الفنانة أمينة رزق) قالتلها حاجة غريبة أوى: "اهدى يا حبيبتى.. نامى انت واستريحى دلوقتى وانا هاروح أصلى الفجر وأدعيلك.. نامى يا حبيبتى رينا يحرسك" .. ايه يا حجة ده؟؟!! ده بدل ما تقولى لها تعالى اتوضى معايا ونصلى مع بعضر (يمكن ساعتها كان يحرسها من الجنى ويحميها والفيلم يخلص واحنا كمان نخلص).. ليه دايمما السينما المصرية بتصمم أنها تطلع الناس الكبار فى السن والشيوخ هما بس اللى بيصلوا؟؟؟؟!!.. على أساس بقى ان الشباب مثلا لسه قدامهم العمر طويل "يعكوا فيه" براحتهم!!.. من أندر المشاهد اللى هتشوفها فى السينما المصرية (يمكن لحد فترة الثمانينات) انك تلاقى شاب يبصلى أو بنت بتصلى.. لازم تحصل مصيبة عشان يفتكر رينا، زى ان البنت "تُغْتَصَب" أو الولد يرتكب فعل فاحش ويتعاقب فيبدأ يفكر بقى يصلى ولا لا.. كأن ده العادى مثلا.

شركات الاستيراد والتصدير:

اتعودنا لما نسמע في أى فيلم الجملة ديه "أنا هافتح شركة استيراد وتصدير" انه لازم صاحب الشركة ديه يقى "تاجر مخدرات"، رجل أعمال، نصاب وييستعملها في غسيل الأموال.. او "وزير سابق"!.. دايمما نسמע استيراد وتصدير، لكن عمرنا ما نعرف استيراد ايه وتصدير ايه بالضبط.. والغريب انها تقريبا (ده ان ما كانشى في كل الأفلام) بتبقى ديه ستارة لتجارة مشبوهة أو أعمال ممنوعة. رجال الأعمال دايمما

يظلموا في الأفلام "نصابين درجة أولى" ..مش بس كده ، دول كمان بيصوروا التجارة على انها "كسب بدووووون تعب" ..توضيح بسيط بس: "مش معنى ان التجارة فلوسها كثيرة.. انها تبقى شغلانة سهلة". الاعتقاد ده بقى يخلى أى واحد عايز يبقى رجل أعمال (بما فيهم أنا) ..ظنا متنا ان هو ده الحل، ولما بتبقى طفل صغير وتنفرج على الكلام ده.. بتترسخ فى دماغك الفكرة لحد ما تكبر.. بس يا اخواننا التجارة زياها زى أى حاجة تانية.. كلها قرف ومشاكل، انما هي فعلا مكسيها كثير.

اللصوص الشرفاء :

الحرامى حرامى .. شريف بقى ولا لأ .. برضه حرامى. لكن اللى بنشوفه في الأفلام انك بتلاقى الحرامى يااا حبة عينى الدنيا مخبطة معاه من كل ناحية ويقرر قرار مصيرى هيغير حياته.. يقرر ان "دى هتبقى آخر عملية سرقة هي عملها في حياته" وبعدها هيتوب ويتبرع بجزء للعمليات الخيرية (غسيل أموال) وكلنا نعيش في تبات ونبات ويطلع رحلة حج كل سنة، وكل سنة وأنتم طيبين.. طبعا هم قاصدين يطلعوا الحرامى شهيم ولذيذ وظريف وانه خلاص بقى بعد العملية هيتوب، ونسيوا بعرضوا الحديث اللى يقول "ان الله طيب لا يقبل إلا طيب" يعنى عشان ربنا يقبل منك صدقة، لازم تكون حلال. الموضوع ده بيان هزار أفلام وعادى ليك كشخص بالغ عاقل.. لكن للأطفال مااعتقدشى. أنا عايز أقول لكم ان عم من عمامى لما كانوا بيسألوه وهو صغير نفسك تطلع ايه؟؟ كان يقول لهم "حرامى" !! هيهيهيهيه ليه يا حبيبي كده؟؟ .. "عشان دايمما بيهرب آخر الفيلم بفلوس كثيرة والظابط ما يمسكهمش" !!! ..لسه مقتنع ان الموضوع "مجرد فيلم" !! .

التخين فى الأفلام :

ليه دايمما.. دايمما باحس ان "التخان" يجييوهم في الأفلام على مدار السينما

العربية والغربية كمان على انهم "مجرد ديكووور" .. كأنهم أشخاص ماعندهمش
 مشاعر ولا احساس، يطلق في الفيلم دايما "كومبارس صامت" .. ولو اتكلم، يقول
 افيه أو جملة "هلس" ويبقى الرد دايما "جاالرح لمشاعره" ١٩٩٠.. ولما يطلق في
 أي فيلم.. لازم يتضرب على قفاه ويتهان ويظلموه "عشان ياكل بس" والناس تضحك
 عليه!؟، كأنه حيوان جايينه يفرجوا عليه الناس.. وبسبب الأفلام ديه بنلاقى الأطفال
 في المدارس بيتعاملوا مع الولاد (و البنات) المليونيين -حتى لو بنسبة بسيطة- بمتهى
 الاستهتار!!! كأن ديه عاقبة فيهم.. ودايما "التخين" ده ماينفعشى بحب البطلة، لأ ده
 يحب الخدامة، يحب الكومبارس اللى زيه، يحب على روجه!!!.. ويرضه نرجع للعقدة
 العقيمة تانى.. "يا عم ده فيلم.. ده مجرد فيلم" !

الخدامة المثالية:

ماخيش عليكوا يعنى.. انا من كتر الأفلام القديمة (و الجديدة) بس تحديدا
 الأفلام لفترة الثمانينات اللي بنشوفها.. بقيت عايز أتجوز خدامة!!!.. فكر معايا
 كده، واحدة بتعرف تطبخ، تمسح، تكنس، تاخذ بالها من العيال ومن نفسها، دلوعة
 وصاروخ.. وهترضى تعيش معاك "في أي ظروف" .. بالذمة هلاقى زيهافين ١٩٩٩!!!
 الخدامات في الأفلام المصرية كلهم بيشاركوا في كذا صفة (مش هيخرجوا عنهم):
 لا!!!م تكون "حلوة".

دلوعة ومتسهوكة.

جاية من البلد أو هريانة من أهلها أو مقطوعة من شجرة.

لازم في أي فيلم "توطى تمسح" أول ما الراجل يخش البيت!!!!!!! .

لازم تشتغل عند واحد "متجوز" وأقرع وبكرش.

لازم الواحد ده "يتحرض بيها" .. وهي كل اعتراضها ان "ستها تشوفها" !!! .

اللبس الرسمي (اليونيفورم) بتاع الشغل: "قميص نوم" !!! .

طبعاً هو فيه صفات كثيرة.. لكن ديه صفات "الخدمة المثالية" لأى فيلم مصرى لحد فترة الثمانينات.. بعد كده الناس تدينت إلى حد ما فبقى اسمها "الدادة".. عشان كده ما بقاش فيه اقبال على مشاهدة الأفلام الجديدة.. كله بقى يرجع ينفرج على القديم !!! .

البلطجة:

البلطجة طول عمرها معروفة.. معروف أشكال اصحابها ايه، نواياهم، أخلاقهم وحتى نهايتهم لما البطل الاسطورى يبخلص عليهم وينقذ البطلة. اللى حصل فى الفترة الأخيرة وتحديدًا قبل الثورة بسنة تقريباً.. ان الآية انقلبت !!!.. والبلطجية اللى فى نظر القاتون والشرع والناس انهم "حثة ومعتدين".. بقوا "ابطال وهدوة" يحتذى بيهم. بداية من الأفلام "الزبالة" اللى بقت تتعرض فى السينما المصرية، واللى بسببها العيال بقت تشيل مطاوى وسنج وأسلحة بيضاء بمختلف أنواعها.. انتهاء بشهر رمضان اللى بقى لاحول له ولا قوة "مكتبة دعاة" !!! . مرة واحدة بعد ما كنا خلصنا من موضة "المسلسلات والأفلام الصعيدي" اللى كله طلع فيها.. دخلنا فى موضة "البلطجة والسفالة والألفاظ القذرة" اللى بقت تنقل كده علنى وكان الفنانين بيتسطوا وهم يقولوها.. والمصيبة انها فى شهر رمضان.. شهر ربنا خلقه أصلاً عشان "ننصف نفسنا من وساخة طووول السنة" .. حتى ده كمان مستكترينه علينا؟؟؟ .

فى الأفلام الأمريكانى دايمًا البطل "أمريكى" .. الرجل المثالى "أمريكى" .. البلد المثالية "أمريكا" .. حتى لما يبقى فيه فريق "خارق"، بيكون أمريكى.. وفى مسلسلات الجاسوسية بتاعتهم دايمًا يتعمدوا انهم يظهرُوا أمريكاً على انها "المنقذ" وان من غير مساعدتها العالم كله هيهلك. طيب ده كله طبيعى أن أى بلد تحاول

تبين نفسها انها احسن بلد فى الدنيا.. لكن انها تتعمد تطلع الناس اللى حوالها بصورة "سيئة".. ده اللى لازم ناخذ بالناس منه. احنا كـ "عرب"، صورتنا اللى هي بتطلعنا بيها للعالم "زى الزفت".. دايمنا بيطلعوا العرب إرهابيين، مايستحموش، بدقون (مش الدقن المهذبة النظيفة انما الدقن القذرة)، مكشرين وياين على وشهم غضب ربنا، جهلة ولبسهم جلابيب وطرايش.. كأننا مثلا لسه عايشين من العصور القديمة.. عمرهم ما يجيبونا أبدا بصورة عدلة، ومع ذلك.. بتقلدهم في كل حاجة، لما يقولوا بنسمعهم، بناخذ بنصايحهم ونلبس عالموضة.. زيهم.

الموضوع لا ينتهى عند هذا الحد، انما حتى أفلام الكرتون اللى ولادنا بيتفرجوا عليها بتعتبر أسوأ من الأفلام العادية.. ما هو لما نبقى بتعلم ولادنا ان مايتمعش البنت تتأخر برة البيت بالليل ونلاقيهم بيتفرجوا على كرتون سندريلا والأمير اللى كانت معزومة عنده لنص الليل!!!!... ولا نبقى بنقول لولادنا والأطفال الصغيرين انه عيب الست تقعد مع راجل غريب لوحدها، ويتفرجوا بعد كده عادى على "سنو وايت" والأفلام السبعة!!! ماهى واحدة ست عايشة مع سبع رجاله!!!.. فيه أمثلة كتير قوي على أفلام الكرتون والرسائل "الإباحية" اللى فيها، واللى المنفروض انها "هزار وأفلام للترفيه".. انت ممكن تدور عالموضوع ده وهتلاقى عنه أبحاث كتير قوي.. كل اللى عايز أقوله ان:

"مش أى فيلم تشوفه انت واخواتك يبقى مجرد ترفيه.. فى الإعلام ما فيش حاجة اسمها مجرد صدقة!!.. كل فيلم ليه غرض، كل كرتون للأطفال للأسف ليه معانى غير مباشرة وراه.. خد بالك وانت بتفرج أو بتخلى ولادك أو اخواتك الصغيرين يتفرجوا.. خد بالك الإعلام مابقاش زى زمان.. مش مجرد أفلام للترفيه".
عرفت يعنى ايه "عهر إعلامى"!!!

نعم يا سادة.. ”إنه الشاب المصري“

الشاب المصري هو من خيرة شباب الأرض.. شاب فريد من نوعه، يتميز بصفات كثيرة فعلا بتخليه له ”كارزما“ من نوع خاص. لما كنت بأنزل مصر في الأجازات (بتبقى أجازة حوالي شهر أو اثنين) أى حد كان يشوفنى فيها كان يقول لى: ”شكلك سعودى“!!! .. او اللى يسألنى ”هو انت من مصر“!!!؟؟!! بس الحمد لله مرة معيدة عندنا بتسألنى ”انت مين؟ شكلك سورى“!!! ”ههههههه هو سورى يعنى مززز. لما سألت ولاد عمامى هو ايه اللى غريب فيّ أو بيخلى أى حد. شوفنى يبقى متأكداتى جاي من السعودية.. قالوا لى لسته طوييلة عريضة كلفا بتدل على انى ”خليجى رسمى“، وفضلت أصارع طووول السنين اللى فاتت دى لحد ما قدرت أغيرها كلها وبقيت بكل فخر.. شاب مصرى أصيل.

”الدوجلاس“:

الدوجلاس.. او فى مقولة أخرى ”السكسوكة“ هى العلامة الرسمية لأى شخص جاي من الخليج (ده ان ماكانشى مريب ذقنه كلها). لما سألت ولاد عمامى عن السبب اللى يخلي الناس تشوف صاحب الدوجلاس على انه خليجى بالرغم ان فى ممثلين أجنب عامليتها (وأكيد شكلهم مش خليجى)، ساعتها كان الرد ان الدوجلاس السعودى أو الخليجى بيبنى ليها طابع خالص جدا. أولا لازم تكون ”ثقيلة“.. نحس كده انك مسالى مركزك.. متحددة من برة بس (ومن جودة كلفة كده وراسية ورزينة).

الدوجلاس الخليجية بتحس انها بتكبرك ٢٠ سنة.. بتديلك هية ومركز
وتخليك "مهيب الركن" "طويل العمر" "عظيم الكتف" أو كل
المسميات الكبيرة ديه، لدرجة انك لما بتحلقها.. كأنك قطعت حنة كبيرة من
وشك!!!

"الشارلستون والديوتى":

في الخليج يبقى فيه نوعيات بناطيل غريبة.. انا عارف ان بناطيل الشارلستون والديوتى
كانت متشرة في مصر برضه في فترة ٢٠٠٣ ل ٢٠٠٦ بصورة "مطاطحة".. لكن اللي زودها
في الخليج ان بناطيل ماكانتشي شارلستون عادى.. كانت نوع اسمه "رجل الفيل". بناطيل
رجل الفيل دي بناطيل جيتز+ديوتى+شارلستون بنباا= بنطلون رجل الفيل. أى حد لايس
البنطلون ده بيبقى باين عليه انه جاى من الخليج.. بالاضافة لنوع بناطيل تاني اتشهر في الحقبة
ديه من الزمان "الشارلستون الأزرق اللميع" .. ده أنا شخصيا كان عندى واحد زيه، وعليه
قميص أحمر بقى ما أقول للكشى.. زى الطقم بتاع مصطفى قمر في كليب "منايا".

"تسريحة الشعر":

أى حد جاى من الخليج بيبقى متبرمج على تسريحة شعر معينة.. الشكل العام
ليها أو اتجاه الشعر بيبكون "لقداءااام" ولفوق. ممكن تكون "فروزاتشى" أو "من
أشبه الفيرزاتشى" .. المهم ان تقريبا مافيش شاب جاى من الخليج إلا ويعمل
التسريحة دى. في مصر الوضع مختلف.. في مصر هي تسريحة واحدة كل الشباب
عاملينها، ولو انت مش عاملها.. تبقى غريب ومنبوووذ. في مصر كل اللي عليك
تعمله انك تجيب جيل شعر (الماركة اللي كلنا عارفينها) ومن غير مشط ولا فرشاة
ولا أى حاجة هاتيل شعرك بماية، تحط الجيل في اتجاه الخلف (من قدام لورا)

أنا أسف انى ذكرت "بعض" الصفات السيئة فى الشاب المصرى.. وعارف ان فيه ناس كويسة طبعاً ولما بتروح أى مكان برة مصر بتشرفنا بجد.. بس هى دى مشكلتنا الأساسية، اننا طووووول عمرنا بتكلم بس عن "مميزاتنا" .. ونسينا عيوبنا الللى هى للأسف طغت عال حاجات الجميلة الللى فينا. على فكرة الصفات الللى فوق ديه مش موجودة فى عدد قليل عشان نغفل عنها.. الصفات ديه موجودة فى عدد كيبير جدا من ناس قابلتهم شخصياً فى حياتى، وانتم كمان أكيد قابلتم زيهم (ولاد وبنات).. الناس دول أنا جريت استهزائهم بى "شخصياً" أول ما نزلت مصر وتحديدا لما دخلت الجامعة سنة أولى.. الللى يتريق على تسريحة شعرى ويقول لى "يا بنى دى تسريحة العيال السييس!!!" (خلاص يا عم سيبنا لك انت الجمودية).. والللى يرمى كلام مالهوش لازمة لمجرد انى فضلت بنفس الكام طقم الللى عندى لمدة 6 شهور من غير ما أجيب لبس جديد!!! (ده طبعاً عشان هو كل هدفه فى الحياة ازاي ما يعديش الشهر الجديد من غير ما يجيب لبس تانى).. يبقى لسه جايب موبايل جديد ولما يتزل واحد أجدد يبقى هيتتطط ويسع الللى معاه ويكمل من تمنه ويشترى الجديد، ليه يا بنى؟؟؟ "ده أندرويد يا بابا"!!! .

كل الللى فات ده كوم.. والنوع الللى للأسف بأتمنى ربنا يهدبه كووم تانى خالص. النوع الللى يقول لك "مصر دى أمى.. مصر دى أنا هعمر فيها وهنبتها وولادى هيتربوا فيها" .. ويكتب عالفيسبوك "بحبك يا مصر" .. ولما تكلمه عالشات أو فى أى مكان.. يقول لك "دى بلد بنت ميتين" (..) "!!! "دأنا أخلص بس جامعة وهغووور من وش أمها" "يارب توووب علينا من القرف الللى احنا فيه ده" . طول ماهو ماشى فى الشوارع يشتم ويسب ويجيب كل مساوئ البلد.. ولما تقول له يا أخى ربك كريسم وهو علام الغيوب وعارف وقادر يكرم البلد.. يا أخى ما ضااقت إلا أما فرجت.. وهو مش شايف أى حاجة عدلة!!!.. الغريب انى لما بسأل الناس

ديه "انت صليت النهارده؟؟؟" يرد يقول لى "يا عم ماتغيرشى الموضوع.. انا بقول لك البلد، تقول لى انت صليت!؟" ..طيب انت متوقع ايه؟؟ اذا كان رينا-سبحانه وتعالى- قال لك بصريح العبارة "و من أعرض عن ذكرى فإن له معيشة ضنكا"، وقال كمان: "و رزقكم فى السماء وما توعدون" ..يعنى مش عالارض عشان تلف الكرة الأرضية تدور عليه!..! وده رب العالمين هو اللى بيقول لك.. مش أنا. من الآخر كده.. البلد ديه هتفضل كده، وعشان تتغير مش عايزة ناس "ترغى كتيير" ..عندك كلمة حلوة قلها.. ما عندكشى، يقى بروووح خالتك ماتوجعشى دماغنا وماتعشيشى أعصابنا وسيب البلد وغووور طالما هى قارفاك كده بدل مانت عمال تشتم وتسب وتلعن فى أهلها البهايم اللى الجهل ماليهم وما بيعرفوش يسوقوا وهمج وفيهم كل العبر..

بس خليك فاكر انك فى الآخر بتقول "أنا نفسى أتدهن فيها" .. ولما بيقى معاك فلوس بتجيب شفتك وعريتك وتعمل مشاريعك برضه فيها.. الا اذا كنت من الأول ناولى تهج، ساعتها يقى مش فارقة. من الآخر.. لو الحاجة الوحيدة اللى هتميزك كـ "شاب مصرى" هى : علبه سجايرك، عريتك اللى بتتخاق مع أبوك عليها كل يوم، موبايك اللى جايه بس عشان تعمل عليه شات وتشوف عليه "مقاطع بلوتوث ساخنة" ، لبسك الكتيير اللى مرطوط فى الدولاب مالىستهوش غير لبسة واحدة، ليلة وقفه العيد هتفضيها "درمعة" ازاي انت وأصحابك، ازاي تلبس وتتشيك وتأتانك وانت مش لاقى تاكل أصلا ويتأخذ مصر وفك.. لو ده اللى بيميزك كمصرى بس.. يقى ملعون أبو ديه جنسية يا أخى!!!! .

رجيم × رجيم

يقولوا "كل أقل.. اتحرك أكثر.. تكسب صحتك" .. اقول لك على حاجة؟! .. انسى. الحلم المثالى لأى ولد أو بنت هو انه ياكل من غير ما وزنه يزيد، وده طبعاً شىء غير طبيعى لأن مهما عملت.. ولا عمرنا هنبطل ناكل، ولا هنبطل نتخن. طيب طالما الموضوع كده، ايه حكاية الجملة الشهيرة بتاعة "كل أقل، اتحرك أكثر، تكسب صحتك" .. الحقيقة هو لحد دلوقتى مافيش طريقة واضحة أو رجيم ثابت يخليك تخس "من غير تعب"، ده ببساطة لأن كلمة "رجيم" معناها "نظام" .. نظام غذائى بقى أو غيره، مش هنفرق لأنك فى كلتا الحالتين لازم تتبع "قوانين صارمة ومنتظمة" بتعتمد مدى صعوبتها وصعوبة تطبيقها على شخصيتك انت.. فلو انت فى الطبيعة بتجيد اتباع الأوامر والسير على خطة منتظمة، مش هيبقى عندك أى مشكلة فى اتباع نظام غذائى.. انما لو لقيت نفسك مش ماشى مع أى نظام.. هنا يا عزيزى المشكلة فىك انت.

هاخس ايه؟؟ :

أنا عن نفسى من نوعية الناس المنتظمة بالرياضة.. ومش أى رياضة، دى رياضة قتالية ودفاع عن النفس. فى النوعية دى من الرياضات بتلاقى نفسك لازم تكون مستعد دايماً، لأنك لو تقلت فى الأكل "هتتقياً" كل اللى أكلته فى التمرين ومش هتعرف تكمل. لكن مشكلتى الأساسية مش فى انى أخس وأوصل للوزن المثالى أو أعمل "فورمة الساجل" .. مشكلتى هى انى كنت زمان مندمج ومتعود على عادات

غذائية سيئة جدا (كلنا كنا كده لأننا ماكانش احنا المتحكمين واحنا صغيرين)، لما كبرت واخترت انى أمارس رياضة "بارادى" .. لقيت انى اتحسنت في كل الجوانب، بقيت أخف بكثير من قبل كده، صحتى أحسن، وبقت الرياضة بالنسبة لى إدمان! .. فضلت عالحال ده لدرجة انى فعلا "ما بقيتشى مهتم انى أوصل للوزن المثالى" ! .. أصل هاوصل له ليه؟؟ طالما كده ١٠٠ ١٠٠ وصحيا مش متضرر ولياقتى البدنية كويسة. السبب الوحيد اللى هيدفعك انك تعمل الفورمة وتوصل للوزن المثالى هو "الشكل العام" .. ولو شكلك حلو كمان يمكن ماتفكرشى انك تحرم نفسك وتاكل اللى انت عايزه طالما كده كده انت بتتمرن وتحرق .. وديه كانت مشكلتى الأساسية مع الموضوع ده، انى مش شايف سبب "خطير" يخلينى أسعى للحصول على الجسم المثالى .. الا ان كنت عايز ابقى كده .. بعكس لو كان -والعاياذ بالله- فى مرض معين نتيجة سمنة مفرطة هيجبرك غصب عنك انك تخس "بالإكراه".

حكاية كل بيت مصري:

الحكاية اللى تقريبا كل بيت مصرى يمر بيها لما العيلة ككل يتاخذ قرار ان كل أفرادها يعملوا "رجيم" (كنوع من المساندة العاطفية والفائدة العامة) .. الحكاية ديه بتبدأ بأن واحد من الأولاد بيقدر مرة واحدة (غالبا يبقى الساعة ١٠:٠٠ بليل) انه يعمل رجيم، ويتكون طبعا وجبة العشاء ديه هى "آخر وجبة دسمة هياكلها" قبل ما يبدأ الرجيم من بكرة بقى (الوجبة ديه بياكل فيها كل حاجة بمتتهى العك كأنها آخر وجبة فى حياته) .. بعدها بيقول لوالدته: "ماما .. وحيانا أعلى حاجة عندك يا شيخه أنا قررت أعمل رجيم ومش عايز بقى حلل المحشى ولا أم على ولا الكلام ده كله عالأقل شهرين" .. هى بترد عليه "حاضر يا حبيبي، بس بقول لك ايه استنى أنا كمان هاعمل معاك". هنا الابن بيعس بالامان لأن طالما الأم (اللى هى مسؤولة الطبخ

فى البيت) هتسانده، اذن كل الأكل اللى هايتعمل هايقى أما!!!!!!ان. بيفضل الولد طول الليل اليوم اللى قبل تنفيذ العملية يتفرج على فيديوهات عالويتوب تحمسه وترفع معنوياته عن ناس اتحولوا وحياتهم اتغيرت ويتفرج على أنظمة رجم وسمع أغانى "ميتال" ومش بعيد يشغل أغنية فيلم "روكى بالبوا" (الأغنية اياها بتاعة النهاية والتمرين اللى لما أى حد يسمعها بيحس انه هيفرتك الحيطه!!)..كل ده قبل اليوم اللى هيدأ فيه الرجم.. طبعاً أول ما بينام ويصحى الصبح.. ولا!!!!!! الهوا!!!!.

هابداً من أول الاسبوع:

من أسوأ المعتقدات اللى أنا شخصياً مررت بيها فى الموضوع ده.. انك لما تفكر تعمل رجم، بتفكر دايماً انه لا لازم يبدأ من أول الاسبوع فى أول الشهر.. ده طبعاً عشان يبقى يوم الراحة بتاعك هو يوم جمعة أو خميس (عشان تاكل براحتك). لكن اللى بيحصل انه لو جبه يوم 1 فى الشهر وأول يوم فى الاسبوع وما الحقتش لأى سبب من الأسباب انك تبدأ الرجم.. بتلاقى نفسك بتأجلها للاسبوع اللى بعده.. واللى بعده.. واللى بعده، لحد ما الفكرة بتدهور وتبدأ الحماسة تتلاشى واحدة واحدة، وساعتها..شكراً. الموضوع ده مايفكرشى أى واحد فيكم بحاجة؟؟؟، قصدى على السيناريو ده، ماحدث فيكم قراه قبل كده؟؟؟.. أكيد طبعاً كلكم مرتويه..لما كنا بنيجي نذاكر وكان لازم نبدأ نذاكر لما الساعة تيجي "بالظبط" أو "نص" .. لو العقرب كان على "و خمسة أو إلا خمسة" ..ماكتاش نذاكر. ده لأننا دايماً مستنيين "اللحظة الفارقة" .. اللحظة اللى هنتطلق منها، هتكون مثالية، مطبوعة وبالتالى الخطة كلها هتنجح. بس لو هتكلم عن النقطة ديه على أرض الواقع.. هنلاقيها "معتقد فاشل". أولاً لأنك مهما عملت، عمرك ما هتتخذ خطة "كاملة" من أول مرة.. ثانياً لأن انت مش ضامن أى حاجة فى علم الغيب.. وانك

لو بدأت من اليوم الفلاني ده (اللى هو من أول الاسبوع) فده مش هو المهم، عشان لو حصل مشكلة أو ظرف طارئ هيبوظلك الرجيم.. هترجع تبدأ من الأول تانى..
ثالثا بقى وده الأهم: "الغرض مش انك تبدأ من يوم ايه، ولا مهم يوم راحتك هيبقى ايه.. الغرض انك تبدأ أصلا تغير مفهومك للحياة والأكل.. وانه وسيلة عشان تعيش حياة أحسن.. مش وظيفة بتأديها على أكمل وجه!!".

وهى الحنة دى يعنى اللى هتبوظه؟؟:

فاكر لما ببقى عامل رجيم ومنتظم فيه قوي ويقالك شهر ماشى تماالم، ومرة واحدة بدون سابق انذار.. تشم ريحة حاجة بتتلى وتسمع صوت "نشششششششششش"، نكتشف بعدها ان مامتك عملة "الفرااخ البانيه" الجا امدة فحتتت اللى انت بتحبها.. بس يا خسارة، انهارا، للأسف.. مش يوم الراحة بتاعك!!.. فإفكر كنت بتعمل ايه؟؟ فإفكر الصراع اللى كان (ولا زال) بيدووور فى دماغك من جوة على انه مش هما حنتين البانيه دول اللى هيبوظوا الدنيا؟؟!!.. ساعتها ببقى فى عذاب نفسى رهيب، لحد ما بتكتشف حل وسط!!.. انك تتسحب من ورا ماما بشويش وهدك انك "تتقنق".. تقنق فقط لا غير.. ساعتها بتبدأ تدور على حنت البانيه الصغيرة قوي (حنته قد نص صوباعك كده).. حنته صغيرة تسرقها ومامتك ماتاخدىس بالها انها اتاخدت (زى ما كنا بتعمل مع البطاطس المحمرة كده ههههههههه). الحقيقة أنا مازلت لحد دلوقتى وأنا شحط كده باتسحب وأعمل نفسى عيب وبيجيب حاجة وهووووب "القققققق" كام حنته صغيرة". طول عمرى كنت فإفكر ان ماما ماتاخدىس بالها لما بعمل كده، وانى بشكل أو بآخر ب"أستغفلها".. لحد ما اكتشفت فى يوم انها كانت بتتعمد تحط حنت صغيرة عشان عارفة اتنا بتتسحب أنا واخواتى من وراها وناخدنا ههههههههه وكانت مبسوطة لما بتشوفنا بتعمل كده.. اهو ببقى معاها فى المطبخ. مثال الفراخ البانيه ده

من الأمثلة البسيطة اللى يااما...ياااااا بوظلى رجيمات ! ، لكن فيه مثال ثانى غريب
 ماعرفشى اذا كنت أنا بس اللى بعمله ولا لآ.. المكرونة الشاميل لما بستوى بيبنى فيه
 حتت كده "طالعة ل برة" ..كام مكروناية كده محمصين شوية وتحسن انهم يقولولك
 لما تشوفهم: "طلعونا من هناا ماتسيوناااش كده" هههه.. كنت دايمًا بالقطهم واحدة
 ورا الثانية، لحد ما الصينية تبقى مخرمة !!! .

لقد كنت أعانى مشاكل فى "أردافى":

"جيف جيفرى" .. هو أكثر اسم خيىسر عالمى للأغذية والأجهزة الرياضية
 اللى بتعرض فى إعلانات النصب الدولى على القنوات المدبلجة اللى كلنا كنا
 بتتفرج عليها زمان. الراجل ده كان هو اللى بيطلع فى كل الإعلانات.. يقول نفس
 الكلام.. ويطلع معاه نفس الفريق.. والغريب فى الموضوع انه دايمًا لما يعمل إعلان
 جديد عن منتج تخسيس جديد.. لااااااا عيب على المنتج اللى قبله، بالرغم من انه
 هو هو نفس الشخص اللى كان يسوق للمنتج ده. الراجل ده فى أى اعلان بيقدمه
 بلا استثناءه هى جملة واحدة بس اللى بيقولها (واللى كان منكم بيتابعه أكيد هياخذ
 باله) : إعلان جهاز رياضى.. "لقد كنت أعانى مشاكل فى أردافى" .. إعلان مكوة
 شعر "لقد كنت أعانى مشاكل فى أردافى" .. اعلان حلل وطاسات وأوانى طبخ "لقد
 كنت أعانى مشاكل فى أردافى" .. اعلان كاميرا ديجيتال "لقد كنت أعانى مشاكل فى
 أردافى" !!! (أصله كان بيواجه صعوبة فى تصوير أردافه بالكاميرا العادية) .. يخرب
 بيت أردافك!! ما تولع فيهم وتخلص يا أخى!!!

التوعية دى من البرامج والاعلانات بتجيب "موديلز" وأجسام خيالية لا يمكن
 تكون اصلا اتعملت بالأجهزة الأستيك اللى يعرضوها.. حتى الناس اللى بيحبوهم
 مش مقنعين بالمرّة، مش محتاجين يخسوا أصلا!! .. المدخدة اللى فعلا بتخس هي ان

الأجهزة ديه بييجى معاها "كتيب أنظمة غذائية" تمشى عليه مع الجهاز.. هو ده اللي بيخسك مش الجهاز السكة اللي بتشتره !!! .

الرجيم الكيميائى:

من أفضل وأسوأ أنواع الرجيمات وأكثرها ضررا على الاطلاق هو الرجيم الكيميائى. الرجيم الكيمايى له أنواع كثير قوى، لكن أسوأ أنواعه هو النوع الللى "يلغى أى نشويات أو دهون" من وجباتك اليومية.. لأنك لما بتعمل كده (بتقطع النشويات والدهون مرة واحدة) الجسم بيحس انك بتدخله فى حالة "مجاعة" وحرمان..فهيفضل ماسك ومحافظ عالدون الللى فيه وهيقى شبه مستحيل انك تحرقهم.. من الآخر الجسم سامل زى العيل الصغير.. لازم تحايله الأول.. ويعدين تجربه على التغيير.

رجيمات الـ"هشتك بشتك":

كثير قوى نسمع عن رجيم "الوجبة الواحدة"، رجيم الفاكهة، رجيم الـ"لا نشويات".. لكن انك تسمع عن "رجيم الآيس كريم"؟؟؟ أو رجيم "الهامبورجر"؟؟؟؟ أو واحد تانى أختى كانت هى وصاحباتها بيجربوه "رجيم البطاطس"!!!!!! .. انا مش فاهم ايه الرجيم فيها؟؟ للأسف المشكلة الللى بتواجهها فى الموضوع ده هو اتنا مجرد يس عابزين "نقص وزننا".. ننقصه بقى بأى طريقة، المهم ان لما نبقى واقفين عالميزان.. نلاقه ينزل، وساعتها هنحس بالرضا بصرف النظر بقى اذا كانت الطريقة ديه صحيحة ولا لا.

الفكرة انك فعلا ممكن لو عملت رجيم "الآيس كريم" ده هتخس.. لكن مش هاتخس دهن، هاتخس "عضل".. ودى كارثة، لأنك بالمنظر ده هيقى عندك قابلية انك تتخن أسرع من الأول بنسبة ٧٠٪.. ده لأن العضلات أصلا هى المصدر

الأساسى ليك عشان تبني جسم صحى وصلب ونسبة الأيض فيه عالية.. تقوم تقوللى رجيم "الآيس كريم" و "البطاطس البيوريه".. ابو أم مدارس الطب اللى خرجتكم يا أخی!!!

لأااا.. أصل التخن وراثه في عيلتنا :

بص يا عزيزى.. خيلنا ماتضحكى على بعض.. احنا اتفقنا من أول الكتاب ان هيبقى فيه مشاركة بالأراء عشان نوصل لحلول.. خيلنى أقول لك ان موضوع "التخن في عيلتنا وراثه" ده الشماعه اللى ناس كتير قوي بتعلق عليها فشل محاولاتها فى الخسان. ده لأن فيه قاعدة عامة فى الطب بتقول: "أى مرض وراثى ييبقى فى الغالب نسبتة بين الناس قليلة".. وده من رحمة ربنا بينا، كأنه حالة نادرة مش دايمًا هتشوفها. لكن اللى يبحصل اتنا بتلاقى شباب وبنات بيتخذوا ده كسب للطنيش والأستسلام للأمر الواقع.. طيب أنا معاكم للأخر. حتى لو كان فى سبب وراثى موجود يمنعك من انك تخس (أو بيصعب عليك الموضوع).. بس مافيش أى سبب يمنعك انك تمارس رياضه. للأسف احنا في مصر بنشوف انه ان ما كتتش فى الجسم المثالى.. بقى انت ما بتلعشى رياضه وتكذب عليهم.. انا شخصيا بأتمرن "فنون قتال مختلطة" وهنا انت بتعلم كيك بوكسينج وايكيدو ووينج تشان.. ناس كتير الأول ماكانوش مصدقين أصلا انى بتمرن الكلام ده.. لأن وزنى مش مثالى!! هم معتقدين أن لااa

”أنا عندى لىك رجيم هينقص ٣ كيلو فى الأسبوع وبدووون رياضة“ ..
مافيش رجيم ينقص ٣ كيلو فى الأسبوع من غير رياضة إلا واللى كاتبهولك ده
نصااااااب.. كلمة ”إنقاص الوزن“ ديه أصلا مفهومها غلط، والصح بتاعها ”إنقاص
الدهون“ .. الدهوووون بس.. ماسألتش نفسك ليه دايمًا فى الإعلانات الرخيصة
بيستخدموا مفهوم ”إنقاص الوزن“ ؟!؟ .. عشان هو فعلا بيتقصد وزن.. بس وزن
من العضلات مش من الدهون.. ودى كارثة، ولما تيجى تقاضيه عال إعلان هيقوللك
ببساطة : ”أحنا قلنا فى الاعلان انقااااااااااااص وززززززن.. وانت لما بتقف عالميزان
وزنك بيتزل.. احنا ماكدبناش عليك“ !!! .. اذن خذ بالك من النقطة ديه، ومش أى
رجيم تطبقه وخلاص.. يبقى المعادلة الصح هى : ”كل صح.. اتحرك أكثر.. تكسب
صحتك“ .. مش كل أقل.

الناس كلها "خطبت" وأنا لسه..!

عارف لما تبقى لسه مخلص جامعة.. لما تبقى متخيل بقي انك لسه قدامك كثير انت وزمايلك عشان ترتبطوا والحوارات ديه.. وفجأة، وبدون مقدمات، تلاقى ٨٠٪ من أصحابك وزمايلك وزميلاتك "خطبوا واتخطبوا"!!!!. مش بس كده.. فيه منهم كمان اتجوزوا!!! .. ولما تسأله هو ازاي الموضوع حصل، وامتى وفيسن؟؟.. يقول لك "والله هي جت كده.. مانت عارف بقي الحاجات دي بيتيجى مرة واحدة" .. (وضحكة صفرا)!. الخطوبة والارتباط دلوقتى بقى مجرد "اتيكيث" .. اتيكيث لا بد منه لبعض الناس انه لما يوصل لسن معين، لازم يكون خاطب أو لابس دبله.. وفيه ناس يتاخذ الموضوع عند (أكيد مش الولاد.. ايوة، باتكلم عن البنات).. "اشمعى بنت عمته اتخطبت، هو أنا قليلة يعنى؟؟!" . في اللي عندهم أسباب غريبة جدا للارتباط، وفي اللي شايفين انه أى واحدة محترمة وخلص هتزدى الغرض.. وفيه اللي عايز أى "واحدة حلوة" وخلص (ده بيتقى فى الغالب دكتور أو مهندس.. تعبان يا عيني). موضوع الخطوبة ده عامة بقى موضوع الساعة.. بس أوعدكم انى هاتكلم عنه بأسلوب مختلف شوية.. من منظووووور تانى خالص.

ماتطلعش من الجامعة وايدك فاضية يا حمادة:

الله يرحمك يا تيتة.. كانت دايمًا توصيني الوصية ديه. الجملة ديه أكيد اتقالا لكثير منكم، وفي الغالب بتبقى من الجدة، من الأم أو الأقارب الكبار. اعتقادهم

في صحة الجملة دي قائم على مبدأ "انك لو الماحقش تخطب وانت في جامعة.. مش هتلاقى بنات في مكان تانى أبدا" !!! .. وده برضه للبنات، ان لو الماحقوش يخطبوا (أو يلتقطوا عريس) من الجامعة..هيقى صعب عليها انها تلاقى عرسان تانى، أو هيفوتها القطر. طيب ايه الميرر لكدة؟؟ .. ان العرايس والعرسان فى الجامعة بيبقوا عالآقل معروفين أخلاقهم وطباعهم وأسلوبهم فى التعامل، عالآقل انت بتبقى شايفهم قدامك مش لسه هتطلع برة وتدور من أول وجديد. هو مبدأ سليم مافيش كلام.. بس احنا بندخل الجامعة "تندعك" طووول الكام سنة اللى بتفضيهم وماينفوقشى إلا لما النتيجة تطلع وتسخرج!!!.. وبعدها ماينفوقشى برضه!

"صش هانتجوز شيرولما أشيل كرشى!!"

فيه ناس بتبقى ماجلة موضوع الارتباط والجواز لحد ما يصلح عيب أو مشكلة موجودة فيه.. المشكلة ديه قد تكون "ظروف مادية"، "لسا مالقاش الإناسة اللى في دماغه"، "ظروف دراسية" (بيحضر ماجستير مثلا).. لكن انه "مستنى يشيل كرشه"؟؟؟ .. لينا واحد صاحبنا قوي لما كنا نسأله انت مش ناوى تخطب بقى؟؟ كان يرد يقول "لااااااا يمكن.. لما أشيل الكرش ده الأول أبقى أفكر فى الموضوع ده" .. لما كنا بنسأله عن السبب، كان بيرد يقول: "ماينفعشى يا جدعااا.. معنى افرض حبيت أتمشى فى الشقة كده بالبوكرس زى الأفلام.. مراتى تقول عليّ ايه بالكرش ده؟؟؟ .. اتمشى قدامها كده بكرشى عادى؟؟؟ .. لااااااا لااااااا يمكن" .. انا مش فاهم الصراحة، معنى مراتك مثلا هتشوفك بيه بعد الجواز وماكانتشى شايفاك بيه قبله؟؟؟ اتخمت فيك معنى؟؟ .. كانت فاكراه انتناخ من أكلة ثقيلة قبل الجواز، واكتشفت انه كرش بعد الجواز؟؟؟ . الفكرة انه واحنا قاعدين في يوم عالادى جدا، لاقيناه خطب ولبس دبل مرة واحدة وبيعزمتنا عالفرح!!! .. يابنى انت مش قلت كذا

وكذا وكذا؟؟؟.. ضحك بكسوف وقال: "ماانتم عارفين بقي.. الحاجات ديه بتيجي كده!!".

أول خطوبة بااظت:

أول خطوبة.. أول خطوبة لو باظت في حياة الولد بتبقى عادية (ده لو باظت لا قدر الله).. لكن لما بنت بتختبر الموضوع ده بيبقى الوضع مختلف. ده لأن فيه بنات بيعتقدوا ان كل حاجة بتمشى تمام وان خلاص هو ده العريس اللي هاكمل معاه، بناء على ذلك فيه تجاوزات ممكن تحصل زى انها تكون محجبة مثلا وتقلع الحجاب في الخطوبة (الموضة الغربية اللي طالعة اليومين دول) أو ان الخطوبة تعمل بشكل "أسطوورى" .. وبعد كل ده والموضوع بيوظ. بتبقى تجربة سيئة جدا للبت، ويمكن ساعتها بتقرر إنها خلااص.. "اعتزلت الغرام" (على رأى ماجدة الرومى).. أو انها بتبقى حذرة جدا جدا بعد كده في اختياراتها لأنها خايفة من تكرار التجربة القديمة.

يا دبلة الخطوبة:

الأغنية المشهورة بتاعة "يا دبلة الخطوووية عقبالنا كلنا.. وبنى طوبة طوووية في عش جنابا" .. دايمًا بنسمعها عاادى جدا في الأفلام والمناسبات السعيدة.. لكن لو دققنا في معناها شوية، هنلاقي ان فيما معناه ان "فترة الخطوبة زماااا كانت طويلة جدا" .. طويلة لدرجة انهم هيفضلوا قاعدين لحد ما ينترأ بيتهم "طوووووية.. طوووية".

1. زمان الخطوبة كانت بتقعد بالسنين، رغم ان كلنا فاكرين ان الهدف من الوقت ده كله هو السمرحة وقال يعنى عشان يدرسوا أخلاق بعض.. انما ده اللي الأفلام كانت بتحاول تحشره في دماغنا.. الحقيقة الناس زمان اللي كان منهم يفضل خاطب لمدة 5-7 سنين، كان يفضل المدة ديه كلها "يفحت في البصخر" عشان يوفر لعروسته

حياة كريمة.. وهي كانت بترفض كل العرسان اللى بيتقدموا لها عشان عارفة كويس ان الشخص ده بيتعب عشانها وكل اللى مأخره انه بيتعب عشانها.. وهى صابرة عليه ومؤمنة بيه (و أكبر مثال على كده أبوك وأمك اللى كافحوا كتير عشان العلاقة دى تفضل مستمرة). انما لو فى الزمن ده لاقيت واحد خاطب ٧ سنين.. ابقى تعالى تف على وشى لو اتجوزها فى الآخر.. وبعدين ثانية واحدة.. هو فيه واحدة فى الزمن ده هتصبر على واحد ستين حتى!!!.

”هيسة الخطوبة“:

الناس عايزة تفرح بيك.. عايزينك بقى تشد حيلك وتخطب عشان يروحوا فرح ويرقصوا ويهزروا ويهيصوا.. عايزينك بقى تتلحح وتخلص.. عايزينك تفرحهم بال!!!!!! أخى.. حتى لو كان ده على حساب فرحتك انت، مش مهم.. المهم انهم يروحوا أى جواز وخلاص، ويلبسوا الفساتين ويزيطوا فى أى حاجة وخلاص.. ما هو يابنى بقالهم كتير ما يفرحوش!!! . حاجة غريبة يا أخى، انك تلاقى ناس عايزاك تخطب عشان يفرحوا وخلاص.. وانت مش مهم بقى فى داهية.. مش مهم إذا كان الزن اللى بيزنوه على ودانك/ ودانك ده بيضايقكم ولا لا.. مش مهم البنت ديه مناسبة ليك أو الولد ده مناسب ليكى ولا لا.. المهم ان الناس تنسبط وتهيص.. ولما الموضوع يتشكل بعد كده، يردوا عليك الرد النموذجى اللى ”الناس“ بتقوله فى أى موقف سلبى هم بيتقوا السبب الأول فيه.. ”هو كان حد ضربك على ايديك؟؟“.

”اتجوز بدرى عشان سنك بيبقى من سن ابنك“:

من أغبي ٢٠ جملة سمعتهم فى حياتى.. فى اعتقاد جازم لدى كتير من الناس انك لازم تتجوز بدرى بدرى عشان ابنك يلحق يكبر وسنك بيبقى من سنه، وتلعبا كورة بقى مع بعض وتجروا ورا بعض وتحممموا بعض وتلييفوا بعض!!!! .. للمرأة المليون، انت مهما عملت، الجواز ده قسمة ونصيب.. لو انت مكتوب لك

تتجوز في سن ٤٠ هتتجوز في سن ٤٠ ويمكن ربنا كمان يكرمك بأكثر مما تتخيل ..
ونفس الكلام للبنات، قبلش نسمع كلام الناس لأن نفس الناس ديه هم هم كانوا
في يوم من الأيام في نفس سنكم وكان بيتقال لهم الكلام ده وبرضه .. ما كانوا
بيسمعوا الكلام!

مواضيع الخطوبة عبرها ما هتخلص .. والمعتقدات اللي في دماغ كل واحد
هتفضل هي هي، مهما عملت عمرك ما هتغير دماغ عاشت تفكر بأسلوب وماتت
وهي بتطبقه .. المنطق يقول: "انك تتجوز وانت مستريح ماديا .. فده أحسن من
انك تتجوز في سن مبكرة وانت ماحيلتكشى حاجة" .. العقل يقول: "أنسب سن
للجواز هو اللي تحس فيه انك بقيت قادر على تحمل مسؤولية شخص وبيت
وعيلة" .. والدين بيقول ان كل ده في علم الغيب .. منين ما يجيلك نصيبك .. هتعرف
وهتحس .. وانا باقول لك: "لما تبقى تتنيل تعرف تصرف على نفسك .. ابقى هات
واحدة شريفة من بيت أهلها واصرف عليها"

انك تضع وقتك في كلام "نظري" .. الهدف مش انك تسرح بخيالك.. انما انك "تفوووق من السرحاان" وتبدأ تطبق حاجة على أرض الواقع (و الكلام ده طبعا أنا مش قصدي بيه كل كتب التنمية البشرية، انما بانكلم عن أنواع معينة منها كلنا أعتقد عارفينها.. كتب المقالات).. زى الكتب اللي تقول لك لازم تدور جوه نفسك، من غير ما تذكر ان ده ممكن ياخذ منك عمرك كله لو مابتبعشى الطريقة الصحيحة.

باستغرب قوي لما بأسأل حد من اصحابنا أو قرابى في قعدة صفا كدا لما نبقي قاعدين بتتكلم في أى حاجة ومرة واحدة الكلام ياخذ منحى تانى، ويغلب عليه طابع "أنا عايز أعمل حاجة جديدة في حياتى" .. اكيد كلنا بنعدى بالأوقات ديه، وساعتها كل واحد بيقول رأييه والقعدة كلها بتقلب "مواهب مدفونة" .. كل واحد بتكتشف انه كان عنده حاجة كان شاطر فيها وهو صغير، لكن مع الوقت لما مالاقاش تشجيع من حد.. بدأت تضمز الموهبة ديه عنده. لكن اللي باستغرب له فعلا، لما بلاقى ناس بترد تقول: "أنا مابعرفشى أعمل حاجة.. انا ماعنديش حاجة". الناس اللي من النوع ده بابقى عايز أسألهم سؤال واحد: "نفنكر ربنا هيخلق مخلوق جبار ومقتن الصنع زيك.. وضع فيه أسرار مهولة وأبدع فى خلقه.. وبعد كل ده سيادتك بتقلل من نفسك؟؟؟". ربنا اللي خلق لك "العين"، اللي تعمل منها فكرة الكاميرات والفيديو وكل التقنيات المرئية الرهيبية ديه واللى لسه ماحدش عارف يوصل لتقنية قريبة ولو بدرجة بسيطة لنفس العين الرباتى، ولسه مش مقتنع انك مميز؟؟؟. ربنا اللي خلق لك "المخ" بكل تفاصيله وأسراره الغامضة اللي اتاخذت منه فكرة "الكمبيوتر" وكل الحواسيب والأجهزة الرقمية (البسيطة جدا بالنسبة للتقنيات الإلهية الموجودة فى المخ)، وانت لسه مقتنع انك قليل؟؟؟. طيب المصانع اللي

جواك اللى ربنا خلقها طبيعي؟ ..مصانع "التنقية" اللى فى الكلى، ولا مصانع الهضم وتحليل الطاقة اللى بتبدأ من المعدة وتنتهى للـ "خلية" وتنتج لك طاقة نووية وكيميائية؟؟.. طيب ايه رأيك فى المضخة اللى بتفضل شغالة طووول عمرك (القلب) واللى من خلالها الانسان عمل كل مضخات المياه وأنظمة المواسير، وانت لسا مش مقتنع انك مخلوق مميز؟؟؟؟ .. سيبك من كل ده لو كان بسيط بالنسبة لك، انت عارف ان أنظمة الدفاع الحربية العالمية كلها كان أصلها منين؟؟؟ وازاي طورت دفاعاتها ووسائل الحماية؟؟.. لما درسوا جسمك وعرفوا قد ايه انت عندك وسائل دفاع ومضادات أجسام وخط دفاع أول وتانى وتالت، وانت لسه عندك شك ولو بسيط انك مخلوق مميز؟؟؟؟ .. ولا أقول لك، شوف عضلاتك ونظامك العضلى الممتاز، اللى من خلاله اكتشفوا الدروع والدفاعات والنظام ضد الصدمات فى العريبات والمباني وغيره.. كلمنى كده عن جهازك الدعامى (العظام والعمود الفقرى) اللى من خلاله اخترعوا الـ "رافعات" والجرارات وما شابه ذلك.. وبعد كل الأمثلة البسيطة ديه، ولسه شايف انك انسان "غير موهوب؟؟؟" .. لسا شايف ان ربنا خلقك كده وخلق فيك كل الامكانيات ديه "عبث"؟؟؟؟ . انت مش محتاج تقرأ كتب تنمية بشرية عشان تنمى قدراتك.. انت محتاج بس تركز فى معنى الآية الكريمة ديه:

"أَوَلَمْ يَتَفَكَّرُوا فِي أَنفُسِهِمْ....." .. لو بصيت جواك، هتلاقى أكبر موسوعة كتب تتعلم منها.

الآية ديه هى دعوة عامة للتفكير فى خلقك انت شخصيا.. ربنا عايز يقول لك ان انت جواك «كنز» حقيقى.. بس لازم تدور عليه.. جواك حل لكل مشاكلك فى الحياة، حتى المشاكل اليومية، بس انت اللى بتكسل تدور جوة.. أو إيمانك بيقل يوم

بعد يوم. فيه مثل بسيط جدا كلنا بنشوفه كل يوم في حياتنا، وينفضل نشتم ونزقق ونقول عايزين حلووول ونجيب خبراء من برة وعاملين عليها مشاكل.. مع ان حلها موجود جوة جسمك بالظبط. قل لى الأول.. تعرف معنى ايه «تصلب شرايين»؟؟..
تصلب شرايين للى مايعرفشى يعنى انسداد الشرايين اللى ييمشى فيها الدم.. وده طبعا بيأثر على كميات الدم اللى يتوصل للأعضاء وتوقيت وصولها فى الوقت المناسب، بالتالى بيأثر عليها. تصلب الشرايين أو انسدادها مش شرط يكون بالكامل.. لكن يكفى انك تسد جزء منها عشان يعمل مشكلة أو «يعطل حركة الدم».. بدون تفاصيل طبية دقيقة ومزعجة، الموضوع بيحصل ببساطة عشان سببين:

عشان فيه دهون زيادة لزت على جدران الأوعية الدموية والشرايين ديه فى خلتها «أضيق» من مساحتها الطبيعية.. وعملت «زحمة».

ان الجدران بتاعة الأوعية ديه بقت «عجوزة».. «مكروشة» ومش ناعمة وسلسة زى الأول، فتخلى الدم اللى ماشى يترنق فى «المطبات» اللى معموله فيها.

المشكلة اللى باتكلم عنها هى «الزحمة المرورية».. الزحمة المرورية-سبحان الله- اللى بنشوفها فى الشارع هى بالظبط نفسها اللى بنشوفها فى جسم شرايين الشخص المصاب ب«تصلب». الشارع بيضيق عشان العربيات بتركن صف «قالت» وأحياناً «وابع» على الجنين، وعشان الأرض نفسها بقت «مكسرة وكلها مطبات» وبالتالى العربيات بقت تمشى بطيء لأن كل واحد هيخاف على عربيته. اللى عايز أوصله لكم ان يكفى جدا انك تشوف نفسك وتتفكر فى خلقتك وتشوف قد ايه ربنا-سبحانه وتعالى- كرمك وأبدع فيك عشان تفتتح انك أكيد «معيز».. وان مايفيش حاجة اسمها «انا ما عنديش موهبة»، أو «ما عنديش حاجة بتميزنى».. اذا كنت ابنت فى حد ذاتك «مبيرة».

عملى لكلمة «موهبة».. يمكن الكلام ده يدليك أمل بجد انك تقدر تبقى «أحسن منى كمان».

الموهبة دى عالامة، يعنى «قدرة»، «منحة»، أو عطية من الله سبحانه وتعالى ليك من أول ما خلقك... أكبر دليل على اننا زى بعض وكلنا من نفس العجينة اننا اتولدنا واتخلقنا بنفس الطريقة.. ولما اتخلقنا، ربنا-سبحانه وتعالى- نفخ فينا من روجه.. كل واحد فينا بقى فيه شىء من الله -عز وجل- وهى ديه المنحة الحقيقية.. الموهبة مش انك تطلع فنان أو موسيقار أو حافظ للقرآن أو رياضى أو سياسى محنك أو مهندس واعد أو طبيب ماهر.. لأن ما فيش حد يتولد بيعرف يرسم (مهما كان موهوب في لازم يتعلم يمسك القلم ويستعمل الألوان) والرياضى البارع ده ما اتولدشى بفانلة وشورت يعنى.. لكن طالما انت فيك من روح الله سبحانه وتعالى، اذن فيك من صفاته.. فيك صبر وقوة وعلم وابداع.. فيك كل الصفات الهائلة اللى ربنا وضعها فيك، لكن طبعاً الصفات ديه موجودة فيك كـ «نفحة».. انما هى صفات «مطلقة» فى الله رب العالمين.

عزيزى القارىء، انت عندك القدرة انك تبقى أى حاجة انت عايزها، زى «الخلايا الجزعية» اللى ربنا خلقها لك واللى عندها القدرة انها تبقى أى عضو من أعضاء الجسم، خلية واحدة تعمل كده آمال انت كلك تعمل ايه؟؟؟! وهاشبهالك بمثال بسيط.. يمكن أول مرة هاتسمعه. الموضوع زى بالظبط مجموعة ناس كل واحد فيهم أخذ «بتر ماء» عشان يعيش بيه.. المفروض انه يكفيه يطبخ بيه ويستحمى بيه ويشرب منه ويغسل هدومه وو.. طيب، لو واحد استعملها عشان الغسيل أكثر... هدومه هتفضل نظيفة دائماً، لكن بقيت المتطلبات الثانية هتقل (مش

هستحمى مثلا)، ولو كان مهووس بالحموم أكثر، يبقى هيخلص الماية كلها ومش هيعرف يغسل هدومه ولا يطبخ ولا يعمل أى حاجة تانية (بس هيفضل مستحمى على طوول ونظيف أكيد).. اللى عايز أوصل له ان الموهبة هى «القدرة على النجاح والتميز في أى حاجة بتعملها»، انت ممكن توزعها على كذا حاجة أو انك تركز على حاجة واحدة بس (زى انك تبقى فناان كبير أو رياضى عالمى) وساعتها خد بالك انك زى ما هتميز في حاجة واحدة.. زى ما هتلاقى ان باقى المجالات عندك «ضعيفة».. الفرق الوحيد بين التشبيه اللى قلته والحقيقة، ان فى الحقيقة رينا - سبحانه وتعالى - بيديلك قدرة «لااااا متناهية».. كل ما هستعملها أكثر.. كل ما هتطور معاك، وعمرك ما هتظل تتعلم أبدا. (الكلام ده بالقوله على مسؤوليتى الشخصية.. لأنى جربتته «بنفسى»، عشان أتعلم اللى اتعلمته).

واحد هيقول ان «اكتشافه لموهبته كان صدقة»..بس أنا مش مؤمن بموضوع الصدف إطلاقا.. أى علم فى الدنيا احنا بنكتشفه لما «رينا يآذن» اننا نكتشفه، والدليل على كده فى آية الكرسى: «يعلم ما بين أيديهم وما خلفهم.. ولا يحيطون بشيء من علمه إلا بما شاء».. العلوم والمواهب والقدرات ديه كلها موجودة من زماناااا، ولكن مين ما رينا يآذن بعلمنا بيها هنعرفها ونختبرها. الكلام عن الموهبة وقدرة الانسان (أى انسان) على تحقيق أهدافه يطوووووول شرحه.. لكن أكثر نصيحة هاقولها لك فى الوقت الراهن، وعايزك تركز فيها كويس قوى، هى «دور على الرااابط».. أى حاجة بتعلمها فى حياتك ليها رابط أو «سر».. بمجرد ما ينكشف، هتلاقى نفسك بتعرف تعمل أى حاجة تانية ليها علاقة بالسر ده. لو انت مثلا هتتعلم آلة موسيقية، لو اتعلمت سر الآلة أو الموسيقى عامة.. هتقدر تعزف على أى آلة موسيقية مهما كانت

صعبة، بمجرد ما تتمرّن تمارين قليلة عليها.. ونفس الكلام في الرياضة، لو اتعلمت سر التوافق العضلى العصبى في الرياضات عامة.. أصبح جسمك قادر على ممارسة أى رياضة مهما كانت، لأنه بقى مهياً لممارسة الرياضة عامة خلاص.. ولو انت عايز تتعلم لغتلك (اللغة العربية) كويس، يبقى عليك وعلى القرآن. عموماً، لو انت عايز تفضل زى مانت دكتور، مهندس، حرفى، صيدلى، ظابط أو أى وظيفة عادية بس.. يبقى اعذرنى.. لأنى خيلتك تقرأ الكتاب ده، الكتاب ده دعوة للتفكر فى حالك وحالى.. بدأتها بمواقف كوميدية (لكن كلها حقيقية وحصلت فى حياتى الشخصية وحياة كثير منكم).. وكان غرضى انا نتعلم من حياة كل واحد فينا، ونضحك على زلاته وفشله.. نضحك بس.. ماناخدشى منها غير الضحك.. وبعد ما نضحك عليها، نرميها ورا ظهرنا ونبدأ ن فكر هنرتفع للمستوى الأعلى من حياتنا ازاى.. أصل يابنى انت وهو وهى، الدنيا بيك أو من غيرك ماشية.. يا اما تقول لها اتكلى على الله وسبينى.. يا اما تقول لها «اركنى على جنب واتعلمى منى».

الرسالة وصلت؟! ..

كده أنا خلصت كلامي.. الكلام اللي اتمنى انه يكون وصلكم من غير ما يكون
أى حد حس انى بضيع له وقته أو يحاول أجبره انه يقرأ الكتاب وخلص. احنا اتفقتنا
ان الكتاب من ضمن أغراضه المناقشة، وأكد هاكون سعيد لو قدرت أوصل لعقولكم
ومشاعركم ولو على مستوى فكرى وعاطفى بسيط.. بس خيلنا نتكلم عن الرسالة
الأساسية اللي اتمنى انها تكون وصلت.. ازاي تبقى شاب شيك؟!.. الشياكة على
مدار سنين طويلة كانت فى العربية الغالية المودرن، الشقة الراقية، الساعة الماركة،
البرفيم أو العطر الجاامد، الجزمة النظيفة والمتلمعة قوى.. لكن اسمحلى أقول لك
ان كل ده كلام فارغ.. كلها أكسورات، والدليل القوى على كده هو انك بتعرف
«محدث النعمة» من الانسان الشبعان الحقيقى حتى لو كان الأول ده لابس أعلى ما
عنده.. بيبان عليه برضه انه «محدث نعمة». ده لأن الشياكة مش شياكة لابس ولا
أكسورات.. الشياكة شياكة «فكر».

أيا كان المكان اللي انت عايش فيه، العربية اللي انت راكبها (ده لو عندك)،
مرتبك أو مصروفك، مساحة بيتك، منطقتك، ظروفك أو مؤهلك التعليمى، حياتك
الاجتماعية بصورة أو بأخرى.. أيا كان كل ده، فهو مش مبرر أبدا انك تفتح ان هو ده
آخرك فى الحياة.. ربنا من عليك بنعم كتيرة جدا، بس انت اللي مكسل تتعب
شوية وتدور، تشوف، تدعس وتنخور.. تفتح علبة الهدايا اللي ربنا باعتهالك
وبيبعتهالك كل يوم وانت راكبتها جواك لمجرد انها «مش هدايا زى اللي بتشرفها فى

الأفلام» ، الهدايا الملفوفة بشريطة ملونة! . لو فكرك شيك، تأكد ان كل تصرفاتك واختيارك لأسلوب حياتك (اختياراتك عامة) وابتسامتك وأصحابك وحياتك ومماتك كمان هيقرا شيك. مش عشان الناس كلها شايفة انك مش هتعرف تعمل حاجة معينة، يبقى خلاص رأيهم ده قرآن منزل ولازم تاخذ بيه.. كانت من أسوأ (و لا زالت) نوعيات الناس اللي عرفتها في حياتي الشخصية هم الناس اللي يقولوا لك « انت لو وقفت على شعر راسك.. مش هتعرف تعملها» !!! .. انا عارف ان مافيش حد في الدنيا بيعرف يعمل كل حاجة.. لكن ان انت خلاص تبقى متأكد اني «مش هاعرف أعمل الحاجة الفلانية دي؟؟» .. حكمت عليّ خلاص اني مش هاقدر أعملها؟؟!.. هو انت كنت دخلت جوايا وعرفت أقدر أعمل ايه وماقدرشى أعمل ايه؟؟!.. هو انت تعرف الغيب لا مؤاخذه وانا مش واخذ بالي وحددت اني مش هانجح فيها؟؟؟!.. هو انت أصلا ميسن، فكرني تاني كده؟؟! .

ولو هتكلمني عن أهم حاجة، هاقول لك «الصحبة الشيك».. فيه ناس رغم انك بتعرفهم متأخر، بس بتمنى لو عرفتهم من أول يوم في الجامعة.. عارفهم؟؟ الناس اللي عمرك ماتشوفهم مكشرين أبدا، عمرهم ما يحبطوك ويتحس معاهم بالإلهام.. بتحس ان ربنا بعثهم لك عشان سبب، عشان تتعلم حاجة.. نعم يا سادة، عن (واحد صاحبي ماتعرفهوش) أتحدث.

• خدها قاعدة عامة عن «أشيك ستايل لبس».. اللبس اللي تعرف تصلى بيه قدام ربنا- سبحانه وتعالى- وانت مستور ويتأدى بيه صلاتك صح هو أشيك لبس (لأنه فيه احترام وشياكة وستر بدون مبالغة) وأحسن طول لشعرك وتسريحة شعر هي التسريحة اللي تسمح لك تتوضأ من غير مشاكل (الطول المعتدل للشعر من غير استشوار ولا جيل ولا اشتمزاز من أى نوع).. اتحدالك قدام أى خبير في العالم لو

أشيك واد في شبرا

فعلا بتقرأ في مجلات موضحة انك تلاقي الموديل المثالي فيه صفة شكلية واحدة مختلفة عن الموصفات ديه.. ده تحدى حقيقي على فكرة!.. ديه اسمها «الظفرة».. وهي أنظف حالة ممكن يكون فيها الانسان.

آخر حاجة هاقولها بالمناسبة.. لو انت فاكر انى أنا بس اللي كده، تبقى غلطان. زى ما فيه «أشيك واد في شبرا».. فيه كمان «أشيك واد في المعادي»، «أشيك واد في مساكن شيراتون»، ومساكن السعودية، الأميرية، شبرا الخيمة، كوبرى القبة، الزمالك، وأشيك واد في مصر الجديدة وفي كل مكان فيكى يا مصر.. مصر مليانة ولاد وبنات شيك جدا، مثقفين، محترمين وجدعان قوى.. مصر كلها بلد شيك. اللي عايزك تعرفه وتأكد منه كمان.. ان لو انت مریت بكل الأحداث اللي فى الكتاب وكل الاختبارات القدرية والنفسية والعاطفية والدينية اللي فيه.. لو انت حتى مریت ولو بجزء بسيط منها أو أحداث مشابهة ليها.. لو مریت بكل ده ولسه عااااااايش، مبتسم، أبوك وأمك راضيين عنك، راضى عن نفسك وعن شكلك وعن حياتك اللي انت اخترتها بنفسك، عندك يقين وحسن ظن بالله.. يقى انت أكيد.. أكيد.. «أشيك واد في منطقتك».. سلام يا شيك.

توقيع / واحد «أشيك، منك

معلومات عن الكاتب



الاسم: محمد ناجي عبد الله عبد المال عطا الله

السن: ٢٥ سنة / مواليد ١/٥/١٩٨٨

الحالة الاجتماعية: أعزب

المؤهل الدراسي والوظيفة: بكالوريوس طب

وجراحة الفم والأسنان / أخصائي طب وجراحة الفم والأسنان

مجالات أخرى: فنان تشكيلي، موسيقى (جيتارست وآلات أخرى)، ممارسة

لرياضة كيك بوكسينج والأيكي - جوجيتسو، كاتب (حديثا)... وغيره.

للتواصل مع المؤلف:

ايميل: membergold37@yahoo.com

موبايل: ٠١٠٩٥٦٦٤٤٥٤

الفهرس

- 5 إهداء
- 7 مقدمة الكتاب
- 9 الهدف من الكتاب
- 11 القضايا المتضمنة في الكتاب
- 13 ركز بس في ثانوية عامة وبعدها عمل اللي انت عايزه
- 18 هتدخل زون جميلة ليه؟؟!!.. الطب حلو
- 22 سنة أولى شبرا
- 25 مصر في عيون شبراوى
- 29 نظرية "التظييط"
- 33 ميكروياص "عبود- موقف العاشر"
- 38 نقطة خلاف: ليه دايمًا الدحيحة دمههم "يلطش"
- 43 الجميلة والصرصار
- 47 أول يوم لوحدى.. (نقطة التحول)
- 52 الشبراوى والحب
- 78 حرام ولا حلال.. نفسى أعرف!

- 81 ماترسمشى "بورترهات وجوه" عشان حرام
- 84 مش شرط تكون محترمة عشان محجبة
- 87 صراع «الشبراوى والفن التجريدى»
- 91 ازاي.. ازاي تحول اللين له «بلاستيك»
- 97 «خلينا أصحاب أحسن.. المعنى الحقيقى وراها»
- 112 "كيف تصبح مليونيرا فى شهر" (ده لو عايز يعنى)
- 118 الأسطورة بتقوووول..!
- 129 فوكوشيما
- 134 عن "العهر" الإعلامى أتحدث
- 145 نعم يا سادة.. "إنه الشاب المصرى"
- 150 رجيم X رجيم
- 158 الناس كلها "خطبت" وأنا لسه..!
- 163 "اعرف نفسك.. تعيش ملك"
- 171 الرسالة وصلت؟؟..
- 174 معلومات عن الكاتب
- 175 الفهرس

أسباب تفليك "ماستريش" الكتاب



(1) الكتاب يخاطب سن الى حد ما "معين" .. ما بين 17-30 سنة، لو انت أكبر من كده هاتلاقى فصول يمكن مش هاتسها زي اللي ف سنهار، و لو أصغر.. يبقى الكتاب مواضيعه ثقيلة عليك.

(2) بينى و بينك كده و من غير ما حد يسمع.. لو و انت بتقلب قى صفحاته أو فتحته وبصبت عالقهرس " و انت واقف قى المكتبة قبل ما تشتريه" و حسبت ان مواضيعه مش على هواك أو "نافهة" .. عشنا ان خاطرى رجعه مكانه و أنا بقولك ماتدفعشى فيه مليبيم واحد و هاكون سعيد جدا.

(3) فى المقدمة انا قلت ان "كل الأحداث حقيقية"، ف لو انت بعد ما اشتريته لاقبت ان فيها مبالغة و انك اتضحك عليك.....دى مشكلتك انك مش مصدق، و القانون لا يحمى "الشكاكين".

(4) أخيرا، لو لا قدر الله غلط غلطة عمرك و عديت كل ده و مضمم تشتري الكتاب، و اكتشفت انه مش حلو أو ماستفدتش منه أو حتى مرسمشى على وشك ابتسامه صغيرة.....حقك عيبار، بس لو شوفتنى صدفة ف أى مكان.. اعمل عبيط!